

# El santo evangelio según San Lucas

---

## San Lucas í gotiswore gaye

**1** <sup>1</sup>Ñati m̄ yu baba Teófilo. Adi m̄re papera cōa yu. Adi rum̄ri Jesure rētagore oca ucari masa jājarā ñama ĩna ĩja. <sup>2</sup>Mani robo bajiroti cajero Jesús rāca riasotigoana ĩna gotija, tuogonati ñama ĩna c̄ni. Ito bajiri ĩna ucarise ticōri, “Jesús rāca riasotigoana ĩna gotiro bajiroti ucama ĩna c̄ni”, yi t̄oĩa mani. <sup>3</sup>Ito bajiro yi masibojaguti jeyaro Jesure rētare oca queno riasoticōri, “Yu baba Teófilore yiari, ȳmasiti itire ucac̄ja yu”, yi t̄oĩacu yu. <sup>4</sup>Ito bajiro t̄oĩacōri, “Jeyaro yu tuogore bajiroti bajiyija Jesure c̄ni”, m̄ yi t̄o masitoni adi m̄re uca yu.

## Juan í rujearoto riojua ángel í goti yure gaye

<sup>5</sup>Herodes, Judea sita w̄ju ĩ ñaroca, s̄gũ ñayiju pai Zacarías wame cutigu. Pai Abías gāna rāca gagu ñayiju Zacarías. ĩ manajo Elisabet wame cutigo ñayijo iso. Pai Aarón ñajacu janeño ñayijo iso. <sup>6</sup>Dios ĩ tija queno yirā ñayijarā ĩna j̄arā, Zacarías ĩ manajo rāca. Ito yicōri Dios ĩ rotirise queno c̄dirā ñayijarā ĩna. Ito bajiri, “ĩnare seti ña”, yi masibisjarā gājerā. <sup>7</sup>Ito bajibojarocati r̄ia mañijarā ĩna. No yicōri r̄ia cuti masibisijo Elisabet. ĩna j̄arā bucurā riti ñayijarā ĩja.

<sup>8-9</sup>Co rum̄u Zacarías rāca gānare pai ye moare ñayiju Dios ya wiju. Paia ĩna yisotire yicōri Zacaríasre bese masiyijarā gājerā paia. “M̄ti ña Dios ya sōa s̄jarocu, Diore queno s̄tirise soe ĩsiroc̄u”, yi ti masiyijarā ĩna Zacaríasre. <sup>10</sup>Ito ĩna yija t̄ocōri, Diore queno s̄ti quenarise soe ĩsiroc̄u, Dios ya sōa s̄jayiju Zacarías. Ito ĩ soe ñaroca riti mac̄jua Diore busi ñayijarā masa jeyaro. <sup>11</sup>Iti ĩ soeroca riti Dios ñaro gagu ángel goaoyiju Zacaríasre. Diore soe ĩsiraju riojocadujajua goa r̄ḡyiju ĩ. <sup>12</sup>Ángelre ti bujacōri, no yi masibisiju Zacarías. B̄to güiyiju ĩ. <sup>13</sup>Ito bajiro ĩ güija ticōri, ado bajiro ĩre gotiyiju ángel: —Güibesa Zacarías m̄. M̄ busirisere t̄oami Dios. Ito bajiri m̄ manajo Elisabet macu cutigo yigōji. Ito yicōri Juan ĩre wame wōgũ yigujua m̄.

14-15 Mũ macũ Dios ĩ tiro riojo queno yigũ ñagũ yiguĩji ĩ. Ito bajiri queno wanũgũ yigũja mũ. Ito yicõri ĩ rujeaja tũocõri, masa jãjarã wanũrã yirãji ĩna. Mũ macũ uyé ide idibiquĩji, sibiore cũni. Ito yicõri ĩ rujearoto riojũa Espĩritu Santo quedi sãjagũ yiguĩji ĩre. 16 Mũ macũ ĩ riasorise tũocõri Israel sita gãna jãjarã mani Ʋju Dios rãca tũdi usi cõtĩrã yirãji ĩna. 17 Jane mejeju Elías wame cõtĩgũ, Diore goti ĩsiri masũ ñayijũ. ĩre bajiro queno oca sũero masare riasogũ yiguĩji mũ macũ. Dios ĩ cõarũ Cristo ĩ ejaroto riojũa, Dios oca queno masare riasogũ yiguĩji mũ macũ. Ito bajiri Espĩritu Santo ĩ ejabũarisena jacũsabatia ĩna rĩa rãca corocõ usi cõtĩroca yigũ yiguĩji ĩ. Ito yicõri Diore cũdimena ĩna cũdiroca yigũ yiguĩji ĩ. Ito bajiro yigũ, Cristore masa ĩna boca ãmi ñacãroca yigũ yiguĩji mũ macũ, yiyijũ ángel Zacaríasre.

18 Ito ĩ yija tũocõri, ado bajiro ĩre seniĩayijũ Zacarías:

—¿Mũ yirise rẽtaro yiroja, no bajiro yi tũoĩa ñagũ yigũjada yũ? Bũcũgũ ña yũ. Ito yicõri yũ manojõ cũni bũco ñamo, yiyijũ Zacarías.

19 Ito ĩ yija ĩre cũdiyijũ ángel:

—Gabriel ña yũ. Ito yicõri Diore moa ĩsigũ ña yũ. Mũre iti oca quenarise yũ gotitoni yũre cõami Dios. 20 Ito bajibõjarocati yũ bũsirise mũ tũorũnũbejare bũsi masibiticõri, bũsibicũ ñagũ yigũja mũ. Ito bajiri mũ macũ ĩ rujearoto riojũa bũsibicũ riti ñagũ yigũja mũ maji. Ito bajiroti rẽtaro yiroja, Dios ĩ ãmori rũmũjũ, yiyijũ ángel Zacaríasre.

21 Ito ĩ yiroca macũjũ ñarã ruje tũoĩayijarã masa Zacaríasre yurã. ¿No yija Dios ya wijũ yoari sejati Zacarías? yi tũoĩayijarã ĩna. 22 ĩ budija bero no yi bũsi masia mañijũ Zacaríasre. ĩ ito bajija ticõri, “Dios ya sõajũ ñasarise tiñi ĩ”, yiyijarã masa. ĩjũa bũsibicũ ñacõri no bajiro yi bũsi masibisijũ ĩnare. Ito bajiri bũsigũocũti ĩ ya ãmona sõju quesoĩayijũ ĩ.

23 Dios ya wijũ ĩ moa tĩõja bero ĩ ya wijũ tũdi wayijũ Zacarías. 24 ĩ ya wijũ ĩ tũdi ejaja bero ĩ manojõ Elisabet macũ sãñagõ ñayijõ iso ĩja. Ito yicõri wijũ ñagõ, budibisijõ iso co dũjamocõ ũmacañicõ. 25 Ado bajiro tũoĩayijõ iso. “Ito bajiro yũ macũ sãñaroca yĩni Dios yũre. Gãjerã yũre ĩna ti tudibe yigũ, ito bajiro queno yĩni Dios yũre”, yi tũoĩayijõ iso.

### Jesús ĩ rujearoto riojũa ángel ĩ goti yure gaye

26 Co ãmojeno ũmacañi macũ sãña tũjago Elisabet iso ñaroca, Dios ñaro gagũ ángel Gabriel wame cõtĩgũre cõayijũ Dios, Nazaret wame cõtĩri cũtojũ. Galilea sitajũ ñayijũ iti cũto. 27 Itojũ sīgõ María wame cõtĩgũre oca gotĩrocũre cõayijũ Dios Gabrielre. Manũjũ maco ũmũgũ rãca ajeĩabeco ñayijõ iso. Ito yicõri José manojõ ñaroco ñayijõ iso. Masa Ʋjũ ñayorũ janami macũ ñayijũ José. ĩ ñicũjũ David wame cõtĩyoyijũ, jane mejeju masa Ʋjũ ñayorũ. 28 María tũjũ ejacõri ado bajiro isore gotiyijũ ángel:

—¿Ñati mũ? Mũre oca gotĩgũ wadibũ yũ. Dios ĩ tija, queno usi cõtĩgũ ñayijũ mũ. Ito bajiri mũ rãca ñami Dios. Gãjerã romia rẽto bũsaro queno yĩni Dios mũre, yiyijũ ángel Maríare.

<sup>29</sup>Ito ī yija t̄uocōri, b̄uto t̄uōia jaiyijo iso īja. “¿No yija ito bajiro ȳure seniīati ī?” yī t̄uōiayijo iso. <sup>30</sup>Ito yija m̄ucana isore b̄usiyij̄u ángel:

—Ḡuibesa María m̄u. M̄ure wan̄uami Dios. Ito bajiri m̄ure queno yīni ī. <sup>31</sup>Mac̄u s̄āñagō ñas̄uogo yigoja m̄u, ito yicōri mac̄u cutigo yigoja m̄u. Īre mac̄u cuticōri, Jesús wame yigo yigoja m̄u, m̄u mac̄ure. <sup>32</sup>Masa r̄etoro masi r̄etoc̄uḡū ñaḡū yiguīji ī. Ito yicōri, “Dios Mac̄u”, wame cutigu yiguīji ī. Dios ūmac̄ūju gaḡu Mac̄u ñari ito bajiro wame cutigu yiguīji ī. Ī ñic̄uju David ñayoru robo bajiro Ūju ñaḡū yiguīji ī c̄uni. Ito bajiro ī ñaroca yigu yiguīji Dios. <sup>33</sup>Israel sita ḡāna jeyaro ūju ñaḡū yiguīji m̄u mac̄u. Ito yicōri ī rotirise s̄usabeto yiroja īja, yiyij̄u ángel Maríare.

<sup>34</sup>Ito ī yija t̄uocōri, Īre seniīayijo María:

—¿Ūmuḡū r̄āca ȳu ñabitibojarocati ȳure mac̄u rujeaḡu yiguījida? yiyijo iso Īre.

<sup>35</sup>Iso ito yija t̄uocōri, ado bajiro isore c̄udiyij̄u ī:

—Ī ya ūsiti m̄ure queo s̄āḡū yiguīji Dios. Ito yicōri ī masirise m̄u r̄āca ñaro yiroja. Ito bajiro Dios ī yija ī ya ūsiti m̄u mac̄u s̄āñarise bajiro yiroja m̄ure. Ito bajiri mac̄ac̄ā m̄u r̄ucoroc̄u Dios ī āmorise riti yigu yiguīji ī. “Dios Mac̄u ñami ī”, yirā yirāji masa. Gaje ado bajiro m̄ure gotia ȳu. <sup>36</sup>M̄u gajego Elisabet b̄uco ñabojagoti mac̄u cutigo yigōji iso. “R̄ia c̄utiado mamo iso”, yibojac̄ā masa. Ito ĩna yibojarocati co āmojeno ūmac̄añi t̄uja iso mac̄u s̄āñaja bero. <sup>37</sup>“Diore disej̄ua b̄uto josarise manoja”, yiyij̄u ī Maríare.

<sup>38</sup>Ito ī yija t̄uocōri, ado bajiro c̄udiyijo iso:

—Dios ī rotirise moa ĩsiri maso ña ȳu. Ito bajiri m̄u yiro bajiroti yire āmoa ȳu, yiyijo María.

Iso ito yija t̄uocōri, ūmac̄ūju t̄udi m̄ujacoayij̄u ángel m̄ucana.

### Elisabetre María iso tigo ware gaye

<sup>39</sup>Ito bajiro ī yira rum̄ari bero ūsirio wayijo María, Judea sitaju ḡūta yuc̄uri ñari c̄utoja Elisabetre tigo waco. <sup>40</sup>Ito ejacōri Zacarías ya wiju s̄ajayijo iso. Ito s̄āja ejacōri, “¿Ñati m̄u?” yī seniīayijo iso Elisabetre. <sup>41</sup>María iso seniīaja t̄uocōri, Elisabet jeraga totiju mac̄u s̄āñaḡū w̄areyij̄u. Ito yicōri Esp̄iritu Santo isore quedī s̄ajayij̄u. <sup>42</sup>Ito bajicōri oca s̄eoro ado bajiro yī gotiyijo Elisabet Maríare:

—Ḡājerā romia r̄etoro queno yīni Dios m̄ure. Ito yicōri m̄u mac̄u r̄ucoroc̄ure c̄uni queno yīni Dios. <sup>43</sup>¿Ñasari maso meje ȳu ñabojarocati ȳu Ūju jaco ñaroco ȳure tigo wadiri m̄u? <sup>44</sup>Ȳure m̄u seniīaja t̄uocōri, ȳu ya jeraga totiju s̄āñaḡū, ȳu mac̄u wan̄uḡū w̄aremi ī. <sup>45</sup>“Dios ī busiado bajiroti itire yicōḡū yiguīji”, yiroco b̄uto wan̄ua m̄u, yiyijo Elisabet Maríare.

<sup>46</sup>Ito yija ado bajiro yiyijo María:

Ȳu ya ūsina mani Ūjare b̄uto r̄uc̄ub̄uo ȳu. Ito bajiri, “Queno ya m̄u”, ya ȳu Īre.

<sup>47</sup>Dios ñami ȳure masoru. Ito bajiri Īre queno wan̄ua ȳu.

<sup>48</sup>Īre moa ĩsiri maso ñasago meje ȳu ñabojarocati ȳure ācabojabiticōri queno yiquī Dios ȳure. Ito bajiri Īre b̄uto wan̄ua ȳu. Ado bajiro b̄usirā yirāji ȳu bero ḡāna. “Isore queno yīni Dios”, yirā yirāji ĩna.

- 49 Ito bajiro t̄oōarā yirāji ñna, r̄ētoro masigū Dios ȳure queno ī yija ticōri. Queno yigū ñami Dios. Ñēnarise yīābicū ñami ī.
- 50 Īre rūcūb̄uorāre ñnare ti mait̄ñagū yiguīji Dios.
- 51 B̄uto s̄ēogū ñami Dios. Ito bajiri jaje tiyamani iocāyijū ī. Ito yicōri, “R̄ētoro masirā ña ḡua”, yi t̄oōābojarāre, r̄ētocūyijū Dios.
- 52 H̄jarā ñasabojarā ñna ñnasabitiroca yiyijū Dios. Ito yicōri, “Gājerā r̄ētoro masigū ña ȳu”, yi t̄oōāmenare ñna ñnasarā ñaroca yiyijū Dios.
- 53 Ñio jogarāre quenarise ecayijū Dios. Ito yicōri gajeoni jairā ñabojarāre c̄uni ñe manoti ñnare bucōayijū Dios.
- 54-55 Mani ñic̄usabatia Abraham ñayorū mesare ado bajiro gotiyijū Dios. “M̄uare c̄uni, m̄ua janerābatiare c̄uni ti maicōri queno yi ñac̄uja ȳu”, yiyijū Dios. Itire ācabojabēami Dios. Ito bajiri ī gotiado bajiroti, mani Israel sita gāna ī r̄ia mani ñajare, queno yi ñami Dios manire. Ito bajiri ī Mac̄u ȳu rūcoroca yigū yiguīji Dios, yiyijo María Elisabetre.
- 56 Ito yi, Elisabet ya wijū ūdiarā ūmacañi ñacōayijo María ĩja. Ito iso ñaja bero t̄udi wayijo m̄ucana iso ya wijūa ĩja.

### Juan idé guri masū ī rujeare gaye

57 Elisabet iso mac̄u rūcori rūm̄u ejaroca mac̄u rūcoyijo iso ĩja. 58 Dios isore queno yija, t̄oyijarā iso ñnarā ito yicōri iso t̄u ñnarā c̄uni. Ito bajiri isore wan̄urā ejayijarā ñna, iso t̄ujū. 59 Mac̄uacā ī joeaja bero ūdia āmojeno rūm̄uri t̄ujaroca ejayijarā ñna m̄ucana. Mac̄uacāre ñna yisotire bajiro ĩre wiro tarona ejayijarā ñna. Ito yicōri ī jac̄u Zacarías wamere wō āmobjayijarā ñna. 60 Ito yibojarocati ī jaco āmobisijō:

—Juan wame cutigū yiguīji, yiyijo iso.

61 Iso ito yija t̄uocōri, ado bajiro seniīayijarā ñna isore:

—¿No yija ito bajiro ĩre wame wō āmoati m̄u? Mani ñnarā sīgū ito bajiro wame cutirā mama, yiyijarā ñna isore.

62 Ito yicōri mac̄uacā jac̄ure seniīarona āmona ĩre sōju quesoīayijarā ñna, “¿Dise wame āmoati m̄u?” yirona. 63 Ito bajiro ñna yija ticōri, mac̄uacā wame uca wōrocū uca jāi ñnare seniijū Zacarías. Ito yija, “Juan wame cutigū yiguīji”, yi uca wōyijū ī. Ito bajiro ī yija ticōri, “¿Ito bajiro wame āmoati ĩ?” yirā, ruje t̄oōāyijarā ñna. 64 Ito bajiro ñna yiroca riti busi masibitirū ñabojaguti busis̄uoyijū Zacarías m̄ucana. “Queno ya Dios m̄u. R̄ētoro quenagū ña m̄u”, yi busis̄uoyijū Zacarías Diore rūcūb̄uoḡu. 65 Ito ī yija t̄uocōri, ī t̄ujū ñnarā ti ūcayijarā ñna. Ito Judea sitaju, ḡūta yuc̄urijū ñnarā c̄uni iti oca r̄ētagore t̄oyijarā ñna. Ito bajiri iti oca goti batoyijarā ñna. 66 Masa iti oca t̄uocōri ruje t̄oōāyijarā ñna. Ito yicōri gāmeri seniīayijarā ñna: “¿Ñim̄u ñnasagu yiguījida ī b̄uc̄uaja? Mani H̄ju Dios queno yiyijū ĩre”, yi masi jediyijarā ñna ĩja.

### Zacarías Diore ī basare gaye

- 67 Ito bajiro ĩna yi ĩnaroca Espiritu Santo quedi sājajijū macuacā jacu, Zacaríasre. ĩre Espiritu Santo quedi sājaja ticōri, ado bajiro Dios oca gotiyijū Zacarías:
- 68 Mani Israel gāna, mani Ujū Diore rūcubūorūja manire. ĩti ĩnami rētoro masigū. Ito yicōri ī ĩnarā ĩa mani. Mani ĩnari tutijū ejacōri manire masoru ĩnami Dios.
- 69 Manire masorocu, sīgū rētoro masigūre cōagū yiguīji Dios. Mani ĩnicu David ĩayoru Diore queno cūdigū janami ĩagū yiguīji ī.
- 70 Jane mejeju ĩre goti ĩsiri masana sūoriti ado bajiro goticāni Dios manire:
- 71 “Mūa wajanare rētocūcūja yu. Ito yicōri mūare ti terāre cūni camotacūja yu.
- 72 Mūare ti maicōri yu goticato bajiroti yicūja yu”, yīni Dios, yi gotiyijū Zacarías masare.
- 73 Mani ĩnicu Abraham ĩayorure ado bajiro goticāyijū Dios:
- 74 “Mūare masocūja yu, mūa wajana ĩna mūare ruyuriobe yirocu. Ito bajiro yicūja yu, gūimenati yure mūa cūditoni.
- 75 Mūa catirocō mūa queno yi ĩatoni, ito yicōri yiro robo yure mūa cūdi ĩatoni, ito bajiro mūare masocūja yu”, yīni Dios, mani ĩnicu Abraham ĩayorure, yi gotiyijū Zacarías masare.
- 76-77 Ito ī yija bero ado bajiro yiyijū Zacarías macuacāre gotigū: “Cristo, Dios ī cōarure masa ĩre boca āmi ĩnacātoni Dios oca ĩnare gotigū yigūja mū. ‘Mūa ĩneñaro yirise mūa jidicāja bero, itire ācabojocōri mūare masogū yiguīji Dios’, yi gotigū yigūja mū masare. Ito bajiro mū gotija tūocōri, ‘Dios ūmacūju gagure goti ĩsiri masu ĩnami’, yirā yirāji masa mure”, yiyijū Zacarías, ī macuacāre gotigū.
- 78 Manire ti maicōri sēoro yibeami Dios. Ito bajiri manire masorocu, Cristore cōagū yiguīji Dios mani ĩnari sitaju.
- 79 Ado ejacōri Diore masimenare ī oca gotigū yiguīji jeame ūjuroju ĩna wabe yirocu. Ito yicōri ī rāca mani queno ūsi cūtitoni, Cristore cōagū yiguīji Dios, yiyijū Zacarías masare gotigū.
- 80 Bucua mūja wacuti buto Diore tūorūnu mūja wayijū Zacarías macu, Juan wame cūtigū. Dios gayere queno tūoīacōri ĩre bajiro ūsi cūtigū ĩayijū Juan. Jai tūjacōri yucu manojū ĩa ucuyijū ī. Israel sita gānare Dios oca ī goti ucuroto rioju, itojū riti ĩa ucuyijū Juan maji.

### Jesucristo ī rujeare gaye

(Mt 1.18-25)

- 2** <sup>1</sup>Iti rūmūriti masa ūju Augusto wame cūtigū, “Adocō ĩnama yu ya masa”, yirocu ĩna wame wō jeo āmoyijū ī. Ito bajiri masa jeyarore wadi rotiyijū ī. <sup>2</sup>Siria sitaju Cirenio ī ūju ĩnaroca ito bajiro bajiyijū iti cajero masare cōīare gaye. <sup>3</sup>Ito bajicōri masa jeyaro ĩna rujeara cūtoju wame ucaronā wayijarā ĩna. <sup>4</sup>Ito bajiri iti oca tūocōri wayijū José cūni. Galilea sita Nazaret

wame cutiri cutoju ñacōri Judea sita Belén wame cutiri cutoju wayiju José ĩ wame wōrocū. Jane mejeju Belénju rujeayiju David, masa ɛju ñayoru. David ñayoru janerābatia macu ñari Belénju wayiju José. <sup>5</sup>Itoju wayiju José ĩ manajo ñaroco María rāca. ĩ rāca ajebitibojagoti macu sãñagō ñayijo iso. <sup>6</sup>Belénju ĩna ejaja bero macu iso rucoroti rumu ejayiju isore. <sup>7</sup>Ito bajiri iso macu ñasugū rucoyijo iso ĩja. ĩre saya werorina gūmacōri ecana ĩna baricoroju ĩre sãyijo iso. Canira wiri daja rētajare ecana wiju ñayijarā ĩna.

### Oveja coderi masare ángel ĩ gotire gaye

<sup>8</sup>Belén tu busa ñayijarā oveja coderi masa. Ta weseju ñami rēta wayijarā oveja coderā. <sup>9</sup>Ñajasaroti Dios ñaro gagū ángel goayiju ĩnare. Ito yicōri Dios ĩ siatirise busuoyiju ĩna wato. Itire ticōri bato güiyijarā ĩna. <sup>10</sup>ĩna güija ticōri, ado bajiro yiyiju ĩ:

—Güibesa mua. Oca quenarise mware gotigu wadibu yu. Iti oca tucōri masa jeyaro wanrā yirāji ĩna. <sup>11</sup>Adi ñamiti David ñayoru ya cutoju rujeami mware masorocū. ĩ ñami mani Ʋju ñarocū Cristo, Dios ĩ cōaru. <sup>12</sup>ĩre mua ti bujaja ado bajiro bajigu bujarā yirāji mua. Saya werorina gūmarure bujarā yirāji mua macuacāre. Ito yicōri ecana ĩna baricoroju cani sãñagū yiguiji ĩ, yiyiju ángel oveja coderi masare.

<sup>13</sup>Ito bajiro ĩ yija beroti ĩre bajiro bajirā ángel mesa jājarā goayijarā. Ito yicōri ado bajiro busiyijarā ĩna, Diore rucubhorā:

<sup>14</sup>Rétoro masigū ñami Dios ũmacūju gagū. Adi sita gāna, Dios rāca queno usi cutirā queno wanu quena ñajaro ĩna, yiyijarā ángel mesa.

<sup>15</sup>Ito yicōri tūdi mujacoayijarā ĩna. Ito ĩna mujagoja bero oveja coderi masa gāmeri busiyijarā ĩja:

—Ita, Belénju wato mani. Iti rētagore tiñato mani. Ito yicōri mani Ʋju Dios ĩ gotirise tito mani, yiyijarā ĩna.

<sup>16</sup>Ito yicōri usirio wayijarā ĩna. Belénju ejacōri María, Josére cuni ti bujayijarā ĩna. Ito yicōri macuacāre ecana ĩna baricoroju sãñagūre ti bujayijarā ĩja. <sup>17</sup>ĩre ti bujacōri, “Ado bajiro bajigu macuacāre ti bujarā yirāji mua”, yi ángel ĩ gotigorere goti jeoyijarā ĩna, itiju ñarāre. <sup>18</sup>Itire tuo wanucōri, “¿No yireoni ñati iti?” yi tuoia jediyijarā itiju ñarā. <sup>19</sup>Ito bajibojarocati Maríajuama iti oca tucōri iso ya usiju tuoia wanu ñayijo iso. <sup>20</sup>Ito bajiro iso tuoia ñaroca ĩna cutoju tūdi wayijarā oveja coderi masa. Warāti Diore rucubhorā ĩre wanu quenare oca busiyijarā ĩna. Ángel ĩ gotigore ñaro bajiroti iti rētaja ticōri, Diore rucubhorā wanu quenare oca busiyijarā ĩna.

### Dios ya wiju Jesure ĩna āmi ejare gaye

<sup>21</sup>Ʋdia āmojeno rumuri Jesús ĩ tujaroca judio masa ĩna yisotiado robo bajiro ĩre wirotayijarā ĩna. Macuacāre wirotayijarā ĩna taja bero Jesús ĩre wame wōyijarā ĩna. “Ito bajiro wame wōma”, yiyiju ángel, María iso macu sãñaroto rioju.



(San Lucas 2.16-17)

22-24 Jane mejeju ado bajiro rotiyiju Moisés ñayorũ: “Romio iso rucoja bero jũarã masacõ rumuri bero iso ñarise cutirise coerona Diore oveja macu soe isima. Oveja i manija, buja robo bajirã jũarã ire soe isima. Ito yicõri buja rĩa cuni quena ñarãji”, yi rotiyiju Moisés ñayorũ. Ito bajiri i rotigore cudirona Dios ya wi Jerusalénju Jesure ãmi wayijarã i jacusabatia. Gaje ucare ado bajiro gotia Dios oca tuti: “Macu ñasuoqu Dios yagu ñagũ yiguuji. Ito yicõri ire moa isigũ yiguuji i”, yi gotia Dios oca. Ito bajiri, “Ani macuacã mure riti i moa isitoni mure isia gna”, yi Diore busirona Jerusalénju Jesure ãmi wayijarã i jacusabatia.

25 Iti rumuri Simeón wame cutigu Jerusalénju ñayiju. Queno Diore cudigu ñayiju i. Israel sita gãnare masorocure bocati ñayiju Simeón. Ito yicõri Espiritu Santo queda sãjacãru ñayiju i. 26 Espiritu Santo ado bajiro goticãyiju Simeónre: “Cristo, Dios i cõarure tigu yiguja mu, mu godaroto riojua”, yiyiju Espiritu Santo

Simeónre. <sup>27-28</sup> José, María rāca ĩna wari rumuti Simeónre cuni Dios ya wiju wa rotiyiju Espiritu Santo. Judio masa ĩna yisotiado bajiro yirona Dios ya wiju Jesure āmi sāja wayijarā ĩna. ĩna iti wiju sājaroca ĩna tu eja rūgūyiju Simeón.

“Dios Macu ñaguĭji”, yi tuoĭacōri Jesure āmi gajayiju ĩ. Jesure āmi gajacōri, “Queno ya mu”, yiyiju Simeón Diore wanugū. Ado bajiro yiyiju Simeón, Diore:

<sup>29</sup> Yu Uju mu goaticato bajiroti yure iti rētaja tia yu. Cristore ti buja yu, mu cōarure. Ito bajiri wanu quenare rāca godagu yiguja yu.

<sup>30-31</sup> Yumasiti tia yu, masa ĩna ñeñaro yirise coerocure. Jesús guare cōayija mu masa jeyaro ñeñaro ĩna yirise coerocure.

<sup>32</sup> Mu cōaru ñami, Israel sita gāna mejere cuni ĩna tuo masiroca yirocu. Ito yicōri mu ñarā Israel sita gānare rūcubwōrā yirāji masa jeyaro, yi wanuyiju Simeón, Diore queno cūdigu ñari.

<sup>33</sup> ĩna macu jaibecuacāre ĩ ito bajiro busija tuo ucayijarā ĩna José, María cuni. <sup>34</sup> Ito yija ĩnare yiarī Diore busiyiju Simeón ĩna queno ñatoni. Ado bajiro yi gotiyiju Simeón, ĩnare. “Quenaro ñarā yirāji mu”, yiyiju Simeón, Maríare, Josére cuni. Ito yicōri Jesús jaco Maríare ado bajiro gotiyiju ĩ:

—Āni macuacā Dios ĩ beseru ñami. ĩ bucuacōri Israel sita gāna jājarā Dios oca cūdimenare ruyuriogu yiguĭji ĩ. ĩre cūdirāre ñeñaro ĩna yirisere ācabojogu yiguĭji. “Dios ĩ cōaru ñaguĭji”, yi masibojarāti jājarā ĩre busiturā yirāji. <sup>35</sup> Masa jeyaro ĩna ya usiju ĩna tuoĭabojarisere ti masicōgū yiguĭji ĩ. Ito bajibojarocati mu macure ĩna rūcubwobeja ticōri, bojori bujago yigoja mu, mu ya usiju, yiyiju Simeón macuacā jaco Maríare.

<sup>36-37</sup> Ito bajiro ĩna busi ñaroca, sīgō Ana wame cutigo Dios ya wiju ñayijo iso cuni. Iso ñayijo Diore goti ĩsiri maso. Ito yicōri Fanuel maco ñari, Aser masa butu gago ñayijo iso. Būco ñayijo iso ĩja wajeago. Ochenta y cuatro rodori tujayiju iso manuju ĩ godagoja bero. Ado bajiro bajiyiju. ĩna āmo siaja bero juā āmojeno rodori ñabojayiju iso manuju maji. Ito bero godacoayiju ĩ ĩja. Ito bajiri ĩ godagoja bero Dios ya wiju riti ñasotiyijo iso. Iti wiju ñagō ũmua cuni, ñami cuni Diore moa ĩsotiyijo iso. Gajereama ba yujibecoti Diore rūcubwosago babeco riti ĩre busiyijo iso. <sup>38</sup> Jesús jacusabatia rāca Simeón ĩ busi rūgōroca, Ana cuni Diore busiroco eja rūgūyijo iso. Ito bajiro Simeón ĩ busija tuocōri, “Queno ya Dios mu”, yiyijo iso. Ito bajiro Diore, “Queno ya mu”, yi tiocōri, ado bajiro yi gotiyijo iso Jerusalén gānare: “Āni ñami mani bocaticacu ñeñaro mani yirisere coerocu”, yiyijo iso masare.

### Nazaretju ĩna tūdi ware gaye

<sup>39</sup> José, María rāca Dios rotirise ñarocōti cūdirā ejaogana, Galilea sitaju tūdi wayijarā ĩna mucana, ĩna cuto Nazaretju warā. <sup>40</sup> Ito bajicōri ĩna cutoju macuacā Jesús sēoro bucuā mujayiju. Queno tuoĭare rāca bucuayiju ĩ. Dios ĩ Jacu queno ejabuayiju ĩre.



### Dios ya wiju Jesús i tujare gaye

<sup>41</sup>Co rodo ruyabeto Jerusalénju Pascua basa ina menija tirã wasotiyjarã i jacusabatia. <sup>42</sup>Jesús jua gubojeno rodori i tujaroca Jerusalénju Pascua basa tirã wayijarã ina. Co rodo ruyabeto basa rumu ina tisotiado bajiro iti Pascua basa tirã wayijarã ina mucana. <sup>43</sup>Ito ejacõri, iti basare tiyjarã ina. Ito bajiri iti jedija ticõri, tãdi wayijarã ina mucana. Ito bajiro ina tãdi waroca Jesuama tujacoayiju Dios ya wiju ija. I jacusabatia, “Tujacoaguïji”, yi tuoïabisjarã ina. <sup>44</sup>“Ado mani rãca warã wato ñaguïji”, yi tuoïayijarã ina. Ito bajiro tuoïa warã riti, co rumu ñmũasaro wayijarã ina. Ito bajiro ina wajasaroti ire ãmabojayijarã ina, ija. “Mani rãca warã wato ñaguïji”, yirona ãmabojayijarã ina. <sup>45</sup>Ito bajibojarocati ire bujabisjarã ina. Ito bajiri ire bujarona Jerusalénju ire ãmarã wayijarã ina mucana.

<sup>46</sup>Udia rumu bero Jesure bujayijarã ina, Dios ya wiju i ñaroca. Judio masa rotirise riasori masa wato ire bujayijarã ina. Riasori masa ina busirisere tuocõri ñnare seniïayiju Jesús. Ñnajuã cuni seniïayijarã ire. <sup>47</sup>Queno masigũ ñari, queno i cãdi masija ticõri, tuo ucayijarã ina jeyaro. <sup>48</sup>Ito bajiroca i jacusabatia ire ti bujacõri, tuo ucayijarã, ito i yija tuocõri. Ito bajiri i jaco ado bajiro yiyijo ire:

—¿No yija gũa waroca gũare gotibicãti, tujacati macu mu? Mu manija ticõri, bũto tuoïa oca jaicu yũ, mu jacu cuni, yiyijo i jaco ire.

<sup>49</sup>Iso ito bajiro yija tuocõri, ado bajiro isore cudiyiju Jesús:

—¿No yija yũre ãmacati mũa? “I Jacu ya wiju ñaguïji”, ¿yi masibiticati mũa? yi cudiyiju Jesús, i jacusabatiare.

<sup>50</sup>Ito bajiro i yibojarocati i busirisere queno tuo masibisjarã i jacusabatia.

<sup>51</sup>Ito ina yija bero ina rãca tudicoayiju i ija, Nazaretju. Nazaretju tãdi ejacõri i jacusabatia rotiro bajiroti cudisotiyiju i. Ito yicõri iso macu Jerusalénju i yigorere tuoïa ñasotiyijo Jesús jaco. <sup>52</sup>I tuoïarise rãcati bucua muja wayiju Jesús. Dios cuni, masa cuni ire ti mai rucubuoijarã ina ija.

### Yucu manojũ Juan idé guri masu i ña ucure gaye

(Mt 3.1-12; Mr 1.1-8; Jn 1.19-28)

**3** <sup>1</sup>Tiberio wame cutigu uju i sãjaja bero, quince rodori i ña tujaroca Poncio Pilato wame cutigu Judea sita uju ñayiju i. Gãji Galilea sita gagu uju ñayiju Herodes wame cutigu. Ito yicõri i ocabaji Felipe wame cutigu jua sita uju ñayiju. Iti i sita rucorise wame cutiyiju Iturea, ito yicõri Traconite. Ito bero gãji Lisania wame cutigu Abilinia sita uju ñayiju i. <sup>2</sup>Masa ito bajiro sita ina rucõ ñaroca Anás ito yicõri Caifás wame cutirã, ina ñayijarã paia ujarã. Ito bajiro ujarã ina ñaroca, Zacarías macu Juan wame cutigu yucu manojũ ña ucuyiju. Ito i ñaroca oca goti rotiyiju Dios ire. <sup>3</sup>Ito bajiro Dios i gotija tuocõri, riaca Jordán wame cutirisa tũju Dios oca goti ucugu wayiju Juan. Ado bajiro yi goti ucuyiju i:

—Mũa ñeñaro yirise jidicãcõri quenarise mũa ya usiju tuoïa wasoaya ija. Ito bajiro mũa tuoïaja, mũa ñeñaro yirise ãcabojagu yiguïji Dios. Dios oca yũ gotirise mũa tuorũnũja, idé gu roti masirãji mũa, yiyiju Juan masare gotigu.

4 Sīgũ Diore goti ĩsiri masũ Isaías wame cutigu ĩ ucado bajiroti yiyijũ Juan. “Ado bajiro yigu yiguĩji”, yirocũ uca yuyijũ Isaías, Juanre tũoĩa yugũ:

Sīgũ yucũ manojũ ado bajiro yi sēria gotigu yiguĩji: “Mũa ya usijũ queno tũoĩa ñaña mũa, mani Ujũ ĩ ejaroto riojũa, mũa ya usijũ ĩ queno ña masitoni.

5 Mũare ñeñaro tũoĩare gaye ñaja itire jidicãña. Mũa ñeñaro yirise iti ruyaja, itire jidicãcõri, quenarisejũare tũoĩaña. Mũa tũoĩarise rocati iti wisaja quenarisejũare tũoĩa ñaña. Ito yicõri jeyaro mũa ñeñaro tũoĩarisere jidicãña.

6 Ito bajiro mũa yija bero masare masorocũ, Dios ĩ cõarũre ti jedirã yirãji masa jeyaro”, yigu yiguĩji sīgũ yucũ manojũ, yi ucayijũ Isaías, Juanre tũoĩa yugũ.

7 Jãjarã masa Juanre ĩna idé gu rotirã ejaja, ado bajiro yiyijũ Juan ĩnare: —Ñã rima iti juniro bajiro ñeñaro yirã ña mũa. Ado bajiro tũoĩaboja mũa: “Dios ĩ waja seniri rũmũ iti ejaroca manire waja senibiquiji Dios. Mani ñeñaro yirã ñabojarocati manire ti maicõri manire waja senibiquiji ĩ”, yi tũoĩaboja mũa, yiyijũ Juan masare.

8 Ñeñaro mũa yirise jidicãcõri quenarise riti tũoĩa ñaña mũa. Ito bajiro riti yisotiba, “Quenarisejũa tũoĩarã ñama ĩja”, masa mũare yi ti masitoni. Ado bajiro yi tũoĩabesa mũa. “Abraham ñayorũ janerãbatia ña guama. Ito bajiri Dios ĩ beseana ña gua cũni”, yi tũoĩabesa mũa. Ado bajiro baja. Adi gũtana Abraham janerãbatia robo bajiro ĩ godo weo ãmoja, godo weo masiguĩji Dios, yiyijũ Juan ĩnare.

9 Ito yicõri ado bajiro goti masiore ocana gotiyijũ Juan:

—Comeana yucũre quẽarocũ ñacãmi Dios. Ito bajiri yucũ queno rica manigũre ti bũjacõri quẽagũ yiguĩji Dios. Ito yicõri jeana soegũ yiguĩji ĩ. Ado bajiro yireoni ña iti. Masa ĩna ñeñaro yirise waja senirocũ ñacãmi Dios. Ito bajiri ĩna ñeñaro yirisere jidicãbeja ticõri ĩnare ruyuriogũ yiguĩji Dios. Ito yicõri jeame ãjurojũ cõagũ yiguĩji Dios ĩnare, yiyijũ Juan masare.

10 Ito bajiro ĩ yija tũocõri, masajũa ĩre ado bajiro seniĩayijarã:

—¿No bajiro gũa yire ãmoati Dios? yi seniĩayijarã ĩna Juanre.

11 ĩna ito bajiro yija cũdiyijũ Juan:

—No camisa jũaro rucogũ, gãji rucobicũre coro ĩsija quena. Ito yicõri no bare rucogũ, bojoro bũjarãre ĩsija quena, yiyijũ Juan ĩnare.

12 Ujarãre yiari waja seni ĩsiri masa cũni, Juanre idé gu rotirã ejayijarã. ĩre ado bajiro seniĩayijarã ĩna:

—Gũare riasogũ, ¿no bajiro gũa yire ãmoati Dios? yi seniĩayijarã ĩna Juanre.

13 —Baũ, ujarã mũare niyeru ãmi rotirocõti ãmiña. Ito yicõri, ujarã ĩna rotiro rēto busaro ãmibesa, yiyijũ Juan ĩnare.

14 Surara cũni ado bajiro ĩre seniĩayijarã:

—¿No bajiro gũa yire ãmoguĩjida Dios? yiyijarã ĩna Juanre. ĩna ito yija:

—Baũ, masare ĩna rucorise ĩmabesa. ĩnare rucõri ĩna rucorisere jeyaro ĩmabesa. ĩnare sēoro yicõri ĩna rucorisere ĩmabesa. Ito yicõri,

mua moare waja, ɟarã mware ïna waja yirocõti boca ãmiña. Mucana tudi ïnare seni uyabesa, yiyijũ Juan ïnare.

<sup>15</sup>Ito bajiro ï yija tuocõri, ado bajiro tuoïa usirioyjarã ïna: “Cristo, ɟDios ï cõaruti ñati ãni?” yi tuoïayjarã ïna. <sup>16</sup>Ito bajiro ïna yibojarocati ado bajiro yiyijũ Juan ïnare:

—Cristo meje ña yũ. Idenati masare idé gua yuama. Yũ bero rëtoro ñasagu ejagu yiguĩji. Yũ rëtoro ñasagu ï ñajare ïre bajiro rëtoro ñasagu meje ña yũ. ïre mua tuorũnɟama Espiritu Santo mware queo sãgũ yiguĩji ïja. Ito bajiro mware Espiritu Santo queo sãcõri queno mware mua tuoïaroti ejabuagu yiguĩji ï, yiyijũ Juan ïnare.

<sup>17</sup>Ito yicõri gaje ado bajiro gotiyijũ Juan ïnare:

—Yũ bero ejagu trigo ajeri besegu bajiro yigu yiguĩji masare. Sigu trigo otegu iti wirori coda batecõri ajeri riti seo masiguĩji ï. Ito bajiro ï codaja bero iti wirorire jeameju soeguĩji ï. Jedirime meje ñaroja itime jeame. Wirori ï soegori ajeriana ï curoju seo cugũ yiguĩji ï. Ito bajiro yigu yiguĩji mani Uju adoju ejagu. Trigo ajeri beseado bajiroti besegu yiguĩji manire, yi gotiyijũ Juan masare.

<sup>18</sup>Ito bajiro ï gotiro watoti Dios oca quenarise masare gotiyijũ Juan, Diore ïna cuditoni. <sup>19</sup>Gajerea, Herodes ɟjare goti tudiyijũ Juan. ï ocabaji Felipe manajo Herodías wame cutigore Herodes ï manajo cutija, ito bajiro ïre goti tudiyijũ Juan. Gaje ï ñeñaro yirise masicõri ïre goti tudiyijũ Juan. <sup>20</sup>Ito bajiro ï busija tuobojaguti ïre tuorũnubisijũ Herodes. Ito yicõri buto busa ñeñaro yi ɟyagu Juanre tubia rotiyijũ ï.

### Jesure idé gure gaye (Mt 3.13-17; Mr 1.9-11)

<sup>21-22</sup>Co rumũ tubiara wijũ ïre ïna tubiaroto riojua, jãjarã masare idé guyijũ Juan. Ito yicõri Jesure cuni idé guyijũ Juan. ï idé guja bero Diore busiyijũ Jesús. Ito bajiro ï busi rügõroca umacũju macãrucũroju janayijũ. Ito yicõri bujare bajiro bajiguna queda sãja wadicõri Jesús joe queda jeayijũ Espiritu Santo. Ito bajiro ï queda jeaja bero ado bajiro oca ruyuyijũ umacũju:

—Yũ macũ ña mũ, yũ maigũ. Mure buto wanua yũ, yi busiyijũ Dios, Jesure busigu.

### Jesucristo rujearoto riojuaju gãna (Mt 1.1-17)

<sup>23</sup>Sigu masucõ gãji ye jua dujamocõ rodori tujagu, masare riasosuoijũ Jesús. “José macũ ñami Jesús”, yi tuoïayjarã masa. Iti riojua ado bajiro wame cutirã ñasuoijjarã masa. José jacũ ñayijũ Elí. <sup>24</sup>Elí jacũ ñayijũ Matat. Matat jacũ ñayijũ Leví. Leví jacũ ñayijũ Melqui. Melqui jacũ ñayijũ Jana. Jana jacũ ñayijũ José. <sup>25</sup>José jacũ ñayijũ Matatías. Matatías jacũ ñayijũ Amós. Amós jacũ ñayijũ Nahúm.

Nahúm jacu ñayiju Esli. Esli jacu ñayiju Nagai. <sup>26</sup>Nagai jacu ñayiju Maat. Maat jacu ñayiju Matatías. Matatías jacu ñayiju Semei. Semei jacu ñayiju Josec. Josec jacu ñayiju Judá. <sup>27</sup>Judá jacu ñayiju Joanán. Joanán jacu ñayiju Resa. Resa jacu ñayiju Zorobabel. Zorobabel jacu ñayiju Salatiel. Salatiel jacu ñayiju Neri. <sup>28</sup>Neri jacu ñayiju Melqui. Melqui jacu ñayiju Adi. Adi jacu ñayiju Cosam. Cosam jacu ñayiju Elmadam. Elmadam jacu ñayiju Er. <sup>29</sup>Er jacu ñayiju Josué. Josué jacu ñayiju Eliezer. Eliezer jacu ñayiju Jorim. Jorim jacu ñayiju Matat. <sup>30</sup>Matat jacu ñayiju Leví. Leví jacu ñayiju Simeón. Simeón jacu ñayiju Judá. Judá jacu ñayiju José. José jacu ñayiju Jonam. Jonam jacu ñayiju Eliaquim. <sup>31</sup>Eliaquim jacu ñayiju Melea. Melea jacu ñayiju Mena. Mena jacu ñayiju Matata. Matata jacu ñayiju Natán. <sup>32</sup>Natán jacu ñayiju David. David jacu ñayiju Isaí. Isaí jacu ñayiju Obed. Obed jacu ñayiju Booz. Booz jacu ñayiju Salmón. Salmón jacu ñayiju Naasón. <sup>33</sup>Naasón jacu ñayiju Aminadab. Aminadab jacu ñayiju Admin. Admin jacu ñayiju Arni. Arni jacu ñayiju Esrom. Esrom jacu ñayiju Fares. Fares jacu ñayiju Judá. <sup>34</sup>Judá jacu ñayiju Jacob. Jacob jacu ñayiju Isaac. Isaac jacu ñayiju Abraham. Abraham jacu ñayiju Taré. Taré jacu ñayiju Nacor. <sup>35</sup>Nacor jacu ñayiju Serug. Serug jacu ñayiju Ragau. Ragau jacu ñayiju Peleg. Peleg jacu ñayiju Heber. Heber jacu ñayiju Sala. <sup>36</sup>Sala jacu ñayiju Cainán. Cainán jacu ñayiju Arfaxad. Arfaxad jacu ñayiju Sem. Sem jacu ñayiju Noé. Noé jacu ñayiju Lamec. <sup>37</sup>Lamec jacu ñayiju Matusalén. Matusalén jacu ñayiju Enoc. Enoc jacu ñayiju Jared. Jared jacu ñayiju Mahalaleel. Mahalaleel jacu ñayiju Cainán. <sup>38</sup>Cainán jacu ñayiju Enós. Enós jacu ñayiju Set. Set jacu ñayiju Adán. Adánti ñayiju ija Dios rujeoru. Ito bajiri Dios macu ñayiju Adán.

### Rūmúa uju Jesure ĩ usirio codere gaye

(Mt 4.1-11; Mr 1.12-13)

**4** <sup>1</sup>Jesús ĩ idé gu ecoja bero Espírítu Santo ĩ rāca bũto ñayiju. Ito yicōri ríaca Jordán wame cūtirisa tu ĩ ñaroca, yucu manojũ ĩre āmi wayiju Espírítu Santo. <sup>2</sup>Yucu manojũ ejacōri jũarā masacō rũmuri ñayiju Jesús itojũ. Itojũ ĩ ñari rũmuri cōti, bare baticuti ñayiju Jesús. Itocō bero ñiocōyiju mũcana. ĩ ito bajiro ñiocō ñaroca, ñeñaro ĩ yitoni usirioro yi codeyiju rūmúa uju Jesure. <sup>3</sup>Ado bajiro ruoyiju rūmú ĩre:

—Riti Dios Macu mũ ñaja, adi gũtanati naju godo weogu yiguja mũ, yiyiju rūmú Jesure.

<sup>4</sup>Ito bajiro rūmú ĩre yibojarocati:

—Yíbea. Dios oca tuti ado bajiro gotia: “Najuna riti meje catirā yirāji masa. Jeyaro Dios ocana sũoriti queno wanũ quena ñarā yirāji masa”, yi gotia Dios oca tuti, yiyiju Jesús rūmúre.

<sup>5</sup>Ito bero cogu gũtagũ ũmaricu joeju āmi wayiju rūmú Jesure. Itojũ āmi ejacōri yoari mejeti adi macārucũro ñajediro ñari cūtorire ĩo jeocōyiju rūmú Jesure. <sup>6-7</sup>Ado bajiro goti ruoyiju rūmú itigu gũtagũ joeju ñacōri:

—Yũre rūcũbuogu yũ riojo rijomunigāna mũ ñini rūjũja adocō mũre ĩsicuja yũ. Adi macārucũro jeyaro ñarise, ito yicōri adi macārucũro ñarā

masa ñarocōti mure ñsicuja yu. Ito yicōri adi macārucāro ñajediro uju ñagū yiguja mu, yure mu rucubuoja, yiyiju rūmá Jesure ruogu.

<sup>8</sup> Ito bajiro ī gotibojarocati:

—Wasa Satanás mu, yiyiju Jesús rūmure. Ado bajiro gotia Dios oca tuti: “Mani Uju Diore riti rucubucōri cudija quena”, yi gotia Dios oca tuti, yiyiju Jesús rūmure.

<sup>9-11</sup> Ito yibojaroca riti Jerusalénju Jesure āmi wayiju rūmá mucana. Ito ejacōri mucana Dios ya wi joejua āmi muja wayiju rūmá. Ito ĩre āmi mja ejacōri ado bajiro yiyiju:

—Tuoja Jesús. Ado bajiro gotia Dios oca tuti:

Ángel mesare mure code rotigu yigūji Dios. Mu quedi waja gūtagā joeju quedi jeacōri mu ya gūbo jeabe yirona mure boca āmirā yirāji, yi gotia Dios oca tuti.

Riti Dios Macu mu ñaja adojuña bubu quedi wacu yiguja mu, yi ruoyiju rūmá Jesure.

<sup>12</sup> Ito bajiro ī yibojarocati ado bajirojua yiyiju Jesús ĩre:

—Mu ito bajiro yirisere cudibicuja yu. Gaje ado bajiro gotia Dios oca. Tite mu: “ ‘No bajiro Dios ī yija ticuja yu’, yirocu ĩre usirio codebesa”, yi gotia Dios oca tuti, yiyiju Jesús rūmure.

<sup>13</sup> Ito ī yija bero usirioro yire oca bujabisiju rūmá ĩja. Ito bajiri Jesure jabeto cunigoyiju rūmá.

### Galilea sitaju Jesús ī riasosuore gaye

(Mt 4.12-17; Mr 1.14-15)

<sup>14</sup> Galileaju tūdi wayiju Jesús mucana, yucu manojū ña ucugoru. Ito yicōri Espiritu Santo Jesús rāca ī ñajare buto ī tuoia masirise ñayiju Jesure ĩja. Galilea ī tūdi ejaroca masa jeyaro ī rētagorere busiyijarā ĩna. <sup>15</sup> Ito bajiro wa ucu ī tūdi ejaja bero judio masa ĩna minijuari wirijure riaso ucuyiju Jesús. Ito bajiro ī goti ucuja tuocōri, “Queno gotiami āni”, yi rucubuooyijarā masa jeyaro.

### Nazaretju Jesús ī ware gaye

(Mt 13.53-58; Mr 6.1-6)

<sup>16-17</sup> Ito yicōri ī bucūara cuto Nazaret wame cutiri cutoju wayiju Jesús. Ito ejacōri judio masa ĩna tujacāri rumu ñaroca ĩna minijuari wiriju sāja ucuyiju Jesús, ī yisotiado bajiroti. Ito ī sāja ejaroca Isaías ī ucagora jū ĩsiyijarā gājerā ĩre, ī ti gotitoni. Iti jū boca āmicōri ī gotiroti āmayiju Jesús. Ito bajiro āmacōri bujayiju. Ado bajiro gotiyiju iti:

<sup>18</sup> Espiritu Santo yu rāca ñami. Bojoro bujarāre oca quenarise yu gotitoni yure cūni Espiritu Santo. Ito yicōri ĩna ya usiju bojori bujarāre ĩna wanu quenaroca yu yitoni yure cūni ĩ. Tubia ecoanare yu bucōatoni yure cūni Espiritu Santo. Ñeñaro yirise jidicājaro ĩna yirocu, yure cūni Espiritu Santo. Ito bajiri cajea timenare cūni mucana ĩna tūdi

tiroca yirocure yure cūñi Espíritu Santo. Ito yicōri gājerā ñeñaro yi ecoana ña jidicāroca yirocure yure cūñi Espíritu Santo.

<sup>19</sup> Ito yicōri, “No ñre tuorūnugūre queno yirocu ñacāmi Dios”, yu yi gotitoni yure cūñi Espíritu Santo, yi gotia iti oca, yi gotiyijū Jesús ña minijuari wijū.

<sup>20</sup> Ito bajiro goti tīocōri papera tutire biayijū ī. Ito yicōri iti wi ejabuari masure iti tutire judacōayijū Jesús. Ito yicōri eja rūjūyijū. Ito bajiro ī yirise ticōri buto tiju wa rūjūcoayijarā ña. <sup>21</sup> Ito bajiro ña ti rujiroca mūcana ado bajiro busiyijū Jesús:

—Jane mejeju Isafas ī yure uca yure, adi rumū mua tiro riojo rēta yure, yiyijū Jesús ñnare.

<sup>22</sup> Ito bajiro Jesús oca quenarise ī gotija tuocōri, tuo ucayijarā ña. Ito yicōri masa jeyaro quenarise oca ñre busiyijarā ña. Ito bajiri ñnamasiti ado bajiro gāmeri seniñayijarā ña:

—¿José macu meje ñati āni? yi gāmeri seniñayijarā ña.

<sup>23</sup> Ito bajiro ña yija tuo masicōri ado bajiro yi cūdiyijū Jesús:

—Masa oca gotire robo bajiro yure yirā yirāji mūa: “Sīgū uco masu ī ñaja, ñmasiti yisio masiguīji”, yirā yirāji mūa yure. Ito yicōri gaje ado bajiro yure yirā yirāji mūa: “ ‘Capernaumju tiyamani űoyijū Jesús’, yire oca tuocu gūa. Ito bajiri ado mū cutoju cūni ito bajiroti mū ñore ti āmoa gūa”, yure yirā yirāji mūa, yiyijū Jesús ñnare.

<sup>24</sup> Ito bajiro yicōri ado bajirojūa yiyijū mūcana:

—Riti mūare gotia yū. Sīgū Diore goti ñsiri masu ī cutoti ī gotija ī ñarā ñre queno tuorūnūmenaji ña. Ito bajiri adi cuto gagu yū ñajare yure queno tuorūnūmenaji mūa, yiyijū Jesús ñnare. <sup>25-26</sup> Jane mejeju gāna Diore ña tuorūnūbitiado bajiroti queno tuorūnūbea mūa cūni. Tite. Sīgū Elías wame cutigu Diore goti ñsiri masu ī ñaroca űdia rodo gaje rodo gudarecocō ide quedibisijū. Ito bajiri iti cutorijū bare mañijū. Ito bajicōri buto ñiojogayijarā masa. Ito bajiro iti baji ñaroca Israel sitaju manūju godagoana romia jājarā ñayijarā. Ito bajibojarocati Diore masa ña tuorūnūbitire waja, ñnare ejabuatoni wa rotibisijū Dios Elíasre. Ado bajirojūa yiyijū Dios. Sidón wame cutiri cuto tu Sarepta gagō ñre tuorūnūgōre ejabuatoni wa rotiyijū Dios Elíasre, yiyijū Jesús. <sup>27</sup> Ito bero Eliseo wame cutigu Diore goti ñsiri masu ī ñaroca Israel sita gāna jājarā cami jogarā ñayijarā. Ito bajibojarocati Diore masa ña tuorūnūbitire waja, ñnare yisio rotibisijū Dios Eliseore. Ado bajirojūa yiyijū Dios. Sīgū Siria sita gagu Naamán wame cutigūre, yisio rotiyijū Dios, Eliseore, yi gotiyijū Jesús iti wi minijua ñarāre.

<sup>28</sup> Ito bajiro ī yija tuocōri, iti wi minijua ñarā buto junisinijarā ña.

<sup>29</sup> Turia gudareco ñayijū iti cuto. Ito bajiro ñre junisinicōri turia joeju Jesure āmi wayijarā ña. Ito ejacōri ñre tumicā queorona yibojayijarā ña.

<sup>30</sup> Ito yibojaroca riti ña wato ñabojaguti wa godacoayijū ī.

**Růmú sãñagũre růmũre Jesús ĩ bucõare gaye**  
(*Mr 1.21-28*)

<sup>31</sup>Ito bajiro ĩnare rudigocõri Capernaumju wayiju Jesús. Galilea sitaju ñayiju Capernaum wame cutiri cuto. Itoju ejacõri tujacãra rumũ ñaroca masa ĩna minijuari wiju sãjayiju Jesús. Ito sãjacõri masare riasoyiju ĩ. <sup>32</sup>Dios cũru ñari, queno masare riaso masiyiju Jesús. Ito bajiri ĩ busija tuocõri, tuo ucayijarã masa.

<sup>33</sup>Ito bajiro ĩ busi ñaroca, iti wiju sãgũ ĩ ya usiju růmú sãja ecorũ ñayiju. Ado bajiro Jesure seoro sãria busiyiju ĩ:

<sup>34</sup>—Wasa, Jesús Nazaret gagũ mũ. ¿No yija guare usirioro yati mũ? Guare ruyuriorocũ eja mũ, yiyiju růmú sãja ecorũ Jesure. Mũre ti masia yũ. Dios Macũ quenagũguti ñacõa mũ, yiyiju ĩ Jesure.

<sup>35</sup>Ito ĩ yija ado bajiro yi tudiyiju Jesús ĩre:

—Busibesa ĩja, yiyiju Jesús ĩre. Ito yicõri, Ñni ya usiju sãñagũ, budiya mũ, yiyiju Jesús růmũre.

Ito bajiro ĩ yirocati, masa jãjarã tiro riojo ĩre tumicãcũ, budicoayiju růmú ĩja. ĩ ito bajiro budigoja bero queno cati quenagũ tujayiju masũ ĩja. <sup>36</sup>Jesús ĩ ito bajiro růmũre ĩ budi rotija ticõri, mano ti ucayijarã ito ñarã. Iti ticõri ĩnamasiti gãmeri busiyijarã ĩna ĩja:

—¿Ñe gaye ñarõjada ĩ ito bajiro busija? Buto ĩ tuo masirisena růmũre budi rotiami ãni. Růmũare ĩ budi rotija cojisiti budicoama, yi gãmeri busiyijarã ĩna.

<sup>37</sup>Ito bajiro Jesús ĩ yirere tuocõri iti cuto tũ ñarã ĩna ñarocõti itire gãmeri busiyijarã ĩna.

**Pedro mañicõre Jesús ĩ yisiore gaye**  
(*Mt 8.14-15; Mr 1.29-31*)

<sup>38</sup>Jesús judio masa ĩna minijuari wiju ñaru budi wayiju ĩ. Ito yicõri Simón Pedro wame cutigu ya wiju wayiju. ĩ ya wi sãja ejacõri Simón mañicõ ruju yarise iso cõja tiyiju Jesús. Iso ito bajija ticõri, ito gãna isore yisioroti ãmorã josayijarã Jesure. <sup>39</sup>Iso tũju eja rũgũcõri ruju yarise rãta rotiyiju Jesús. Ito ĩ yirocati ruju yarise rãtaoayiju isore ĩja. Ito bajiro iti rãtarocati masare eca bocasũoyijo iso.

**Jãjarã ñarise cutirãre Jesús ĩ yisiore gaye**  
(*Mt 8.16-17; Mr 1.32-34*)

<sup>40</sup>Ito bajiro ĩ rãtaja tuocõri, ũmacañi ĩ quedi sãgũ wagu yiroca cõrãre ãmi minijuayijarã ĩna Jesús tũju ĩnare ĩ yisiotoni. Ricati riti cõrã ñayijarã ĩna. ĩna ito bajija ticõri, ĩ ya ãmona moa jeoyiju Jesús. Ito bajiro ĩ yirocati rãtaoayiju. <sup>41</sup>Ito yicõri jãjarã růmũa sãja ecoanare cuni růmũare budi rotiyiju Jesús. Ito bajiro ĩ yirocati budirãti awasãyijarã růmũa ĩja.

—Dios Macũguti ña mũ, yi awasãyijarã růmũa, budi warã. “Cristo Dios ĩ cõaru ñami”, ĩna yija ti masicõri, “Busibesa”, yi tudiyiju Jesús růmũare.

**Minijuara wiju Jesús i riasore gaye**  
(Mr 1.35-39)

<sup>42</sup>Gaje rumu busuri cuto tunima sōjuaju wayiju Jesús. Ito bajiro i wagoja bero ire amayijarā masa ija. Ito bajiro ire amarā riti i narōju ire bujacōyijarā ina. Ire bujacōri gaje cutoju ire wa rotibitibojayijarā ina.

<sup>43</sup>Ito bajiro ina wa rotibitibojarocati ado bajiro yiyiju Jesús inare:

—Gaje cūtori gānare cūni, “Ire tuorūnurāre i rotiroju miojugu yigūiji Dios”, yire oca goti ucuruja yare. Ito bajiro yu goti ucutoni yare cūni Dios, yiyiju Jesús inare.

<sup>44</sup>Ito i yija bero Galilea sitaju judio masa ina minijuari wiriju Dios oca goti ucuyiju Jesús ija.

**Wai jājarā ina sīaroca Jesús i yire gaye**  
(Mt 4.18-22; Mr 1.16-20)

**5** <sup>1</sup>Co rumu Genesaret wame cutirita tunima Jesús i naroca jājarā masa ejayijarā. Dios oca i gotija buto tuo amocōri i taju ejayijarā ina. Jājarā nacōri buto bidiro nayijarā. Ito bajiri rūgōraju mañiju Jesure. <sup>2</sup>Ito bajiro ire rūgōraju maniroca itajura tunima juaga cuma iti jayaja tiyiju Jesús. Iti cuma ujarā wai jori masa nayijarā. Ito tu ina ya yori yucuri coerā yiyijarā ina. <sup>3</sup>Iti cuma jayaja ticōri, itiga cumaju sājayiju Jesús. Ito yicōri nuro rotiyiju Jesús itiga cumare. Itiga cuma Simón yaga nayiju. Iti cumaju rujicōri masare Dios oca riasoyiju Jesús. <sup>4</sup>Riaso tiocōri ado bajiro gotiyiju Jesús Simónre:

—Ucaroju wija wato mani. Itoju mua ya yori yucurina wai nūma mua, yiyiju Jesús Simónre.

<sup>5</sup>Ito i yija tuocōri, ado bajiro cūdiyiju i:

—Guare riasogu, namiasaro wai jobojobu gua, siabiju. Ito bajibojarocati mu rotiro bajiroti, yorigu nūcūja yu, yiyiju Simón Jesure.

<sup>6</sup>Ito yicōri ina yorigu nuroca, jājarā wai sājayijarā ija. Ito bajiri ina ya yorigu cudusoyiju ija. <sup>7</sup>Ito bajiro ina wai naja ticōri, gaje cuma ina baba mesa nari cumare amo buye nūcayijarā, ina ejabatoni. Ito bajiro ina jija ticōri, ejayijarā ina. Ito ejacōri jājarā wai bujayijarā ina. Iti cuma ju cumari curisere dajocōyijarā. Jabeto ruyaboyiju iti rujaroto. <sup>8</sup>Ito bajiro wai jājarā bujacōri Jesús riojo rijomunigāna nini rūjūyiju Simón Pedro. Ito yicōri ado bajiro yiyiju:

—Yu ũju buto ñeñaro yi jaigu ña yu. Queno yigu ña muāma. Ito bajiri yu tu mu naja quenbetoja, yiyiju Simón Jesure.

<sup>9</sup>Simón ito yicōri i rāca gāna cūni wai jājarā ina naja ticōri, ti ucayijarā ina. <sup>10</sup>Gaje cuma narā cūni ti ucacoyijarā ina. Ina nayijarā Zebedeo rīa. Santiago, Juan wame cutirā nayijarā ina. Ina ti ucaja ticōri, Simónre ado bajiro yiyiju Jesús:

—Gūibesa. Wai joreti ña mua ya moare. Ito bajibojarocati jane gaje muare moare cūa yu. Masa Diore ina masitoni oca riaso ucuri masa muare cūa yu adocāta, yiyiju Jesús, Simón mesare.



11 Ito ï yija bero tunimaju jaja wayijarã mucana. Ito yicõri jeyaro ïna moabojarisere jidicãcõri Jesús rãca wayijarã ïna ïja.

### **Rujũ cami jogagũre Jesús ï yisiore gaye**

*(Mt 8.1-4; Mr 1.40-45)*

12 Co rumũ Jesús gaje cuto ï ña ucuroca sũgũ ï ya rujũ cami jogagu ñayiju. Jesure ti bujacõri ï riojo ñini rũjũcõri ïre josayiju:

—Yũ Uju, yũre mu yisio ãmoja, yisioģuģa mu, yiyiju cami jogagu Jesure.

13 Ito ï yija tuocõri, ï ya ãmona moa jeoyiju Jesús ïre. Ito yicõri ado bajiro yiyiju ïre:

—Ãmoa yũ. Mũre yisioa yũ, yiyiju Jesús.

Ito ï yirocati ï ya cami yaticoayiju ïja. 14 Ito bajiro ïre yisiocõri, gãjerãre goti bato rotibisiju Jesús. Ito yicõri ado bajiro yiyiju ïre:

—Riojoti pai tuju wasa mu. ï tuju ejacõri mu ya rujũ cami yatirise gaye ïoma. Ito yicõri Moisés ñayoru ï rotiado bajiroti Diore waibucũ soe ïsi rotiba. Ito mu yija ticõri, “ï ya cami yati jedicoaju ïja”, yi masirã yirãji masa mũre, yiyiju Jesús ïre.

15 Ito bajiro, “Goti batobeja”, ï yibojarocati cojisiti oca tũjacoayiju cami jogagũre Jesús ï yisiore gaye. Ito bajija tuocõri, jãjarã Jesús tuju minijuayijarã, ï busija tuo ãmorã. Ito yicõri ïna cõrisere yisio roti ãmorã ejayijarã ïna. 16 Masa jãjarã ïna ñajare coji meje masa manõju ï Jacũ Diore busirocũ wayiju Jesús.

### **Rudurũre Jesús ï yisiore gaye**

*(Mt 9.1-8; Mr 2.1-12)*

17 Co rumũ Jesús ï riasoroca fariseo gaye tuoïarã ito yicõri judio masa rotirise riasori masa cuni tuo rujiyijarã ïna. Ado bajiro wame cutiri cutori wadiana ñayijarã ïna. Galilea sita gãna, Judea sita gãna ito yicõri Jerusalén wame cutiri cuto gãna wadiana ñayijarã ïna. Masa tiro riojo cõrãre Jesús ï yisiotoni ï masirise jidicãyiju Dios. 18 Ito bajiro ï yi ñaroca juariarã ãmũa rudurũre ãmi ejayijarã ïna, ï ya camana. Ito ejacõri Jesús tuju sãja wacõri ïre cũ ãmoboayijarã ïna. 19 Ito bajibojarocati masa jãjarã ïna ñajare no bajiro sãja masia mañiju ïnare. Ito bajija ticõri, wi tutu joeju rudurũre ãmi muja wayijarã ïna. ãmi muja ejacõri Jesús rũgõro weca soje cudayijarã ïna. Ito yicõri rudurũre ï ya camana jidi rujiyijarã ïna Jesús tu. 20 Ito bajiro ïna yija ticõri, ado bajiro tuoïayiju Jesús: “Yũre tuorũnũsacõama ïna”, yi tuoïayiju Jesús. Ito bajiro tuoïacõri:

—Mũ ñeñaro yirisere ãcabojocõa yũ, yiyiju Jesús rudurũre.

21 Ito bajiro ï yija tuocõri, fariseo gaye tuoïarã ito yicõri judio masa rotirise riasori masa cuni ado bajiro tuoïayijarã ïna: “ãni ito bajiro ï busija, Diore ñeñaro yigu yami ï. Dios meje ñami ï. Dios sũgũti ñami masa ïna ñeñaro yirisere ãcaboja masigũ”, yi tuoïayijarã ïna.

22 Ito bajiro ïna tuoïarisere ïmasiti tuoïa masicõyiju Jesús. Ito bajiri ado bajiro yiyiju ï ïnare:

—¿No yija ito bajiro t̄uoĩati m̄ua? yiyij̄u Jesús ĩnare. <sup>23</sup>M̄ua tija, ¿No bajiro rudur̄ure ȳu yija quenati? Ito yic̄ori, ¿disej̄ua ñati josasabiti m̄ua tija? “M̄u ñeñaro yirisere coecoaj̄u”, ¿ȳu yija quena ñarojada? “W̄um̄uña, wasa”, ¿ȳu yija quena ñarojada, m̄ua t̄uoĩaja? ¿Disej̄ua ñati josasabiti, m̄ua tija? <sup>24</sup>Masa R̄ijor̄u, Dios ĩ c̄oar̄u ña ȳu. Ito bajiri, “Masa ĩna ñeñaro yirise coe masiami Jesús”, m̄ua yi masitoni m̄ua tiro riojo ãnire yisioḡu ya ȳu, yiyij̄u ĩ ĩnare.

Ito yic̄ori rudur̄ujuare ado bajiro yiyij̄u:

—W̄um̄uña, ya ȳu m̄ure. M̄u ya cama ãmiña, ito yic̄ori m̄u ya wij̄u t̄udi wasa, yiyij̄u Jesús rudur̄ure.

<sup>25</sup>Ito bajiro ĩ yiroc̄ati masa jājar̄ã ĩna tiro riojo w̄um̄uyij̄u rudur̄u. Ito yi, ĩ ya cama ãmi, budi wayij̄u ĩ. Ito yic̄ori Diore r̄uc̄ub̄uo busi wayij̄u ĩ, ĩ ya wij̄u t̄udi wac̄u. <sup>26</sup>Ito ĩ yija tic̄ori, ti w̄cayijar̄ã masa. Ito bajiri Diore r̄uc̄ub̄uo busiyijar̄ã ĩna. Güire r̄aca ado bajiro yiyijar̄ã ĩna:

—Adi r̄um̄u tiyamani tia mani, yiyijar̄ã ĩna.

### Levíre Jesús ĩ jire gaye

(Mt 9.9-13; Mr 2.13-17)

<sup>27</sup>Ito bajiro masare ĩ yi ĩo ñaja bero budiyij̄u Jesús m̄ucana. Ito bajiro budi wac̄ori w̄jar̄are yiari waja seni ĩsiri masure tiyij̄u Jesús. ĩ ñayij̄u Leví wame cutiḡu. Waja ĩ seni ñarij̄u rujiyij̄u ĩ. ĩre ti bujac̄ori:

—Ȳu r̄aca waya, yiyij̄u Jesús ĩre.

<sup>28</sup>Ito ĩ yija t̄uoc̄ori, ĩ moabojarisere jidic̄ayij̄u Leví, Jesús r̄aca wa ãmoḡu.

<sup>29</sup>Ito bero ĩ r̄aca wa, Leví ya wi ejayijar̄ã ĩna. Itoju ejac̄ori Jesure basa jeo buaroc̄u basa meniyij̄u Leví. Ito bajiro ĩna basa meni ñaroca jājar̄ã w̄jar̄are yiari waja seni ĩsiri masa ñayijar̄ã ĩna. Ito yic̄ori ḡajer̄ã c̄uni, jājar̄ã ĩna r̄aca ba rujiyijar̄ã ĩna. <sup>30</sup>Ito bajiro ĩna ba rujija tic̄ori, judio masa rotirise riasori masa ito yic̄ori fariseo gaye t̄uoĩar̄ã c̄uni, Jesús r̄aca riasotir̄are ado bajiro busituyijar̄ã:

—¿No yija w̄jar̄are yiari waja seni ĩsiri masa r̄aca, ito yic̄ori ñeñaro yi jair̄ã r̄aca baba cuti bati m̄ua? yi busituyijar̄ã ĩna Jesús r̄aca riasotir̄are.

<sup>31</sup>Ito bajiro ĩna yija t̄uoc̄ori, ado bajiro c̄udiyij̄u Jesús:

—Ado bajiroj̄ua bajia. Queno cati quenar̄ã, c̄omena w̄co yiri masure jimenaji. Ito yic̄ori buto c̄or̄aj̄ua w̄co yiri masure jir̄aji. <sup>32</sup>Queno yir̄are yiari meje wadib̄u ȳu. Ñeñaro yi jair̄ajuare yiari wadib̄u ȳu. Ito yic̄ori quenarise ĩna t̄uoĩa wasoatoni wadib̄u ȳu, yiyij̄u Jesús ĩnare.

### Bamenati Diore r̄uc̄ub̄uore gaye

(Mt 9.14-17; Mr 2.18-22)

<sup>33</sup>Ito ĩ yija ado bajiro seniñayijar̄ã ĩna Jesure:

—Juan r̄aca riasotir̄ã coji meje bamena riti Diore r̄uc̄ub̄uor̄ã ĩre senisotiam̄a ĩna. Ito bajiroti bajiam̄a fariseo gaye t̄uoĩar̄ã r̄aca riasotir̄ã c̄uni. M̄u r̄aca

riasotirãma ñnare bajiro yibeama ñna. Bũcũrã rotire queno cũdibeama ñna. Ito yicõri, “Diore busiana”, yirona bare jidicãbeama ñna, yi tudiyjarã ñna Jesure.

<sup>34</sup> Ñna ito yija tũocõri, ñnare ado bajiro cũdiyijũ Jesũs:

—Sĩgũ, ñ amo siari rumũ ñ baba mesa ñ rãca ñna wanũ baroca, “Babesa”, yi masimenaji gãjerã. <sup>35</sup> Ito bajibojarocati co rumũ gãjerã ñre ñniagoja ticõri, bojori bũjarã yirãji ñ baba mesa. Ito bajiri ñre tũoĩarã bamenaji ñna, yiyijũ Jesũs masare.

<sup>36</sup> Ito yicõri gaje ado bajiro goti masiore ocana ñnare gotiyijũ Jesũs:

—Sĩgõ saya bũcũro sere wõroco mamarore tabecõji. Ito bajiro mamaro tagoja mamaro cũni ñeñacoaroja. Ito yicõri bũcũrore mamaro iso sere wõbojaja bũcũro bajiro corocõ ejabetoja. <sup>37</sup> Uyé ide mani menija mama bajuju jiosãrã yirãji mani. Bũcũ baju mani jiosãjama, ñigãcoaro yiroja. Ito yicõri iti baju cũni goda, uyé ide cũni goda bajiro yiroja. <sup>38</sup> Ito bajiri uyé ide menicõri mama bajuri jiosãrã yirãji mani. Ito yicõri iti baju cũni, uyé ide cũni godabetoja. <sup>39</sup> Mani uyé ide bũcũ idiĩacõri mame idi ãmomenaji mani. “Bũcũjũna queno sũti quena”, yicõri mamere idi ãmomenaji mani. Ito bajiroti baja mame oca yũ riasoja cũni. Bũcũrã oca tũorũnrã ñacõri mame oca yũ riasoja tũo ãmobeama, yiyijũ Jesũs ñnare.

### Jesũs rãca riasotirã trigo ajeri beja ãmicõri ñna bare gaye

(Mt 12.1-8; Mr 2.23-28)

**6** <sup>1</sup> Co rumũ tujacãra rumũ ñaroca, ñ rãca riasotirã rãca trigo wesejũ eja wayijũ Jesũs. Itoju ejacõri ñtire beja ãmiyijarã ñ rãca riasotirã. Ito yicõri wirorire sigũe bategocõri bayijarã ñna. <sup>2</sup> Ito bajiro ñna baja tiyijarã fariseo gaye tũoĩarã coriarã. Ito bajiro ñna baja ticõri, ñnare seniĩayijarã fariseo gaye tũoĩarã:

—¿No yija tujacãra rumũ ñnabojarocati moati mũa? Tujacãra rumũ moare ma, yiyijarã ñna.

<sup>3</sup> Ñna ito yija tũocõri, ado bajiro cũdiyijũ Jesũs:

—Co rumũ David ñayorũ ñ baba mesa rãca ñiojogacõri ñna yigore, ¿Dios oca tutijũ tibiticati mũa? <sup>4</sup> Ado bajiro yiyijũ David ñayorũ. Dios ya wijũ sãjacõri, Diore paia naju ñna cũ ñsirere ãmicõri bayijũ David. Ito yicõri ñ baba mesare cũni ecayijũ ñ. Paia riti ñna baroti ñabojayijũ iti naju. Ito bajibojarocati bũto ñiojogacõri bayijũ David ñ baba mesa rãca. ñtire ñna baja tibojagũti, “Ñeñaro yama ñna”, yibisijũ Dios ñnare, yiyijũ Jesũs ñnare.

<sup>5</sup> Gaje ado bajiro gotiyijũ Jesũs ñnare:

—Masa Rĩjorũ, Dios ñ cũrũ ñna yũ. Ito bajiri tujacãra rumũ gaye yũ rotiroti cũni cũquĩ Dios yũre, yiyijũ Jesũs fariseo gaye tũoĩarãre.

### Ãmo digarũre Jesũs ñ yisiore gaye

(Mt 12.9-14; Mr 3.1-6)

<sup>6</sup> Gaje tujacãra rumũ ñaroca judio masa ñna minijuari wijũ sãjayijũ Jesũs. Ito yicõri ñnare riasoyijũ ñ. Ito bajiro ñ riaso ñaroca sĩgũ ñ ñna ãmo riojocadũja digarũ ñnayijũ. <sup>7</sup> Ito yicõri fariseo gaye tũoĩarã, judio masa rotirise riasori

masa cuni ti rujiyjarã ñna. Jesure ticõri ado bajiro tuoïa rujiyjarã ñna: “Jane tujacãra rumu ñabobarocati, ¿ãni ãmo digarure yisioḡu yiguũjida Jesús?” yi ti rujiyjarã ñna. “Ito bajiro ï yija, ‘Seti ña ñre. Ñeñaro yami’, yirã yirãji mani”, yi tuoïa rujiyjarã ñna. <sup>8</sup>Ito bajiro ñnamasi ñna tuoïabobarocati tuoïa masicõyijũ Jesús, ï masirisena. Ito yicõri ãmo digarure ado bajiro yiyijũ Jesús:

—Wumuña, waya ado yu tũju, yiyijũ Jesús ãmo digarure.

Ï ito yija ãmo digaru Jesús tũju wacõri eja rũḡũyijũ. <sup>9</sup>Ito bajiro ï eja rũḡũroca ado bajiro yiyijũ Jesús, ito ñarãre:

—Mũare seniãḡũ ya yu. ¿No bajiro manire cũyijari Dios tujacãra rumu mani yiroti? ¿Quenarise, ñeñarise ito yicõri cõrãre mani yisoroti, gaje mani yisiobeja, disejua quenati? yiyijũ Jesús ñnare.

<sup>10</sup>Ito bajiro busi tĩḡũ ïti wi ñarãre ti jeocõyijũ Jesús. Ito yicõri ãmo digarure ado bajiro yiyijũ ï:

—Mu ya ãmo ñu joya, yiyijũ Jesús ñre.

Ito bajiro Jesús ï yirocati, ï ya ãmo ñu joyijũ ï. Ito bajiro ï yirocati ï ya ãmo quenacoayijũ ïja. <sup>11</sup>Ito bajiro ï yija ticõri, fariseo gaye tuoïarã ito yicõri judio masa rotirise riasori masa cuni buto ti junisiniyjarã ñna Jesure. Ito yicõri ñnamasiti gãmeri seniãyijarã: “¿No bajiro yirũjati mani Jesure?” yiyijarã ñna.

### **Jua ḡubojeno apóstol mesare Jesús ï besere gaye**

*(Mt 10.1-4; Mr 3.13-19)*

<sup>12</sup>Iti rumuriti turia joeju maja wayijũ Jesús, Diore busirocu. Itoju ñacõri ñamiasaro Diore busisotiyijũ Jesús. <sup>13</sup>Ito yicõri ùmacañi joejea muja wadiroca ï rãca riasotirãre jiyijũ Jesús. Ito yicõri ñna ejaroca jua ḡubojeno ñarã ùmũare beseyijũ ï. Ito yicõri ï oca ñna goti ucutoni ñnare cũyijũ Jesús. <sup>14</sup>Ado bajiro wame cutirã ñayijarã ñna: Sĩḡũ ñayijũ jua wame, wame cutiḡu, Simón Pedro. Ï ocabaji ñayijũ Andrés wame cutiḡu. Ito yicõri ḡãjerã ñayijarã Santiago, Juan, Felipe, Bartolomé, <sup>15</sup>Mateo, Tomás, Alfeo macu Santiago ḡãji ñayijũ Simón celote gaye tuoïagoru. <sup>16</sup>Ito yicõri Santiago macu ñayijũ Judas wame cutiḡu. ḡãji Judas Iscariote wame cutiḡu ñayijũ. Ï ñayijũ Jesure ḡãjerã ñna ñiatoni gotirocu. Ito bajiro wame cutirã ñayijarã ñna, Jesús ï oca ñna goti ucutoni ï cũana.

### **Jãjarã masare Jesús ï riasore gaye**

*(Mt 4.23-25)*

<sup>17</sup>Ito bajiro ñnare bese tĩocõri ñna rãca roja wayijũ Jesús. Roja wa, turia judoju tujayijarã ñna. Itoju jãjarã ñayijarã Judea sita ḡãna, Jerusalén ḡãna, ito yicõri itajura tu ñari cutori Tiro, Sidón wame cutiri cutori ḡãna cuni ñayijarã. Iti cutori ḡãna ejayijarã Jesure tuo ãmorã. Ito yicõri jãjarã cõrã yisio roti ãmorã ejayijarã ñna. <sup>18</sup>Rũmúa sãja ecoanare cuni rũmũare budi rotiyijũ Jesús, ito bajiro ñna ejaja ticõri. <sup>19</sup>Cõrãre cuni ï masirisena rẽtoyijũ Jesús. Ito bajiro masare ï rẽtoja ticõri, masa jeyaro ñre moaïa ãmoyijarã, ñna cõrise rẽtatoni.

**Mani wanu quenaroca yiroti gaye**

(Mt 5.1-12)

20 Ito ina yi naroca, i rāca riasotirāre busi āmogū inare tiyiju Jesús: —Adocāta bojoro bujarā ņa mua maji. Bojoro bujarā ņabojarāti, ija Dios i rotiroju ejaçōri, i rucorise bujarā yirāji mua. Ito yicōri wanu quenarā yirāji mua.

21 Adocāta ņiojogarā ņa mua maji. ņiojogarā ņabojarāti ija queno yaji quenaro wanu narā yirāji mua.

Adocāta bojori buja, oti narā ya mua. Ito bajibojarocati ija queno wanucōri aja quenarā narā yirāji mua.

22 Yu Masa Rijorure, mua queno cūdija ticōri, gājerā muare ti tudirā yirāji ina. Ito yicōri muare cōa āmorā yirāji ina. “Ñeñaro yirā ņama”, yirā yirāji muare busiturā. Ito bajiro muare ina busitubojarocati, ija wanu quenarā yirāji mua. 23 Jane mejeju cūni ina ņicūsabatiaju cūni ito bajiroti Diore goti isiri masare ñeñaro yiyijarā ina. Ito bajiro muare ina ñeñaro yibojarocati queno wanu quenaña mua. Ija ūmacūju ejaçōri Dios taju quenarise bujarā yirāji mua. Ire tuorūnu judicābitiana mua ņajare, ito bajiro yigu yiguiji Dios muare.

24 Mua gajeoni jairā, ado mua ņajama queno wanu quena ņaboja mua. Diore tuorūnumena ņari ija bojoro bujarā yirāji mua.

25 Mua queno yaji quenarā, ņaja wanu quenare rāca ņaboja mua. Diore tuorūnumena ņari ija ņiojogarā yirāji mua.

Mua ajare jairā, adocāta mua ajaja queno wanu quenaboja mua. Diore tuorūnumena ņari ija buto tuoia bojori bujacōri, otirā yirāji mua.

26 Adocāta “Queno yirā ņa mua”, yi masa muare ina rucubwoja tuocōri, queno wanu quenaboja mua. Ito bajiroti jane mejeju cūni ruore oca riasori masare queno rucubwo busibojayijarā ina. Diore tuorūnumena ņari ija buto tuoia bojori bujarā yirāji mua, yiyiju Jesús inare.

**Mani wajanare cūni ti maija quena, yi Jesús i riasore gaye**

(Mt 5.38-48; 7.12)

27 Ito yicōri mucana inare busi remoyiju Jesús:

—Mua yure tuorūnurāreama, ado bajiro gotia yu: Mua wajanare queno ti maiña. Ito yicōri muare ti tudirāre queno yiya. 28 Muare busiturāre cūni, quenaro busiya mua. Ito yicōri muare ñeñaro yirāre yiari Diore seni isisotiya. 29 Sigū riojocaduja wayugaju i jaja, mucana gaje daja i ja āmoja reobeja. Ito yicōri gāji camisa juaro mua sñaroca, joegadore i ruaja, ito roca gadore i rua āmoja, cūni reobeja. I seniro rēto busaro isija quena.

30 Ito yicōri no mua rucorise ina senija, ina seniro bajiroti isima. Ito yicōri sigū mua rucorise i emaja, “Itire judacōaña”, yi josabeja. 31 Gājerā muare queno yire mua āmoja, ito bajiroti inare queno yiba mua cūni.

32 Manire mairāre riti mani maija, mani rāca queno wanubiquiji Dios. Ñeñaro yirā cūni ito bajiroti inare mairāre mairāji. Manire maimena ņabojarocati

maniamā ñnare maija quena. <sup>33</sup>Manire queno yirãre riti mani queno yija, mani rãca queno wanũbiquĩji Dios. Ñeñaro yirã cuni ito bajiroti ñnare queno yirãre queno yirã yirãji. Manire queno yimena ñnabojarocati maniamā ñnare queno yija quena. <sup>34</sup>Gãjire wasoagu, “Ija mũcana jai busaro bujagu yigũja yu”, mani yi tuoñaja, mani rãca queno wanũbiquĩji Dios. Ñeñaro yirã cuni ito bajiro tuoñacõri wasoarã yirãji. Manire wasoamena ñnabojarocati maniamā ñnare wasoaja quena. <sup>35</sup>Ito bajibojarocati mũama, mũa wajanare mairũja. Ito yicõri ñnare queno yija. Ito yicõri gãjire wasoagu, “Ija jai busaro bujagu yigũja yu”, yi tuoñabicuti wasoaja quena. Ito bajiro mũa queno yija, Dios tũju mũa ejaroca mũare queno waja yigu yiguĩji. Ito bajiro mũa queno yirã ñaja, Dios rã ña mũa. Dios cuni masa jeyarore queno yigu ñami. “Queno ya mũ”, yimenare cuni, ñeñaro yi jairãre cuni queno yigu ñami Dios. <sup>36</sup>Mani Jacu masare ï ti mairo bajiroti mũa cuni masare ti maija quena, yiyiju Jesús ï rãca riasotirãre.

### Gãjerãre seti yibesa, yi Jesús ï riasore gaye

(Mt 7.1-5)

<sup>37</sup>Gaje ado bajiro gotiyiju Jesús ñnare:

—Gãjerãre, “Ïna ñama ñeñarise yi jairã”, mũa yibeja mũare cuni, “Ïna ñama ñeñarise yi jairã”, yibiquĩji Dios mũare. Ito yicõri gãjerãre, “Ïnare seti ña. Ito bajiri ñnare ruyuriogu yiguĩji Dios”, mũa yibeja mũare cuni, “Ïnare seti ña. Ñnare ruyuriocũja yu”, yibiquĩji Dios mũare. Gãjerã ñeñaro yirise mũa ãcabojoja, mũa ñeñaro yirisere cuni ãcabojoju yiguĩji Dios. <sup>38</sup>Gãjerãre mũa ïsija, mũare cuni queno ïsigũ yiguĩji Dios. Gãjerãre mũa ïsiro bajiroti, mũare cuni ïsigũ yiguĩji Dios. Ito yicõri gãjerãre mũa ïsiro bajiroti rãto busaro mũa boca ãmi masirocõ ïsigũ yiguĩji Dios, yiyiju Jesús ñnare.

<sup>39</sup>Ito yicõri ado bajiro goti masiore ocana gotiyiju Jesús:

—¿Sigũ cajea macure ito yicõri gãji cajea macu mũcana, cajea macure tũa wa masiguĩjida? Meje, ito bajiroju meje bajia. Cajea tibicu ñari ïre tũa wabojagu rãcati gojeju quedi sãjacõarãji ña. Dios oca riojo ñnarisere mani tuo suyabeja cajea mana robo bajiro bajirãji mani, yiyiju Jesús ñnare.

<sup>40</sup>Ïnare riasori masu rãto busaro masirã meje ñama ï riasorã. Ito bajibojarocati ñna queno riasoti jeocõja, ñnare riasori masu bajiroti masirãji ñna cuni, yiyiju Jesús.

<sup>41</sup>Iti oca goti tiõcõri mũcana ado bajiro gaje oca gotiyiju Jesús:

—Mũa babare cajeaju sũjuriacã iti ñaja, ti buja masia mũa. Ito bajibojarocati mũa ya cajeaju sita jaje iti sãña biaja ti buja masibea mũa. <sup>42</sup>Ado bajiro mũa babare yiboja mũa: “Yu baba mu ya cajeaju sita aje ña. Yu iti ajere ãmicãcũja yu”, yibojarãti mũa ya cajeaju sita jaje iti sãñajama, ãmicã masibea mũa. “Queno yirã ña guama”, yirã ñnabojarãti, ñeñaro yirã ña mũa cuni. Mũa ya cajeaju sãñarisere ãmicãña. Itire ãmicãcõri queno ti masirã yirãji mũa. Ito yicõri mũa babare cajeaju sita ajere ãmicã masirã yirãji mũa, yiyiju Jesús.

Ïti yireoni ña, mani baba ï ñeñaro yija ti masibojarãti, manimasiti ñeñaro yirisereama ti masibea mani, yiyiju Jesús.

**Ricana suori yucugure ti masia mani, yi Jesús i riasore gaye**

*(Mt 7.17-20; 12.34-35)*

<sup>43</sup>Ito yicōri mucana ñare goti masiore ocana gotiyijū Jesús:

—Yucugū queno wanuricu, ñeñarise rica cutibetoja. Ito yicōri yucugū ñeñaricu, quenarise rica cutibetoja. <sup>44</sup>Iti yucu ricare ticōri, “Itigu rica ña adi”, yi ti masia mani. Jotagujū higos rica mani ãmaja bujamenaji mani. Ito yicōri yusigure uyé mani ãmabojaja, bujamenaji mani. <sup>45</sup>Ito bajiro queno usi cutigu, gãjerãre cuni queno yiguñi i. Ito yicōri ñeñaro usi cutigu, gãjerãre cuni ñeñaro yigu yiguñi i. Mani ya usijū mani tuoïaro bajiroti busibua mani, yiyijū Jesús ñare.

**Yure queno tuorũnurã sita butirojū wi menirã bajiro bajarã ñama,**

**yi Jesús i riasore gaye**

*(Mt 7.24-27)*

<sup>46</sup>Gaje ado bajiro yiyijū Jesús i rãca riasotirãre: —“Gua Ujū ña mu”, yibojarãti, yu rotirisere cudibea mu. <sup>47-48</sup>No yu tujū ejarã yu rotirisere ña cudija, sigũ queno butirojū wi menigũ bajiro bajarã ñama ña. Tite. Sigũ butirojū jubejū i botari juja, jue iti buto sëoro ejaja jujabetoja iti wi. Ito bajiro bajarã ñama yure queno cudirã. Gãjerã ñare ñeñaro yi josabojarocati yure tuorũnu jidicãmenaji ña. <sup>49</sup>Ito bajibojarocati, no yu rotirise queno cudimena, ñare bajiro bajibeama ña. Sigũ sita jidirojū wi menigũ bajiro bajarã ñama ñama. Tite. Sigũ sita jidirojū i botari juja, jue iti buto sëoro ejaja iti wi jujacoaro yiroja. Ito bajiri tũdi ruyubetoja i ya wi ija. Ito bajiro bajarã ñama yure queno cudimena. Gãjerã ñare ñeñaro yija ticōri, yure jidicãrã yirãji, yiyijū Jesús i rãca riasotirãre.

**Surara ujū ya moari masure Jesús i yisioire gaye**

*(Mt 8.5-13)*

**7** <sup>1</sup>Masare i riaso ãmorise riaso ticōri Capernaumjū wayijū Jesús. <sup>2</sup>Iti cuto ñayijū surara ujū. Ñre moa ñsiri masu buto cōyijū. Ito bajiri usi jedi waruti ñayijū i. Ito i bajija ticōri, buto ñre ti maiyijū surara ujū. <sup>3</sup>Ito bajiri Jesús cõrãre i yisioire gaye tuocōri, judio masa bucũrãre, Jesure ji rotiyijū i. Ñ ya moari masure Jesús i yisioire ãmoyijū i. <sup>4</sup>Ito i yija tuocōri, Jesure jirã wayijarã ña. Jesús tujū ejacōri ado bajiro ñre seniia josayijarã:

—“Ñre jitẽña”, guare yi ñucagũ, queno yigū ñami i. Ito bajiri ñre ejabũarujā mu. <sup>5</sup>Romano masu ñabojaguti mani ñarãre queno rũcũbuoami i. Ito yicōri minijuara wi gua meni masitoni guare niyeru ñisiquĩ i. Ito bajiri ñre ejabũarujā mu, yi josayijarã ña Jesure.

<sup>6</sup>Ña ito yija tuocōri, ña rãca sũya wayijū Jesús. Ito wi ejarã wana ña yiroca surara ujū i baba mesare Jesure oca goti boca rotiyijū. “Ado bajiro Jesure gotiba”, yi roticõayijū i:

—Yu ʘju mure usirioro yi remo amobeá yu. Rētoro quenagũ ña mu. Yujua quenagũ meje ña. Ito bajiri, yu ñeñaro yirisere bojogu, “Yu ya wiju sája waya, yi masibeá yu mure”, yi gotiba ire, yi roticōayiju surara ʘju.

<sup>7</sup>Gaje ado bajiro yi roticōayiju i:

—Ñeñaro yigu ñari, mu tujū wa masibeá yu. Mu masirisena mu yisio ñucaja, yu ya moari masu caticoagu yiguĩji macana. <sup>8</sup>Gāji ʘju bero gagu ña yu. Ito yicōri yu berojua ñama gājerā surara. Īnare roti masia yu. Ito bajiri sīgũre, “Wasa”, yu yija, wami. Ito yicōri gājire, “Wayá”, yu yija, wiamami. Ito yicōri yure moa ĩsiri masure yu moa rotija, moami. Ito bajiri rētoro queno roti masigũ mu ñajare, “Mu yisio ñucaja, yu ya moari masu tujacoagu yiguĩji macana”, yi t̄oĩa yu, yi gotiba Jesure, yi roticōayiju surara ʘju.

<sup>9</sup>Ito i yi ñucare t̄ocōri, t̄o ucayiju Jesús. Ito yicōri juda r̄ugũcōri ire s̄uyarāre ado bajiro yiyiju Jesús:

—Ī surara ʘju yure queno t̄or̄ũññi. Mani masa wato ire bajiro t̄or̄ũññrā mama, yi gotiyiju Jesús ĩnare.

<sup>10</sup>Ito i yija t̄ocōri, t̄uđi was̄oyijarā oca goti bocari masa. T̄uđi ejaçōri ĩna tija ñarise cōbojaru tujaru ñayiju i ĩja.

#### Wajeago macure Jesús i masore gaye

<sup>11</sup>Ito bajiro i yija bero Naín wame cutiri cutoju wayiju Jesús, i rāca riasotirā rāca. Ito yicōri masa jājarā wayijarā i rāca. <sup>12</sup>Iti cutoju ĩna ejaroca sīgũ godarure ĩna yujerā waja tiyiju Jesús. Wajeago macu ñayiju i, ĩna yujerocu. Ito yicōri i sīgũti ñabojayiju iso macu. Jājarā iti cuto gāna ire yujerona wayijarā ĩna. <sup>13</sup>Wajeago iso bojori bujaja ticōri, buto ti maiyiju Jesús isore. Ito bajiro ti maicōri ado bajiro yiyiju Jesús isore:

—Otibesa, yiyiju i.

<sup>14</sup>Ito bajiro i yija bero i ya masari cumaju moaīayiju Jesús. Ito bajiro i yija ticōri, ire yujerā wabojarā tuja r̄ugũcoayijarā ĩna ĩja. Ito bajiro ĩna tuja r̄ugũroca godarure ado bajiro yiyiju Jesús:

—W̄um̄ña mam̄ mu, yiyiju Jesús godarure.

<sup>15</sup>Ito bajiro i yirocati, jāja r̄j̄ȳȳiju godaru ñabojaguti. Ito bajiro bajiru ñabojaguti busiyiju macana. Ito i bajija ticōri, ado bajiro yiyiju Jesús i jacore: “Īmo, āni ñami mu macu”, yiyiju Jesús isore. <sup>16</sup>Ito bajiro i yi masoja ticōri, ti güyijarā ĩna, ito ñarā. Ito yicōri ado bajiro Diore r̄uc̄b̄uo busiyijarā ĩna:

—Sīgũ Diore goti ĩsiri masu mani tujū ejami ĩja, yiyijarā ĩna.

Gaje ado bajiro busiyijarā ĩna:

—Dios ñarā mani ñajare manire ejabuarocu ejami adoju, yi wan̄rā r̄uc̄b̄uoayijarā ĩna Diore.

<sup>17</sup>Ito yicōri Jesús godarure i masore gaye t̄o jedicoayijarā Judea sita gāna. Ito yicōri iti sita tu gāna c̄uni t̄o jedicoayijarā ĩna.



**“Jesure titēña”, Juan idé guri masu i yi ñucare gaye**  
(Mt 11.2-19)

18 Juan rāca riasotiri masa, Jesús i yigore ticōri goti jeocōyijarā ñna Juanre. Ñna ito yija tucōri, jūarāre jiyijū Juan. 19 Ito bajiri ñna jūarāre, “Ado bajiro Jesure seniñama mña”, yi ñucayijū Juan ñnare: “¿Riti Dios i cōarū, Cristo ñnati mu? Í meje mu ñajama, ¿gājire bocatirā yirājida gña maji? yiba”, yi roti ñucayijū Juan ñna jūarāre. 20 Ito i yija tucōri, wayijarā ñna. Jesús tujū ejacōri ado bajiro ñre yi gotiyijarā ñna:

—Juan, masare idé guri masu, gñare seniña roti ñucami mñre. ¿Riti, Dios i cōarū, Cristo ñnati mu? Í meje mu ñajama, ¿gājire bocatirā yirājida gña maji? yiyijarā ñna Jesure.

21 Ito bajiro ñna seniña ñaroca, jājarā masa cōrāre yisioyijū Jesús. Ito yicōri ñna ya usijū rēmúa sāja ecoana, cajea mana, ito yicōri gājerā jeyaro ñarise cōrāre cñni masoyijū Jesús. Ito bajiro i yija Juan oca i seniña roti ñucana cñni tiyijarā ñna. 22 Ito yicōri ado bajiro Juan i cōanare gotiyijū Jesús:

—Wasa. Mña tirise ito yicōri mña tuogorise cñni Juanre gotiba. Cajea mana ñna tiroca yñ yirise, ruduana ñna waroca yñ yirise, wiro joganare yñ yisiorise gaye, gāmo goje tuomena ñna tuoroca yñ yirise, godana ñabojarocati ñna catiroca yñ yirise, ito yicōri bojoro bñjarāre Dios i masoroti oca yñ goti masorisere cñni, gotiba Juanre. 23 Ito yicōri, no yñre tuorñnusatiguti, queno wanugū yiguñji i, yiyijū Jesús, Juan i oca seniña roti ñucanare.

24 Ito i yija tucōri, tñdi wayijarā ñna. Ito bajiro ñna tñdi waja bero, Juan i bajigore gaye masare gotiyijū Jesús:

—¿Yucu manojū warā, ñimñre tuoña wacati mña? ¿Sīgū ñmugū mino iti waja, ñe rñgōgñre tuoña wacatite mña? yi seniñayijū Jesús masare. Yucugū cogū mino wñaja wñrericu bajiro meje ñami Juan. Queno tuoñagū ñami i. 25 ¿Ñre mña ti bñjaja yutabuju quenarise sññagū ñnacati i? Yutabuju quenarise sññarā bajiro bajigū meje ñami i. Yutabuju quenarise sññarā ñjarā ya wijū ñarāona ñarāji ñna. Ñna robo bajigū meje ñaguñji Juan. 26 Yucu manojū warā, ¿Diore goti ñsiri masure tirā wasotiri mña? Itoju ejacōri, “Diore goti ñsiri masu ñami”, yi masiyija mña. Riti ña, gājerā Diore goti ñsiri masa rētoro ñnasagū ñami Juan. 27 Jane mejeju Juanre ado bajiro yi goti yucāyija Dios oca:

Mñ waroto riojña sigū masu cōa yñ. Masa mñre bocati ñaroca, yirocñre cōa yñ, yi gotia Dios oca tuti, yiyijū Jesús.

28 ‘Sīgū adi tutijū, Juan masare idé guri masu rētoro ñnasagū mami. Ito bajibojarocati Dios i rotirojū ñarā Juan i ñasado bajiro rēto busaro ñnasarā yirāji ñna, yiyijū Jesús ñnare.

29 Juan Dios oca i gotija tuogoana, “Riti, Dios rotirise quenarise ña. Itire cñdi ñmoa gña”, yicōri, Juanre idé gu rotiyijarā ñna. Ito yicōri ñjarāre yiari waja seni ñsiri masa cñni, ito bajiroti yiyijarā ñna. 30 Ito bajibojarocati

fariseo gaye tuoïarāma ito yicōri judio masa rotirise riasori masama, Dios rotiriserre te ñayijarā. Ito bajiri Juanre idé gu rotibisijarā ña.

31-32 Gaje ado bajiro gotiyijū Jesús:

—Adi rumuri gāna Juanre teama, ito yicōri yure cuni teama ña. Rīaca minijuacōri ña awasā aje cūñaro bajiro bajirā ñama ñaōna. Tite. Ado bajiro awasā ajeama rīaca: “Gua seru juti ajeroa, muama juti āmobijū. Ito yicōri masa godaroca ña otirise gua oti queso aje āmoja, muama gua rāca oti queso aje āmobijū”, yi awasā ajeama rīaca. Ito bajiro bajiamā Juanre terā ito yicōri yure terā cuni. Tite. 33 Babcuti Diore rūcūbuogu seniquí Juan. Ito yicōri uyé ide idibitiquí ī. Ito bajiro ī yija ticōri, “Rūmá sāja ecorū ñami”, yicū muā ire. 34 Ī bero yū, Masa Rijorū, ejacu. Ba, idi yigū ña yuama. Yū ito bajiro yija ticōri, ado bajiro ya muā yure: “Jairo bagū ña mū. Idire cūgū ña mū. Ñeñaro yi jairā rāca baba cutigū ña mū. Ito yicōri ujarāre yiarī waja seni isiri masa rāca baba cutigū ña mū”, ya muā yure. 35 Sigū Dios robo bajiro queno tuoïare cutigū ī ñaja, jeyaro ī yiriserre ticōri, “Ī ñami Dios robo bajiro tuoïare cutigū”, yi tuoïa manī. Ito bajiri yū yiriserre ticōri, “Dios robo bajiro tuoïare cutigū ñami”, yi masi ñarā yirāji muā yure, yiyijū Jesús ñare.

### Simón fariseo gaye tuoïagū ya wijū Jesús ī ñare gaye

36 Ito ī yija bero sigū fariseo gaye tuoïagū Jesure jiyijū ī ya wijū, bagū watoni. Ito ī yija tuocōri, ī ya wijū wayijū Jesús. Iti wijū sājacōri bara mesa tūju eja rūjūyijū Jesús. 37 Ito bajiro ī bagū waja tuocōri, iti cuto gago sigō wedi maso ī tūju wayijo iso. Itoju waco queno sutirise úye, coga dajaro āmi wayijo iso. Itiga ñayijū gūta alabastro wame cutiriserre ña meniraga. 38 Ito Jesús tūju sāja ejacōri ī ya gūbo tūju eja rūjūyijū iso. Ito yicōri iso ya yago idena Jesús ya gūbore coesuoyijo iso. Ī ya gūbore coe tīocōri iso ya joanati Jesús ya gūbore weja caroyijo iso. Ito yicōri ire wanugō ī ya gūbore usuyijo iso. Gajanoa ito bero úye queno sutirise ī ya gūboju tuyijo iso. 39 Iso ito yija ticōri, Jesure jigorū fariseo gaye tuoïagū ado bajiro tuoïayijū: “Riti Diore goti isiri masū ī ñajama, adio ī ya gūbo coegore ti masiborū. Ito yicōri, ‘Wedi maso ñamo’, yi masiborū ī”, yi tuoïayijū fariseo gaye tuoïagū Jesure jirū. 40 Fariseo gaye tuoïagū ī tuoïariserre tuo masicōri, ado bajiro yiyijū Jesús ire:

—Simón, mure jabeto goti āmoa yū, yiyijū Jesús ire.

—Baū, gotiya yure riasogu mū, yiyijū Simón Jesure.

41 Ito ī yija tuocōri, ado bajiro goti masiore ocana gotiyijū Jesús ire:

—Jūarā ūmūa ñayijarā, niyeru wasoari masure waja ruyuriorā. Sigū quinientos niyeru cūjiri waja ruyuriyijū. Ito yicōri gāji cincuenta niyeru cūjiri waja ruyuriyijū. 42 Ito bajibojarocati ña waja ruyuriogure waja yi masibisijarā ña. Ito bajiro ña waja ruyuriobjarocati ñare niyeru wasogorū tūdi seni uyabisijū īja, yi gotiyijū Jesús Simónre.

Gaje ado bajiro Simónre seniīayijū Jesús:

—¿Nijūa buto busa ñare niyeru wasogorure mairājida ña? yi seniīayijū Jesús Simónre.

43 Ito bajiro ï seniñaja, tuocõri:

—Yu tija, jai busaro waja ruyuriogujua ïre buto maiguñji, yiyijũ Simón. Ito ï yija tuocõri:

—Riti ya mũ, yiyijũ Jesús ïre.

44 Ito yicõri ïre gũbo coegojuare ticõri, busiyijũ Jesús Simónre:

—Adiore tiya. Mũ ya wijũ yũ sãjaroca yũre ide ïsibijũ mũ, yũ ya gũbo coeroti. Ito bajibojarocati adiojuama iso ya yago idenati yũ ya gũbore coemo iso. Ito yicõri iso ya joanati yũre weja caromo iso. 45 Yũre wanũgũ, yũre usubijũ mũ. Ito bajibojarocati adioama, yũre wanũgõ queno gũbojũ usumo iso.

46 Ito yicõri yũ ya rijogajũ éye tubijũ mũ. Ito bajibojarocati adioama éye queno sutirise yũ ya gũbojũ tumo iso. 47 Ito bajiri ado bajiro mũre gotia Simón yũ: Ñeñaro yi jaigo ñabojarocati, yũre buto iso maija ticõri, iso ñeñaro yirisere ãcabojoa yũ. Sīgũ jabetacã busa ñeñaro yigure, ïre yũ ãcabojaja, jabetacã busa yũre maigũ yiguñji ï. Ito yicõri buto ñeñaro yigure yũ ï ñeñaro yirisere ãcabojaja buto busa yũre ti maigũ yiguñji ï. Iti tuo masiña, yiyijũ Jesús Simónre.

48 Ito yicõri romiore ado bajiro yiyijũ Jesús:

—Mũ ñeñaro yirisere ãcabojacõa yũ, yiyijũ Jesús isore.

49 Ito ï yija tuocõri, gãjerã iti wijũ ïna rãca bari masa, ïnamasiti gãmeri seniñayijarã ïna:

—¿Ñimũ ñati ãni, masa ïna ñeñaro yirisere ãcabojagu? yi gãmeri seniñayijarã ïna.

50 Ito bajiro ïna yiroca, romiore ado bajiro gotiyijũ Jesús:

—Yũre queno tuorũnũa mũ. Ito bajiri mũre masorocũ mũ ñeñaro yirisere ãcabojocõa yũ. Ʋsirioro yibecoti wasa mũ, yiyijũ Jesús isore.

### Jesure romia ïna ejabũare gaye

**8** 1 Ito yija bero gaje cutorijũ Dios oca goti ucugũ wayijũ Jesús. “Ïre tuorũnũrãre ï rotirojũ miojugũ yiguñji Dios”, yire gaye goti ucugũ wayijũ ï. Ito yicõri ï rãca riasotirã, jua gũbojeno ñarã rãca wayijũ ï. 2 Romia cuni ïna rãca wayijarã. ïna ñayijarã ïna ya usijũ rũmũa sãja ecoanare Jesús ï bucõagoana. Ito yicõri ñarise cõana ï masogoana cuni wayijarã ïna rãca. Sīgõ María Magdalena wame cutigo ïna rãca wayijo. Iso ñayijo jua ãmojeno rũmũa ñarãre Jesús ï bucõagoro. 3 Ito yicõri gajeo Juana wame cutigo ñayijo. Iso ñayijo Cuza manojõ. Herodes ya moari masa Ʋju ñayijũ Cuza. Ito yicõri gajeo Susana wame cutigo ñayijo. Ito yicõri gãjerã cuni jãjarã Jesús rãca romia wayijarã ïna. ïna ejabũa masiro bajiro ejabuayijarã ïna.

### Oteri masũ gaye Jesús ï goti masiore oca

(Mt 13.1-9; Mr 4.1-9)

4 Ito bajiro Jesús ï wa ucuroca co cutõ gãña meje ï tu minijuayijarã, ïre ti ãmorã. Ito bajiro ïna ejaja ticõri, goti masiore ocana gotiyijũ Jesús ïnare:

5—Sīgũ weseca ï ya ote ajeri otegũ wayijũ ï. Wesecajũ ejacõri, iti ajerire ï wējabateroca gaje ajeri majũ quedi queayijũ. Ito bajiro quedi quearisere gājerã itire cudabia rojocõyijarã. Ito yicõri minia cũni bayijarã, iti ajerire. 6Gaje ajeri gũta watojũ quedi queayijũ. Iti gũta wato quedi queara ajeri nocõ mejeti judibojayijũ. Ito bajibojarocati yoari mejeti siniaocoyijũ sita iti ide manijare. 7Gaje ajeri jota watojũ quedi sãja wayijũ. Ito quedi sãjacõri, iti judi mũa waroca jota mari dũrea śacõyijũ itire. 8Ito yicõri gaje ajeri sita quenarise joejũ quedi queayijũ. Ito bajiri iti ajeri judi bucũacõri quenarise rica cõtuyijũ. Ito yicõri coria sarari cien ñari ajeri rica cõtuyijũ, yiyijũ Jesús ñnare.

Ito bajiro iti goti tiõcõri mucana ado bajiro yiyijũ Jesús ñnare:

—No gãmo goje cõtirã tũoya, yiyijũ Jesús oca sũoro ñnare.

**¿No yija goti masiore ocana riasoati mũ? ñna yi seniĩare gaye**

*(Mt 13.10-17; Mr 4.10-12)*

9Ito ï yija tũocõri, ado bajiro ñre seniĩayijarã ï rãca riasotiri masa:

—¿Ñe yireoni ñati iti goti masiore oca? yiyijarã ñna.

10 Ñna ito yija:

—“No ñre tũorũnrã ï rotirojũ miojugũ yigũiji Dios”, yi gãjerã ñna tũo masibiti gaye mũa tũo masiroca yami Dios mũareama. Gãjerãma iti oca tũobojarãti queno tũo masimenaji ñna. Ito bajiroti yi gotiyijarã Diore goti ñsiri masa. Tite mũa. “Tũobojarãti, tũo masimenaji ñna. Ito yicõri tibojarãti, ti masimenaji ñna”, yi goticãyijarã jane mejejũ, yiyijũ Jesús ñnare.

**Ado bajiro bajia oteri masũ ye, yi Jesús ï goti quenore gaye**

*(Mt 13.18-23; Mr 4.13-20)*

11 Ito yicõri mucana tũdi riasoyijũ Jesús ñnare:

—“Oteri masũ sigũ ado bajiro bajiyijũ”, yirocũ mũare gotibũ yũ. Ito bajiri adocãta mũare goti rētobugũ ya yũ, mũa queno tũo masitoni. Oteri masũ, Dios oca goti ucuri masũ robo bajigũ ñami ï. Ito yicõri ï oteri ajerioniti ña Dios oca mani tũorise. Tite mũa. Ado bajirojũa bajia iti oca. 12 Coriarã masa Dios ocare tũorãji tũorea. Ito bajibojarocati ñna ãcabojaroca yigũ yigũiji rũmũ. Ito bajiri Diore tũorũnũmenaji ñna. Ito bajiri ñre ñna tũorũnũbejare ñnare masobiquĩji Dios. Dios ocare ñna ãcabojaja, majũ ote ajeri quedi queado bajiro bajirã yirãji ñnaõna. 13 Gãjerãma Dios ocare tũocõri queno wanũ quenare rãca boca ãmirãji ñna. Ito bajibojarocati ñnare oca ñaja, ito yicõri gãjerã ñnare ti teja, Diore tũorũnũmenaji ñna. Ito yicõri nocõ mejeti ï oca ñna tũobojarere jidicãrã yirãji ñna. Ito bajiro ñna yija, gũta wato quedi queara ajeri bajiro queno ñe mari mana robo bajirã yirãji ñnaõna. 14 Gãjerãma Dios ocare tũobojarãti adi macãrũcũro gayere bũto tũoĩarã yirãji ñna. Ito bajiro tũoĩacõri adi macãrũcũro ñeñarise gajeonire cũni jidicã ãmomenaji ñna. Ito bajiro ñna jidicã ãmobeja jota mari wato ote ajeri quedi queado bajiro bajirã yirãji ñnaõna. Ñna ñama Diore queno

moa ñsimena. <sup>15</sup>Gãjerãma Dios oca t̄uocõri, ñre queno t̄uor̄ñnũrã yirãji ñna. Ito bajiro ñre queno t̄uor̄ñnũrã ñnari ñre jidicãmenaji ñna. Ito yicõri ñ ãmoro bajiro yirã yirãji ñna. Ito bajiro ñna yija sita quenarise joejũ ote ajeri quedu queado bajiro bajirã yirãji ñnaõna. Ñna ñnama Diore queno moa ñsirã, yiyijũ Jesús ñnare.

**Ado bajiro bajia s̄iabusuoraga, yi Jesús ñ riasore gaye**

*(Mr 4.21-25)*

<sup>16</sup>Mũcana t̄udi goti masiore ocana gotiyijũ Jesús:

—Mujura jã ñiãcõri riri sotũ rocajũ mucũmenaji mani. Ito yicõri gaje mujura jã ñiãcõri canira casabo rocajũare s̄ia cũmenaji mani. Ado bajirojũa yirãji mani. Mujura jã ñiãsuara tutujũ s̄iãsuarã yirãji mani. Ito bajiro mani s̄iãsuaja, masa s̄ãja wadirã ti masirã yirãji ñna. <sup>17</sup>Ado bajirojũa bajia iti yireoni. Masa ñna t̄uo masibitire ija t̄uo masicoarã yirãji ñna. Ito yicõri yeyoro masa ñna t̄uoñabojarisere masa jeyaro masicõrã yirãji ñna, yiyijũ Jesús.

<sup>18</sup>Queno t̄uoya mũa, yũ gotirisere. S̄igũ Diore queno t̄uor̄ñnũgũre buto bũsa Dios oca ñ t̄uo masiroca yigũ yigũiji Dios. Ito bajibojarocati gãjiama Diore queno t̄uor̄ñnũbicũ ñ ñajare Dios oca ñ masibojarisere ñ ãcabojaroca yigũ yigũiji Dios, yiyijũ Jesús ñ rãca riasotirãre.

**Jesús ñ ñarã ado bajiro bajiama, yire gaye**

*(Mt 12.46-50; Mr 3.31-35)*

<sup>19</sup>Ito ñ yija bero ñ jaco, ñ ocabajirã ñre ti ãmorã ejabojayijarã ñna. Jãjarã masa ñna ñajare ñ t̄ujũ eja masia mañijũ ñnare. <sup>20</sup>Ito bajiro ñna bajia ticõri, s̄igũ ado bajiro Jesure gotiyijũ:

—Mũ jaco, mũ ocabajirã mũre tirã wadiana macũjũ ñnama, yi gotiyijũ ñ Jesure.

<sup>21</sup>Ito ñ yija t̄uocõri, ado bajiro ñre c̄udiyijũ Jesús:

—No Dios oca t̄uorãti, ito yicõri itire c̄udirãti, ñna ñnama yũ jaco robo, yũ ocabajirã robo bajiro bajirã, yiyijũ Jesús.

**Minore, jacũrisere c̄uni Jesús ñ r̄etore gaye**

*(Mt 8.23-27; Mr 4.35-41)*

<sup>22</sup>Co r̄umũ Jesús ñ rãca riasotirã rãca cumajũ s̄ajayijũ. Ito yicõri ado bajiro yiyijũ:

—Ita, sidũjajũ wea j̄ea wato, yiyijũ Jesús ñ rãca riasotirãre.

Ito ñ yija t̄uocõri, gaje dũjajũ j̄ea wayijarã ñna. <sup>23</sup>Ito bajiro j̄ea wacũjũ, canicoayijũ Jesús. Ñ canigoja bero buto mino w̄eayijũ. Ito yicõri itira itajura buto jacũyijũ. Iti jacũrise cumajũ jairo ruja s̄ajayijũ. Ito bajiri jabeto r̄ũyabojayijũ cuma iti rujaroto. <sup>24</sup>Ito bajija ticõri, buto gũiyijarã ñ rãca riasotiri masa. Ito bajiri Jesure yujioyijarã ñna. Ado bajiro yi yujioyijarã ñna Jesure:

—Jesús, gũare riasogũ, yujiya mũ. Canibesa. Rujarã ya mani, yiyijarã ñna Jesure.

Ĩna ito yija t̄ocōri, yujiyij̄u Jesús. Ito yicōri jacūrisere ado bajiro yiyij̄u Jesús: “Itocōti jacūña. Mino c̄uni itocōti wēaña”, ĩ yirocati, r̄etacoayij̄u ĩja. <sup>25</sup>Mino iti r̄etaja bero ado bajiro ĩnare seniĭayij̄u ĩ ĩja:

—¿Ñe r̄etati, yure t̄uorūnubeati mua? yiyij̄u Jesús ĩnare.

Ito bajiro iti r̄etaja, mano ti ũcayijarā ĩna, ĩ r̄aca riasotiri masa. Ito yicōri ĩnamasiti ado bajiro gāmeri busiyijarā ĩna:

—¿Ñimūdcū ñati āni? ĩ busirocati mino c̄uni r̄etacoaj̄u. Jacūrise c̄uni t̄ujacoaj̄u, yi gāmeri busiyijarā ĩna.

### Gerasa gagu rūmú s̄āñagū oca

(Mt 8.28-34; Mr 5.1-20)

<sup>26</sup>Gaje d̄uja Galilea wame cutiri d̄ujaj̄u ñana j̄ēa wa, Gerasa wame cutiri sitaj̄u ejayijarā ĩna. <sup>27-29</sup>Cumana j̄ēa war̄u j̄ēa ejacōri maja wayij̄u Jesús. Ito bajiro waroca s̄īgū iti c̄uto gagu rūmúa s̄āja ecor̄u bocayij̄u Jesure. ĩ ũmugū yoari yutabuju s̄āñare mejeti ña ucuyij̄u ĩ. Ito yicōri wij̄u ña masibisij̄u ĩ. Ito bajiri gūta gojerij̄u ñayij̄u ĩ ñaro. Iti gūta gojeri ñayij̄u masa ĩna yujerise. Itoju ñasotiyij̄u rūmúa s̄āja ecor̄u, ĩ ñaro.

Ito ĩ ñaroca coji meje rūmúa s̄ajayijarā ĩre. Ito yicōri ḡajerā ito gāna coji meje ĩ ya āmori ĩ ya gubori c̄uni come mana ĩre siasotibojayijarā ĩna. Ito bajiro ĩna siabojarocati, b̄uto tunu ruacōsotiyij̄u ĩ. Ito yicōri ĩ ya ũsij̄u ñarā rūmúa yucu manoj̄u wa rotiyijarā ĩre. Ito bajiro yucu manoj̄u waca yiguj̄u



(San Lucas 8.25)

Jesure bocayijũ ĩ. ĩre bocacõri Jesũs riojo ñini rũjũyijũ rũmũa sãja ecorũ. Ito yicõri buto awasãyijũ ĩ. Ito bajiro ĩ yija ticõri, ĩ ya usijũ ñarã rũmũare budi rotiyijũ Jesũs. ĩ budi rotija tuocõri, ado bajiro Jesure seniãayijarã ĩna rũmũa:

—¿Mũ ũmacũju gagũ Dios Macũ, guare no bajiro yigũ yigũjada mũ?

Buto ñeñaro gua tõbujaroca yibesa, yiyijarã rũmũa Jesure.

<sup>30</sup>Ĩna ito bajiro josaja tuocõri, ado bajiro seniãayijũ Jesũs ĩnare:

—¿Ñimũ wame cutiati mũ? yiyijũ Jesũs.

Ito bajiro ĩ seniãaja tuocõri:

—Legiõn wame cutigu ña yũ, yiyijũ rũmũ.

Jãjarã yireoni ña Legiõn. Ito bajiri ito bajiro wame cutiyijũ ĩ rũmũ.

Jãjarã rũmũa ñayijarã ĩ ũmugũre.

<sup>31</sup>Ĩna rũmũa Jesure ado bajiro yi seniãayijarã:

—“Sõju wasa”, yibesa guare, yiyijarã rũmũa Jesure.

<sup>32</sup>Ito yiroca turia joeju jãjarã ecana yesea ba rũgõ ucuyijarã. Ito bajiro bajija ticõri, Jesure buto seni josayijarã ĩna:

—Yeseare gua sãjatoni guare sãja rotiya mũ, yiyijarã rũmũa Jesure.

Ĩna ito yija tuocõri:

—Baũ, yeseare sãjaña mũa, yiyijũ Jesũs ĩnare. <sup>33</sup>Ito ĩ yija tuocõri, masũ ya usijũ sãñabojana budi jedicoayijarã, yeseare sãjarona. Ito yicõri yesea rũmũa sãja ecocõri buto sẽoro ũmaquedi wayijarã ĩna. Ito bajiro buto ũmaquedi jati wacõri, turia joejuna bubu jati waca yirãju, itajuraju quedi roa goda jedicoayijarã yesea.

<sup>34</sup>Iti ito bajiro rõtaja ticõri, yeseare coderi masa ũmaquedi wayijarã cutorijũ goti ucurona. Iti ito bajiro rõtatorere jaibiti cuto cuni, jaja cuto cuni goti ucuyijarã ĩna. <sup>35</sup>Ito bajiro ĩna gotija tuocõri, “Ita mani cuni. Tito”, yiyijarã gãjerã. Ito yicõri Jesũs tũju ejacõri rũmũa sãja ecogorũre ti bujajijarã ĩna. Queno usi cutigu rujijijũ ĩ ĩja, Jesũs tũju. Ito yicõri yutabuju sãñaru ñayijũ ĩ ĩja. Ito bajiro ĩ bajija ticõri, ti ucacoayijarã ĩna. <sup>36</sup>Ĩ ito bajija ticõri:

—Rũmũa sãja ecorũ ñabojaru rũmũare budi rotiĩni Jesũs, yiyijarã ĩna.

<sup>37</sup>Itire tuocõri Gerasa gãna, ito yicõri ito tũ gãna cuni buto guicõri Jesure wa rotiyijarã ĩna. ĩna ito yija tuocõri, cumaju sãjayijũ Jesũs. <sup>38</sup>Ito bajiro cumaju ĩ sãjaroca rũmũa ĩ bucõagorũ, ado bajiro seni josayijũ Jesure:

—Yũ cuni mũ rãca wa ãmoa yũ, yi seniãayijũ ĩ. Ito bajiro ĩ yija tuocõri:

<sup>39</sup>—Mũ ya wiju tũdi wasa. Ito yicõri ado bajiro yi gotiba, “Jesũs yũ ya usijũ rũmũa sãñabojanare bucõacõqui”, yi gotiba mũ, yiyijũ Jesũs rũmũa ĩ bucõagorũre.

Ito ĩ yija tuocõri, cutorijũ wayijũ rũmũa budigorũ. Ito yicõri jeyaro ĩre rõtatorere goti ucuyijũ, Jesũs ĩ rotiado bajiroti.

### Jairo macore Jesũs ĩ yisiore gaye

(Mt 9.18-26; Mr 5.21-43)

<sup>40</sup>Ito bajiro ĩ yi ucuja bero, tũdi jẽa wayijũ Jesũs mũcana. Ito bajiro ĩ jẽa ejaroca wanũ quenare rãca ĩre boca ãmiãayijarã masa. <sup>41-42</sup>Ito bajiro ĩ jẽa ejaroca, ĩna masa jãjarã wato sũgũ judio masa ĩna minijuari wi uju Jairo wame

cutigu wadiyiju. Wadicōri Jesús riojo rijomunigāna ñini rŭjŭyiju Ī. Ī maco jua gubojeno rodori tujago ñayijo iso. Sīgōti ñayijo ĩ maco, ito yicōri buto cōyijo iso. Goda waroti ñayijo iso. Ito bajija ticōri, Jesure ĩ ya wiju ĩ watoni ĩre jigū ejayiju Jairo. Ito bajiro ĩ senija tuocōri, Jairo ya wiju wayiju Jesús.

Ito Jairo ya wi ĩ waroca masa jājarā ñayijarā. Ito bajiri masa jājarā gāni bia wayijarā ĩre.

<sup>43</sup>Ito yicōri ĩna masa rāca sīgō romia ñarise cōgō ñayijo. Jua gubojeno rodori cō tujayijo iso. Ito yicōri isore ũco yigoanare iso rŭcorise ñarocōti waja yi jeocōyijo iso. ĩna ito bajiro ũco yibojarocati rēta masibisiju isore. <sup>44</sup>Ito bajiro masa jājarā wato Jesús ya yutabuju gaja moaīayijo iso. Iso ito bajiro ĩ ya yutabujure moaīarocati iso ñarise cutibojarise rētacoayiju isore ĩja. <sup>45</sup>Ito bajiro ĩ ya yutabujure iso moaīaja tuo masicōri ado bajiro seniīayiju Jesús:

—¿Noa yu ya yutabujure moaīari? yi seniīayiju ĩ.

Ito bajiro ĩ seniīaja tuocōri: “Moaīabiju gua cuni”, yiyijarā ĩna ñarocōti Jesure. Ito bajiro ĩnare ĩ seniīaja bero, ado bajiro cūdiyiju Pedro:

—Guare riasogu, mu tujū masa jājarā ñama. Jājarā mure gāni bia wama. Ito yicōri jājarā mu ya yutabujure cōoama. No yigu ito yiri mu, “¿Ñimo yu ya yutabujure moaīari?” yibu mu, yiyiju Pedro Jesure.

<sup>46</sup>Ito yija Jesús ado bajiro yiyiju ĩnare:

—Sīgō yure moaīamo. Ito bajiro iso moaīaja, yu masirise rāca isore ñarise rētomu yu, yiyiju Jesús.

<sup>47</sup>Īre yutabuju moaīare ĩ masija tuocōri, buto gūiyijo iso. Ito yicōri iso ya rujū nŭrŭogōti Jesús riojo iso ya rijomunigāna ñini rŭjŭyijo iso. Ito yicōri masa jājarā ĩna tuoroca Jesure iso moaīagorere gotiyijo iso: “Ī ya yutabujure yu moaīajama, yu cōrise rētacoaro yiroja”, yi tuoācōri, mu ya yutabujure moaīamu yu. Ito yicōri yu moaīarocati yu rujū ñarise rētacoaju ĩja”, yi gotiyijo iso, masa ĩna tuoro riojo. <sup>48</sup>Iso ito yija tuocōri:

—Maco, tuoya mu. Yure mu tuorŭnŭrise mure yisiocōa. Ito bajiri wanu quenagō, cati quenagō wasa mu, yiyiju Jesús isore.

<sup>49</sup>Ito bajiro isore ĩ goti ñaroca Jairo ya wi ñarā ejayijarā Jairore gotirā:

—Mu maco godacoamo. Ito bajiri mŭcana tŭdi ũsirioro yibesa āni riasogure, yiyijarā ĩna Jairore.

<sup>50</sup>Īna ito yija tuocōri, Jairore ado bajiro yiyiju Jesús:

—Gūibesa. Diore mu rŭcŭbuoja, mu maco mŭcana tujacoago yigōji iso, yiyiju Jesús ĩre. Ito yicōri Jairo ya wijū wayijarā ĩna.

<sup>51</sup>Ī ya wijū ejacōri Pedro, Santiago ito yicōri Juanre cuni sāja rotiyiju Jesús. Ito yicōri cōgō jacŭsabatiare cuni sāja rotiyiju ĩ. Gājerāre sāja rotibisiju Jesús. <sup>52</sup>Iti wi ñarā masa, macoacā iso godaja ticōri, buto otijarā ĩna. ĩna ito bajiro otija ticōri, ado bajiro yiyiju Jesús ĩnare:

—Otibesa, Adio macoacā cōgō meje yamo iso. Canigō yamo, yiyiju Jesús.



<sup>53</sup>Ito ï yija, ito oti ñarã buto ïre aja tudiyijarã ïna. “Godasacoamo iso”, yi tuoñayijarã ïna. <sup>54</sup>Ito bajiro ïna yibojarocati godaro iso ñari sãnimũju sãjacõri iso ya ãmore ñiayijũ Jesús. Ito yicõri ado bajiro yiyijũ Jesús isore: —Macoacã, wumũ rũgũña, yiyijũ Jesús isore.

<sup>55</sup>Ito ï yirocaci cojisiti tujacoayijo iso, godaro ñabojagoti. Ito yicõri godaro ñabojagoti wumũ rũgũyijo iso. Ito iso bajija ticõri, “Bare ecaya isore”, yiyijũ Jesús. <sup>56</sup>Ito bajiro iso tujaja ticõri, ti ucacoayijarã iso jacusabatia. Ito bajibojarocati iso jacusabatiare oca goti bato rotibisiju Jesús, iso tujarise gayere.

**Dios oca ïna goti ucutoni ï rãca riasotirãre Jesús ï cõare gaye**  
(Mt 10.5-15; Mr 6.7-13)

**9** <sup>1</sup>Co rumũ ï rãca riasotirã, jua gũbojeno ñarãre miojuyijũ Jesús. Ito bajiro ïna minijujaja ticõri, ï masirise ïsiyijũ Jesús ïnare, rũmũa sãja ecoanare rũmũare ïna bucõa masitoni. Ito yicõri cõrãre cuni ïna maso masitoni, ï masirise ïsiyijũ Jesús ïnare. <sup>2</sup>Ito yicõri, “Ïre tuorũnrãre ï rotiroju miojugu yiguĩji Dios”, yire oca goti ucu rotiyijũ Jesús ïnare. Ito yicõri, “Cõrãre cuni yisorã yirãji mũa”, yi roti ñucayijũ Jesús ïnare. <sup>3</sup>Gaje ado bajiro ïnare gotiyijũ Jesús:

—Iti mũa oca goti ucurã waja gajeoni ãmimenati waja. Ito yicõri mũa ya turigũ cuni ãmi wabeja. Ito yicõri tura baju, naju, niyeru cuni ãmi wabeja. Ito yicõri yutabuju mũa sãñarise rãca riti waja. Wasoa sãñado ãmimenati waja, yiyijũ Jesús. <sup>4</sup>Ito yicõri cuto mũa ejaja mũa sãja ejari witi ñacõama. Iti wi ñarãti mũcana gaje cutoju warã yirãji mũa. <sup>5</sup>Gaje cutoju mũa ejaroca iti cuto gãna mũare ïna boca ãmibeja riojoti rãtaoaja. Ito yicõri iti cuto rãta warãti mũa ya gũboju sita wãrisere ja bateba. Ito bajiro mũa yija ticõri, “Ïnare queno boca ãmibijũ mani”, yi tuoñarã yirãji iti cuto gãna, yiyijũ Jesús ïnare.

<sup>6</sup>Ito bajiro ï yija tuocõri, jeyaro cutorijũ Dios oca goti ucurã wayijarã ïna. Ito yicõri cõrãre cuni maso ucurã wayijarã ïna.

**Herodes ï tuoña oca jaire gaye**  
(Mt 14.1-12; Mr 6.14-29)

<sup>7</sup>Ito bajiro ïna yi ucuroca, Herodes Galilea sita uju, jeyaro Jesús ï yigore tuoyijũ ï. Gãjerã Herodesre ado bajiro yi gotiyijarã ïna: “Godaru ñabojaguti mũcana catiami Juan”, yiyijarã gãjerã ïre. ïna ito yija tuocõri, no bajiro yi tuoña masibisiju Herodes. <sup>8</sup>Gãjerãma, Herodesre ado bajiro yiyijarã ïna: “Elías goaĩoru”, yiyijarã gãjerã. Ito yicõri gãjerãma, “Jane mejeju Diore goti ïsiri masũ godacõri mũcana catiru”, yiyijarã ïna. <sup>9</sup>Ïna ito bajiro gotirise tuocõri, ado bajiro yiyijũ Herodes:

—Yũmasiti Juanre ïna rijoga jatatoni roti ñucacũ yũ. ¿Ñimũocũ ñati ito bajiro jaje oca ruyugu? yiyijũ Herodes.

Ito bajiro iti buto oca ruyuja tuocõri, buto ti ãmoyijũ Herodes Jesure.

**Cinco mil ñaräre Jesús i ecare gaye**  
(Mt 14.13-21; Mr 6.30-44; Jn 6.1-14)

<sup>10</sup>Jesús i oca ña goti ucutoni i cüana tñdi ejarã ñnare rëtagore Jesure goti jeocöyjarã ña. Ito bajiro ña gotija bero ricati busa Betsaida wame cütiri cuto tujũ ñnare ãmi wayijũ Jesús. <sup>11</sup>Ito bajibojarocati “Ito warãji ña”, yi masicöri ñnare sũya wayijarã masa jãjarã. Ito bajiro ña sũya ejaja ticöri, wanũre rãca ñnare boca ãmijijũ Jesús. Ito yicöri, “Ïre tuorëñnũrãre i rotirojũ miojugũ yiguĩji Dios”, yire oca gotijijũ Jesús ñnare. Ito yicöri cöarãre cuni masoyijũ i.

<sup>12</sup>Rãiocũro ña wadiroca i oca goti ucutoni i cüana i tujũ minijucöri ado bajiro yijijarã ña ñre:

—Buto cuto meje ña ado. Ito bajiri queno bare bũja masiña ma ado. Ito bajiri masare cutojũ wa rotiya, bare ña bũja masitoni, ito yicöri ña cani masitoni, yijijarã ña Jesure.

<sup>13</sup>Ito ña bajiro yibojarocati:

—Mũati ñnare bare ecaya, yijijũ Jesús.

Ito i yija tuocöri, ado bajiro yijijarã ña Jesure:

—Najuro co ñujamocö, ito yicöri wai jũarãti ñama guare. ¿Ña ñarocöti masa ña barotire gũa waja yirã ware ãmoati mũ? yijijarã ña Jesure.

<sup>14</sup>Cinco milcö ñayijarã ña ãmũa. Romia ito yicöri rãca cuni ñayijarã ña wato. Ito bajiro jãjarã ña ñaja ticöri, i rãca riasotirãre ado bajiro yijijũ Jesús:

—Rujariaburi ruji rotiya masare. Cobu rujirãre jũarã masacö gãji ye jua ñujamocö ruji rotiya, yijijũ Jesús i rãca riasotirãre.

<sup>15</sup>Ito bajiro i yija tuocöri, ito bajiro masare ruji rotijijarã ña. <sup>16</sup>Ito bajiro ña rujija ticöri, co ñujamocö naju ñarisere, wai jũarãre cuni ãmi rucoyijũ i ya ãmona. Ito yicöri macãrucũrojũ ti tuocöri Diore, “Queno ya mũ”, yijijũ Jesús. Ito yicöri iti najurore igata batoyijũ, waire cuni. Ito yicöri i rãca riasotirãre ñsiyijũ, masare ña batotoni. <sup>17</sup>Ito bajiro ña batoja boca ãmicöri masa ñarocöti jedijijarã ña. Ito yicöri yaji quenaro ñayijarã ña. Ito bero ña yaji rëtagore jua gũbojeno jiburi miosã dajoyijarã ña.

**Cristore “Dios i cöaru ña mũ”, yi Pedro i goti quenore gaye**  
(Mt 16.13-19; Mr 8.27-29)

<sup>18</sup>Co rũmũ Diore busirocũ gajejũ busa wayijũ Jesús. Ito i Jacure busi ñaroca, i rãca riasotirã ejayijarã ña. Ña ejaja ticöri, ado bajiro ñnare seniãayijũ Jesús:

—¿No bajiro yi busiri masa yũre? yijijũ Jesús.

<sup>19</sup>Ito i yija ado bajiro cãdiyijarã ña:

—Gãjerãma mũre, “Masare idé guri masũ, Juanti ñami”, yama ña mũre. Gãjerãma, “Elías ñami”, yama ña mũre. Ito yicöri gãjerãma, “Jane mejejũ Diore goti ñsiri masũ godacöri mũcana catirũ ñami”, yama ña mũre, yijijarã ña Jesure.

<sup>20</sup>Ña ito yija tuocöri, ado bajiro seniãayijũ Jesús:

—Mũama, “Ñimũ ñaguĩji”, ¿yi tuoĩati yũre? yiyijũ Jesús.

Ito ĩ yija ado bajiro cadiyijũ Pedro:

—Cristo Dios ĩ cõaru ña mũ, ya yũ mũre, yiyijũ Pedro Jesure.

### **Yũre sĩarã yirãji, Jesús ĩ yire gaye**

*(Mt 16.20-28; Mr 8.30-9.1)*

<sup>21</sup> Ito ĩ yija tuoĩati, gãjerãre goti bato yibesa, yiyijũ Jesús Pedroro. <sup>22</sup> Ito yicõri ĩnare ado bajiro yiyijũ Jesús:

—Yũ Masa Rĩjorũ ñeñaro tõbujagũ yigũja yũ. Ito bajiri judio masa bũcũrã, paia ujarã, ito yicõri judio masa rotirise riasori masa cuni yũre ti tudirã yirãji ĩna. Ito bajiri yũre sĩarã yirãji masa. Ito bajiro yũre ĩna yibojarocati yũ godaja bero, uĩa rũmũ bero mũcana tũdi yũ catiroca yigũ yigũji Dios, yiyijũ Jesús ĩnare.

<sup>23</sup> Ito bero ĩna ñajediroro ado bajiro gotiyijũ Jesús:

—Sĩgũ yũre ĩ sũya ãmoja, ĩ ye ñaroti tuoĩaticõri yũjũare tuo mai sũyagũ yigũji. Yucũtẽo gajagũ robo bajiro tõbujabojaguti yũre riti sũyagũ yigũji ĩ. <sup>24</sup> No ĩ catirise maibojaguti godagũ yigũji. Ito bajibojarocati yũre tuoĩatũgũ, yũ oca ĩ gotija tuo junisinicõri ĩna sĩagũama catitiñare gaye bũjagũ yigũji. <sup>25</sup> Sĩagũ adi macãrucũro gaye gajeoni jeyaro ĩ bũjibojarocati ĩ godari rũmũ, catitiñare ĩ bũjabeja, ito yicõri Dios ĩre ruyurioja ñeñũ waja mano yiroja ĩre. <sup>26</sup> Yũ Masa Rĩjorũ uju ñacõri tũdi ejagũ yigũja yũ mũcana. Rẽtoro ñasarise yũ Jacũ yũre ĩ ĩsijare ito yicõri ángel mesa ĩna ñasaro bajiro yũre ĩ jidicãjare, co rũmũ ñasari masũ uju tũdi ejagũ yigũja yũ. No yũre masigũ ñabojaguti, yũre ĩ bojoja ito yicõri yũ oca masibojaguti ĩ bojoja yũ tũdi ejari rũmũ ito bajiroti ĩre bojogũ yigũja yũ cuni. <sup>27</sup> Riti ya yũ mũare. Mũa wato coriarã, ado ñarã ĩna godaroto riojũ, “Ĩre tuoĩatũgũre miojũuogũ yami Dios”, yi ti masirã yirãji ĩna, yiyijũ Jesús ĩnare.

### **Ĩna tiro riojo Jesús ĩ godo wedire gaye**

*(Mt 17.1-8; Mr 9.2-8)*

<sup>28</sup> Ito bajiro ĩ yija bero, uĩa ãmojeno rũmũri berocõ, gũtagũjũ mũja wayijũ Jesús ĩ Jacũ Diore busiroca. Ito yicõri Pedro, Santiago, Juanre cuni ãmi wayijũ ĩ. <sup>29</sup> Gũtagũ joeju ejacõri Diore busiyijũ Jesús. Ito bajiro Diore ĩ busiroca ĩ ya rio gajero bajiro godo wediyijũ. Ito yicõri ĩ ya yutabujũ cuni bũto boticõri yoro ñayijũ. <sup>30</sup> Ito ĩ yi ñaroca, ãmũa jũarã ĩ rãca busirã goaioyijarã. ĩna jũarã ñayijarã Elías, Moisés ñayoana. <sup>31</sup> Ito bajicõri Dios ĩ yorise watoju ñayijarã ĩna. Ito bajiro Jesure busirã, Jerusalénjũ ñeñaro tõbujacõri ĩ godaroti gayere ĩre busiyijarã ĩna. <sup>32</sup> Ito bajiro ĩna yiroca, Pedro mesa bũto canibojarãti, ito bajijare yuyijijarã. Yujicõri Jesús ĩ yorise, ito yicõri ĩ rãca ñarã yorisere tiyijarã ĩna. <sup>33</sup> ĩna jũarã Jesús rãca busiana, ĩna ĩre wagoja ticõri, ado bajiro yiyijũ Pedro:



(San Lucas 9.30-31)

—Guare riasogu, iti rētaroca gua ti ñaja quena ña guare. Muare yiari udia wi meni isiruja gua. Mure co wi, Moisésre gaje wi, ito yicōri Elfasre gaje wi, yiyijū Pedro Jesure.

Ito bajiro busibojaguti, ī busirisere tuo masibisijū Pedro. <sup>34</sup>Ito bajiro ī busiroca, ide bueri ruji wadiyijū. Ide bueri ñare quedi jea biajare güiyijarā ña. <sup>35</sup>Ito yicōri ide bueri wato ado bajiro oca ruyuyijū ñare:

—Āni ñami yū Macu yū maigū. Īre queno tuorūñña mūa, yi ruyuyijū oca ñare.

<sup>36</sup>Ito bajiro oca ña tuoja bero Jesús sigūti ī ñaja tiyijarā ña. Iti rētaja ticōri, ito baja yibisijarā ña. Ito yicōri gājerāre cūni goti bato yibisijarā.

**Rūmú sāñagūre rūmūre Jesús ī bucōare gaye**

(Mt 17.14-21; Mr 9.14-29)

<sup>37</sup>Ito bajiri gaje rūmū gūtagū joejū ñana ruji wayijarā ña. Īna ruji ejaja ticōri, masa jājarā Jesure bocatiyijarā. <sup>38</sup>Masa jājarā wato sigū oca seoro Jesure busiyijū:

—Yūre riasogu mure josa yū, yū macure mū ti maitoni. Ī sigūti ñami yū macu. <sup>39</sup>Biyaro rūmú Īre sājacōri, ī usi jediroca yami. Ī awasāroca ito yicōri ī ya rise somo budiroca yami. Ito bajiro ñeñaro Īre yicōri Īre budigo āmobeami rūmú. <sup>40</sup>Mū rāca riasotirāre rūmú bucōa rotibojacu yū. Ito yū yibojarocati, rūmūre bucōa masibiticā ña, yiyijū ī Jesure.

<sup>41</sup>Ito ī yija tuocōri, Jesús ado bajiro cūdiyijū:

—Ba, ya yua. Queno yure tʷorũnũrã meje ña mũa. Ito yicõri yure rũcũbuorã meje ña mũa. Yoari mũare yu riasobojarocati yure tʷorũnũbea mũa maji, yiyijũ Jesús ñnare.

Ito yi tʷocõri rũmũ sãja ecorũ jacũre:

—Adojũa mũ macũre ãmi wadite maji mũ, yiyijũ ã.

<sup>42</sup>Ito bajiro macũacãre ã ãmi waroca mũcana tũdi rũmũ quedi sãjayijũ ãre. Ito yicõri jacajũ ã quedi quearoca yicõri ã usi jediroca yiyijũ rũmũ ãre. Ito bajiro ã yija ticõri, rũmũre budi rotiyijũ Jesús. Rũmũre Jesús ã bucõaja bero queno cati quenayijũ macũacã mũcana. Ito yicõri macũacãre ã jacũre judacõayijũ Jesús mũcana. <sup>43</sup>Dios ã masirisena ito bajiro Jesús ã yija ticõri, ito ñana ti ucayijarã masa.

### **Yũre sãrarã yirãji, yi mũcana Jesús ã tũdi gotire gaye**

*(Mt 17.22-23; Mr 9.30-32)*

Ito bajiro ã yirise masa ñna ti wanũroca, ado bajiro yiyijũ Jesús ã rãca riasotirãre:

<sup>44</sup>—Ado yu gotirise queno tuoya mũa. Ito yicõri ãcabojabeja. Yu ña Masa Rĩjorũ Dios ã cõarũ. Yũre ñnacõri gãjerãre ãsirã yirãji ñna, yũre ñna sãtoni, yiyijũ Jesús ã rãca riasotirãre.

<sup>45</sup>Ito bajiro ã yibojarocati, ñnare tũo masi rotibisijũ Dios maji. Ito bajiro ã yijare Jesús ã gotirisere tũo masibisijarã ñna. “Mũ gotirisere mũcana guare goti quenõna”, yi gũi ñayijarã ñna.

### **¿Ñimũ ñnati ñnasagu ñarocũ? ñna yi seniãre gaye**

*(Mt 18.1-5; Mr 9.33-37)*

<sup>46</sup>Ito bajiro ñna baji ñaroca:

—¿Ñimũjũa ñagũ yiguĩjida ñnasagu? yi gãmeri busiyijarã ñna Jesús rãca riasotiri masa.

<sup>47</sup>Ito bajiro ñna gãmeri busirisere, tũo masicõyijũ Jesús. Ito yicõri sãgũ macũacãre ã tũ tũami rũgõyijũ Jesús.

<sup>48</sup>Ito yicõri ã rãca riasotirãre ado bajiro yiyijũ Jesús:

—No yure rũcũbuocõri ãni macũacãre boca ãmiro bajiro, yure cũni boca ãmigũ ñami ãocũ. Ito yicõri yure boca ãmigũ, yure cõarũre boca ãmigũ ñami ã. No mũa rãca gagũ, “Gãjerã rẽto busaro tũoĩagũ ña yu”, yibicũ ã ñagũ yiguĩji ñnasagu, yiyijũ Jesús ñnare.

### **Manire tũo tudibicũ ã ñaguĩji mani baba, Jesús ã yire gaye**

*(Mr 9.38-40)*

<sup>49</sup>Ito ã yija bero ado bajiro yiyijũ Juan ãre:

—Guare riasogu, sãgũ mũ wamena rũmũare bucõagũ ticũ gũa. Gũa rãca gagũ meje ã ñajare rẽocũ gũa ãre, yiyijũ Juan Jesure.

<sup>50</sup>Ito ã yija tũocõri:

—Rẽobeja mũa. No manire tũo tudibicũ ã ñaguĩji mani baba, yiyijũ Jesús ñnare.

**Santiago, Juanre cuni Jesús i goti quenore gaye**

<sup>51</sup>Ūmacūjũ Jesús i waroto iti cõñajare, “Yũre ãna sãã amobojarocati Jerusalénjũa wasagu yigũja yũ”, yi oca s̄oyijũ Jesús. <sup>52</sup>Ito bajiro tũoĩacõri i riojũa queno yuronare cõayijũ Jesús. Samaria sita cutojũ canirajũri ãmarã wayijarã ãna. <sup>53</sup>Jerusalénjũ warã yama yi ti masicõri, boca ãmi ãmobisijarã Samaria sita gãna ãnare. <sup>54</sup>Ito bajiro ãna yija ticõri, Jesús rãca riasotirã Santiago, Juan ado bajiro yiyijarã Jesure:

—¿Gũa ãnare ruyuriorona Diore jea queo rotire ãmoati mũ? yiyijarã ãna Jesure.

<sup>55</sup>Ãna ito yija tũocõri, oca s̄oro ãnare ticõri ado bajiro ãnare tudiyijũ Jesús:

—Ito bajiro mũa tũoĩaja, rũmũ bajiro tũoĩarã ña mũa. <sup>56</sup>Yũ ña Masa Rĩjorũ. Masare ruyuriorocũ meje wadicũ yũ. ãnare masorocũ wadicũ yũ, yiyijũ Jesús ãnare.

Í ito yija bero gaje cutojũ wayijarã ãna mũcana.

**Jesure tũo sũya ãmorã**

*(Mt 8.19-22)*

<sup>57</sup>Ito ma ãna waroca s̄igũ ãmũgũ ado bajiro yiyijũ Jesure:

—Yũ Ʋjũ, no mũ waroti mũ rãca wa ãmoa yũ, yiyijũ i Jesure. <sup>58</sup>Ito bajiro i yija tũocõri, ado bajiro cũdiyijũ Jesús ãre:

—Buyairo mesa totijũ canicã ãna. Ito yicõri minia ãna ya jibũrijũ canicã ãna. Ito bajibojarocati yũ Masa Rĩjorũ, dijũ yũ canirijũ ma yũre. Ito bajiri yũre mũ sũyaja josari ñaroja mũre, yiyijũ Jesús ãre.

<sup>59</sup>Ito yicõri gãjire ado bajiro yiyijũ Jesús:

—Yũ rãca waya, yiyijũ Jesús.

Ito i yijare:

—Yũ Ʋjũ, yũ jacũ rãca ñagũ ya maji. Í godaja bero mũ rãca wacũja yũ, yiyijũ i Jesure.

<sup>60</sup>Ito bajiro i yija tũocõri, ado bajiro cũdiyijũ Jesús:

—Yũre masimena moajaro itirea. Mũáma, “Íre tũorũnrãre miojugũ yiguĩji Dios”, yire oca goti ucuya mũáma, yiyijũ Jesús ãre.

<sup>61</sup>Ito yija ado bajiro yiyijũ gãji Jesure:

—Yũ Ʋjũ, mũ rãcati wa ãmoa yũ. Cajero maji yũ ya wi gãnare ware gotigũ wacũ ya yũ maji, yiyijũ i Jesure.

<sup>62</sup>Ito i yija tũocõri, ado bajiro cũdiyijũ Jesús:

—S̄igũ yũ rãca wasũogũ, iti rũmũjũ i yigore mũcana tũdi i tũoĩaja, Dios masa jeyaro Ʋjũre queno moa ãsi masibeami ãocũ, yiyijũ Jesús ãre.

**Setenta y dos ñarãre Jesús i cõare gaye**

**10** <sup>1</sup>Ito i yija bero setenta y dos ñarã beseyijũ mũcana. Ito yicõri i waroti cũtoricõti jũarã, jũarã, jũarã i riojũa wa yu rotiyijũ.

<sup>2</sup>Ãnare wa yu rotigũ ado bajiro yiyijũ i ãnare:

—Riti ya yu. Ote jaje iti bucubojarocati moari masajua jaibeama. Ito bajiri ote ujure i ya moari masare ote ami rotija quena. Riti ya yu. Jajarã nama yu oca masimena. Ito bajibojarocati coriarã nama yu oca inare goti ucuroña. Ito bajiri Diore seniña i oca goti ucuronare i cõatoni. <sup>3</sup>Wasa mua. Gujoroju muare cõa yu. Ito bajiri queno tuoiaña. Oveja yaia tu ina ejarã waro bajiro muare cõa yu. <sup>4</sup>Gajeoni sãra buju ami wabeja. Niyeru sãra buju cuni amibesa. Ito yicõri gaje guboco mua wasoaroti ami wabeja. Ma masa mua boca ja yoari busi rügõ yibeja mua. <sup>5</sup>Cuto ejacõri co wi mua sãjaja, iti wi gãnare ado bajiro yiba: “Dios queno yijaro muare ito yicõri queno ñaña mua”, yiba mua. <sup>6</sup>Îna muare queno ina cudija, quena ñaro yiroja inare. Ito bajibojarocati queno muare ina cudibeja quenabeto yiroja inare. <sup>7</sup>Îna cudija ticõri, iti wi tujacõri, ina ecaro bajiroti baba mua. Diore moa isirã mua ñajare mua riasorãjua muare bare ecarã yirãji ina. Gaje wi, gaje wi, sãja ucu yibeja mua. <sup>8</sup>Cuto mua ejaja ina muare boca amija ina ecaro bajiroti baba. <sup>9</sup>Ito gãna cõrã ina ñaja, inare yisioba. Ito yicõri ado bajiro inare gotiba: “Yoari mejeti ire tuorũnurãre i rotiroju miojugu yiguji Dios. Ito bajiri ire mani tuorũnaja quena”, yi gotiba. <sup>10</sup>Gaje cuto muare ina boca amibeja, maju wija rügõcõri ado bajiro inare gotiba: <sup>11</sup>“Mu ya cuto gaye sita gua ya guboco wãrisere jacãcõa gua mua guare boca amibejare. Masiña mua. ‘Ire tuorũnurãre miojugu yiguji Dios’, yire gaye muare gotirona ejaboja gua”, yiba inare, yiyiju Jesús.

<sup>12</sup>Gaje ado bajiro muare gotia yu. Iti cuto gãna muare boca amimena, Sodoma cuto gãna rëto busaro ñeñaro tõbujarã, yirãji ina, Dios i waja seniri rumu, yiyiju Jesús i rãca riasotirãre.

### Cutori gãna riojo cudimena oca

(Mt 11.20-24)

<sup>13</sup>Gaje ado bajiro gotiyiju Jesús inare:

—Bujato baja inare. Buto ñeñaro tõbujarã yirãji Corazín gãna, ito yicõri Betsaida gãna cuni. Ito bajiroti tõbujarã yirãji. Jaje tiyamani inare iõbojacu yu. Ito yu yibojarocati ina ñeñaro yirise jidicã amobiticã ina. Inare yu iõcato bajiroti Sidón, ito yicõri Tiro gãna yu iõja, ina ñeñaro yirise iti rumuju jidicãboana. Ito yicõri ina ñeñaro yirise tuoia bojori bujarã, saya wanure gaye meje sãñaboana ina. Ito yicõri “Buto bojori buja gua”, yirona õja tuboana ina ya rioju. <sup>14</sup>Dios i waja seniri rumu Tiro, Sidón gãna rëtoro ñeñaro tõbujarã yirãji Betsaida gãna, Corazín gãna cuni. <sup>15</sup>Ito yicõri, “Umacuju Dios taju ejarã yirãji mani”, yi tuoibojarãji Capernaum gãna. Ito bajiro tuoibojarãti jeame ujuroju warã yirãji ina, yiyiju Jesús i rãca riasotirãre.

<sup>16</sup>No muare tuoguti, yure cuni tuogu ñami. No muare amobea yirã, yure cuni amora meje ñama ina. No yure amobea yigu, yure cõarure cuni amogũ meje ñami iõcũ, yiyiju Jesús i rãca riasotirãre.

### Setenta y dos ñarã ina tуди ejare gaye

<sup>17</sup>Mucana i tu tуди ejarã buto wanu tуди ejayijarã Jesús i cūana setenta y dos ñarã. Ito yicōri Jesure ado bajiro yiyijarã ina:

—Gua Uju, rŭmúa sãja ecoana rŭmúare gua budi rotija, ñaro bajiroti guare cudicã ina, yiyijarã ina Jesure.

<sup>18</sup>Ina ito yija tuocōri, ado bajiro yiyiju Jesús inare:

—Rŭmúa uju Satanás rētoro masigũ ña ya. Ũmacũju bujo i jarise robo bajiro Satanás i quedi wadija ticu ya. <sup>19</sup>Cotiwãja, ãñare cuni cudabojarãti mua cuni ecobe yirocu, ya masirise muare jidicãcu ya. Ito yicōri mua wajacure rētocũma yirocu, cũcu ya muare. Yu masirise muare ya jidicãjare ñejuã muare junibetoja. <sup>20</sup>“Rŭmúare gua budi rotija ñaro bajiroti cudiquĩ guare”, yi masibojarãti buto wanu quenasaroti meje ña itiana. “Ũmacũju ya warotoju ya wame wōre ñacãroja”, mua yi masija, iti ña buto wanu quenare gaye, yiyiju Jesús inare.

### Jesús i wanure gaye

(Mt 11.25-27; 13.16-17)

<sup>21</sup>Ito i yirocati Jesús i wanu quenaroca yiyiju Espiritu Santo. Ito bajiri ado bajiro yiyiju Jesús Diore:

—Cuna mure buto rŭcubuoã ya. Mu ña adi tuti gagu Uju, macãrucũro jeyaro Uju. Ado gãna buto riasotiana, ito yicōri buto masirã, mu oca ña tuo masibitire oca, ñasari masa mejejuare mu oca ña tuo masiroca yicu mu. Mu ãmoro bajiroti bajicu. Iti ya ya Cuna mure, yiyiju Jesús Diore.

<sup>22</sup>Jeyaro uju ya ñatoni yure cũquĩ ya Jacu. Yu Jacu sigũti queno yure masiguĩji. Ito yicōri ya sigũti ya Jacure queno masia. Gãjerã cuni ya Jacure masiroca, ya yi ãmoja, ya jacure masirã yirãji ña cuni, yiyiju Jesús masare.

<sup>23</sup>Ito yicōri i rãca riasotirãre riti ado bajiro yiyiju Jesús:

—Yu iorise ticōri buto wanu quenare ña muare. <sup>24</sup>Ado bajiro muare ya ya. Jane meje gãna Dios oca goti isiri masa, ito yicōri ujarã masa cuni adocãta mua tirise buto ti ãmobjayijarã ina. Ito bajibojarãti itire ti bujabisijarã ina. Ito yicōri adocãta mua tuorise buto tuo ãmobjayijarã. Ito bajibojarãti itire tuobisijarã ina, yiyiju Jesús i rãca riasotirãre.

### Samaria sita gagu gãjire i queno yire gaye

<sup>25</sup>Ito bajiro yi ñaroca sigũ judio masa rotirise riasori masu, wadiyiju Jesús rãca busirocu: “Riti masiati Jesús”, yi tuoñacōri seniãgũ ejayiju i. Ado bajiro ire seniãyiju:

—¿Yu Uju, catiñãre gaye ya buja ãmoja no bajiro yigujada ya? yiyiju i Jesure.

<sup>26</sup>Ito i yija tuocōri:

—¿No bajiro wãñati ucare, Dios i rotire gaye? Ito yicōri, çitire mu tija no bajiro tuoñati mu? yiyiju Jesús ire.

<sup>27</sup>Ito bajiro i yija tuocōri, ado bajiro cudiyiju judio masa rotirise riasori masu:



—“Mani Ʋju Diore buto maija quena. Mani tuoña oca sēorisena, ito yicōri mani ya usina cūni buto Diore mani maija quena. Ito yicōri manimasi mani mairo bajiroti mani ñarāre cūni mani maija quena”, yi gotia Dios oca, yiyiju ī Jesure.

<sup>28</sup>Ito ī yija tucōri:

—Ñaro bajiroti cudia m̄. Ito bajiroti ya Dios oca. Ito bajiro m̄ yija, catitñagū yiguja m̄, yiyiju Jesús judio masa rotirise riasori masure.

<sup>29</sup>—“Yū ñarāre queno yigu meje ña yū”, yi tuo masicōri, “¿Noajua ñati yū ñarā?” yi seniñayiju ī Jesure.

<sup>30</sup>Ito bajiro ī yija tucōri, ado bajiro gotiyiju Jesús ire:

—Sīgū Jerusalénju ñagū Jericóju roja wayiju. Ma ī waroca riniri masa ire ñiacōri jeyaro ī gajeoni cutirise ire emayjarā. Ī ya yutabujuri cūni ire ēma jeocōyjarā ña. Ito yicōri ire buto janugā cūcōri, ire wagoyjarā ña. <sup>31</sup>Ito ī baji cūñaroca pai cūni iti mati wayiju. Īre ti bujabojaguti riojoti rētacoayiju ī. <sup>32</sup>Ī bero gāji Levita masu ejayiju ī tu. Īre ti buja wacuti riojo rētacoayiju ī cūni. <sup>33</sup>Ito bajiro ire ña ti rētaja bero sīgū Samaria sita gagu iti ma wacuju ti bujayiju ire. Ito yicōri ire ti maiyiju. <sup>34</sup>Ito bajiri ī tu ejacōri ire cami uco yiyiju ī. Iti cami uco yigu uyena ito yicōri uyé idena uco yiyiju ire. Ito yicōri ī ya camire wōbiayiju. Ito bajiro ire yicōri ī ya burro joeju ire m̄ojeoyiju. Ito yi tiogū, canira wijū ire āmi wacōri ñamiasaro ire tirūnyiju. <sup>35</sup>Samaria sita gagu busuri wacu canira wi ujare juati niyeruti isiyiju. Iti isi wacu ado bajiro yiyiju ī ire: “Āni cōgūre tirūñaña. Jairo waja mure iti godaja, tūdi ejagu mure wa yicuja yū mucana”, yiyiju ī canira wi ujare, yi oca gotiyiju Jesús judio masa rotirise riasori masure. Iti oca goti tiogū ado bajiro ire seniñayiju mucana Jesús: <sup>36</sup>“Īna udiarā wato ñimujua ñarūda riniri masa ña jasā cūrure, ti mairu?” Yi seniñayiju Jesús judio masa rotirise riasori masure.

<sup>37</sup>Ito ī yija tucōri:

—Samaria sita gagu ire ti mairu. Ī ñaru ī yagu, yiyiju ī Jesure.

Ito bajiro ī yija ado bajiro yiyiju Jesús ire:

—Wasa, ī yiado bajiroti yiba m̄ cūni, yiyiju Jesús ire.

### Marta mesa ya wijū Jesús ī ejare gaye

<sup>38</sup>Ito ma wacuju cuto ejayiju Jesús. Iti cuto ejacōri Marta wame cutigo, ya wi wayiju ī. Ī ejaja ticōri, queno boca āmiyijo iso ire. <sup>39</sup>Iso ocabajio María wame cutigo ñayijo. Iso Jesús ya gubo tu rujicōri, ī gotirisere tuo rujiyijo. <sup>40</sup>Martama iso moarise gaye tuoñagō usirioro tōbujayijo. Ito bajiri Jesús tu eja rūgūcōri, ado bajiro busiyijo iso:

—¿Yū Ʋju, no yibeati mure yū ocabajio yure ejabuabecoti m̄ tu iso rujija? “M̄ rījorore ejabuaya maji”, yiya isore, yiyijo Marta Jesure.

<sup>41</sup>Ito bajiro Marta iso yibojarocati ado bajiro cudiyiju Jesús isore:

—Marta m̄ moare cutirise usirioro baja mure. Ito bajiri usirioro tōbūja m̄.

<sup>42</sup>Buto ñasarise gaye cojiti ña. Yū busirise tucōri, m̄ ocabajio María, ñasarisere bujamo. Nijua iso tuo āmisārise isore āmicābiquiji yiyiju Jesús Martare.

**Diore mani seniroti Jesús i riasore gaye**

(Mt 6.9-15; 7.7-11)

**11** <sup>1</sup>Co rumu Diore busiyiju Jesús. I busi tioroca i rāca riasotigu sīgū ado bajiro busiyiju:

—Yu Uju, Juan rāca riasotiana i riasoado bajiro guare cūni riasoya, Diore gua busi masitoni, yiyiju i Jesure.

<sup>2</sup>Ito i yija tuocōri:

—Diore mu busija ado bajiro yiba:

Gua Jacu, ūmacūju gagu űa mu. Mu wame masicōri masa jeyaro rucubujaro ina. Masa jeyaro Uju mu űaroti rumu ejare āmoa gua. Ūmacūjuga tuti cūni mu āmoro bajiroti űayija. Ito bajiri adi sitaju cūni mu āmoro bajiro riti űare āmoa gua.

<sup>3</sup>Co rumu ruyabeto gua baroticōti guare naju īsiña.

<sup>4</sup>Gua űeñaro yirisere ācabojoya. Gua cūni guare űeñaro yirāre ācabojoa. “¿No bajiro yure cudirā yirājida ina?” yi tuoīabesa guare. Gua űeñaro yibititoni guare ejabuaya. Itocō űa. Amén, yiba. Ito bajiro Diore mua busija quena, yiyiju Jesús i rāca riasotirāre.

<sup>5-7</sup>Gaje ado bajiro inare gotiyiju Jesús:

—Sīgū mua baba űami gudareco mua ya wi ejacōri ado bajiro i yija, “Yu baba, gāji yu baba wa ucuri masu yu ya wiju ejami. űe ecare ma yure. Ito bajiri yure naju wasoaya mu”, i yija, mua wi toti ado bajiro cudirā yirāji mua: “Ūsirioro yibesa yure. Soje cūni biado űa. Ito yicōri yu rīa rāca canigū ya yu. Ito bajiri űejua īsirocū wagādo ma yu”, yi cudirā yirāji mua. <sup>8</sup>Ito bajiro mua babare mua īsi āmobitibojaja cūni, ire īsirā yirāji mua, mucana i Ūsirioro seni uyabe yirona. Ito yicōri i āmorocō īsirā yirāji mua, ya yu muare. <sup>9</sup>Ado bajiroti yire űa Diore mani senija. Mani Diore senija manire īsigū yigūiji. Ire mani āmaja bujarā yirāji mani. “Mure busi āmoa yu”, mani yija, busi rotigu yigūiji manire. <sup>10</sup>No senigūti boca āmiguīji. No āmagūti bujagu yigūiji. “Busi āmoa yu”, yigureti busi rotigu yigūiji Dios.

<sup>11</sup>Adocāta mua rīa ina naju senija, ¿Gūtagā īsire űarojada muaca? Ito yicōri wai ina senija, ¿Āña īsire űarojada muaca? <sup>12</sup>Ito yicōri cara rīa ina senija, ¿cotiwāja īsire űarojada muaca? Īsimenaji mua, yi tuoīa yu. <sup>13</sup>űeñaro yirā űabojarāti, mua rīa ina senija quenarise yirā yirāji mua. Mani rīare quenarise riti mani īsija, Dioama mani Jacu ūmacūju gagu, ire mani senija, yiro bajiroti Espiritu Santo manire queo sāguīji, yiyiju Jesús i rāca riasotirāre.

**Rūmúa uju rotirise boca āmicōri yami Jesús, ina yire gaye**

(Mt 12.22-30; Mr 3.20-27)

<sup>14</sup>Sīgūre rūmú quedi sājacōri, i busibeto yiyiju. Ito i baji űaroca rūmūre bucōayiju Jesús. Rūmūre i bucōaja beroti busicoayiju i busibicu űabojaru. Ito bajiro iti rētaja ticōri, ucayjarā masa. <sup>15</sup>Ito bajibojarocati coriarā ado bajiro tuoīayjarā:

—Āni ũmugũ rŭmúare ĩ bucōarise, rŭmúa ɸju Beelzebú wame cutigu masirisenati bucōami, yi tŭoŭayijarā coriarā.

<sup>16</sup> Gājerāma, “Dios cōaru ñami ĩ”, gŭa yi tŭoŭatoni, ũmacũju gaye tiyamani gware ŭogũ yiguĩji ĩ, yi tŭoŭayijarā ĩna. <sup>17</sup> Ito bajiro ĩna tŭoŭarisere masicōyiju Jesús. Ito bajiri ado bajiro gotiyiju ĩ ĩnare:

—Co sita gāna ñabojarāti ricati riti ĩna tŭoŭaja, ito yicōri ĩna gāmeri jaja, queno ña masimenaji ĩna. Co wi gāna ñabojarāti ricati riti ĩna tŭoŭaja queno corocō ña masimenaji ĩna. <sup>18</sup> Ito bajiroti rŭmúa ɸju Satanás, ĩ ñarāre ricati riti tŭoŭaroca ĩ yija, ĩna ɸju queno ña masibiquĩji. Ado bajiro mware gotia yu. “Rŭmúa ɸju Beelzebú ĩ masirisena rŭmúare bucōami”, yiboja mwa yure. <sup>19</sup> Rŭmúa ɸju masirisena yu rŭmúare bucōaja, çmwa rāca gānama ñimũ masirisena rŭmúare bucōati ĩna? “Gua rāca gānama rŭmú masirise gayena meje rŭmúare bucōama ĩna”, yi tŭoŭa mwa. Ito bajiri itire ti masicōri, “Rŭmú masirisena meje rŭmúare bucōami ĩ cuni”, yi tŭoŭa masia mwa yure cuni. <sup>20</sup> Ado robojua baja. Dios ĩ masirisena rŭmúare bucōa yu. Ito bajiro yu yija ticōri, “Mani wato ñacāguĩji Dios. ĩre tŭorũnrāre miojusnogu yami Dios”, yi masiruja mware.

<sup>21</sup> Ũmugũ sēogũ, ito yicōri queno bisu cutigu, ĩ ya wiju ĩ tirũnũja, iti wiju gaye quenoti ñacōaroja. <sup>22</sup> Ito yibojarocati gāji ĩ rēto busaro sēocōri rētocũgũ yiguĩji ĩre. “Adi yu bisu cutija ñimũjua yure rētocũbiquĩji”, yi ĩ tŭoŭabojarocati ĩre rētocũgũ yiguĩji. Ito yicōri ĩ gajeoni cutibojarise ĩre ēmagũ yiguĩji. Rŭmúa ɸju rētoro masigũ ña yu. Ito bajiri rŭmúare bucōa masia yu, yi oca gotiyiju Jesús ĩnare.

<sup>23</sup> No yu rācajua ñabicu, yu rāca gagu meje ñami ŭocũ. No yure ejabuabicu, gājerāre Diore masiroca yu yi āmobjarocati yure ñeñaro yi codegu ñami ĩ, yiyiju Jesús ĩnare.

### **Masure budigocōri mucana tũdi rŭmú ĩ sājare gaye**

*(Mt 12.43-45)*

<sup>24</sup> Sīgũasure rŭmú ĩ budigoja, yucu manojua wa ucuguĩji tujaraju āma ucugu. ĩ bujabeja ado bajiro tŭoŭagũ yiguĩji ĩ: “Yu budigorure mucana tũdi sājacuja yu”, yi tŭoŭagũ yiguĩji ĩ. <sup>25</sup> Mucana tũdi ejagu ĩ budigorure quenora wi, ueri mani wi robo bajiro, ti ejagu yiguĩji ĩ. <sup>26</sup> Ito bajiro ti ejacōri gājerā rŭmúa jua āmojeno ñarā ĩ rētoro ñeña busarā jigũ yiguĩji ĩ, ĩ rāca ñatoni. Ito yicōri ĩna ñarocōti ĩ ũmugũre sājara yirāji. Ito bajicōri ĩ ũmugũ, cajero ĩ bajiado rēto busaro bajigu yiguĩji. Ito bajiri, rŭmú mucana tũdi sājame yirocu, Diore ĩ tŭorũnu sũyaja quena, yiyiju Jesús ĩnare.

### **Dios oca mani tŭorũnũja wanũ quenarā yirāji mani, Jesús ĩ yire gaye**

<sup>27</sup> Ito bajiro Jesús ĩ busiro toto ĩre tŭorā wato sīgō oca sēoro ado bajiro busiyijo: —Mu jaco mure rucocōri, mure ŭjugō buto wanũyijo iso, yiyijo iso Jesure.

<sup>28</sup> Ito bajiro iso yija tŭocōri, ado bajiro yiyiju Jesús isore:

—Yu jaco rētoro wanũrā yirāji, Dios rotirise tŭocōri ĩna cudija, yiyiju Jesús isore.

**Tiyamani mu ïore ãmoa gua, yi ïna senire gaye**

*(Mt 12.38-42; Mr 8.12)*

<sup>29</sup>Ito bajiro Jesús ï busiroca jãjarã busa masa ï tu minijua wayijarã. Ito yicõri ado bajiro ïnare gotiyijũ ï:

—Adi rumuri gãna ñenaro yi jairã ña mua. Ado bajiro ya mua yure: “Tiyamani mu ïoja ticõri, ‘Dios ï cõaruti ñami ãni’, yiana gua”, ya mua yure. Ito mua yibojarocati tudĩ muare ïobicuja yu. Diore goti ïsiri masu, Jonás ñayoru, ïre rëtagore riti muare goticuja yu. <sup>30</sup>Jonásre rëtare ticõri, “Ñani ñami Dios ï cõaru”, yiyijarã Nínive cuto gãna. Yure cuni ito bajiroti yirã yirãji mua. Yu ña Masa Rijoru. Yure rëtare masicõri, “Ï ñami Dios ï cõaru”, yirã yirãji mua cuni yure. <sup>31</sup>Dios masare ñenaro ïna yirise waja ï waja seniri rumu ado bajiro rëtaru yiroja. Sheba cuto gago ujo ñayoro, mua adi rumuri gãnare, “Muare seti ña”, yigo yigõji iso. Jane mejeju sõju wayoyijo iso, queno tuoïagũ rãca Salomón wame cutigu rãca riasotiroco. Adocãta sigũ mua rãca ñami Salomón ñajacu rëtoro tuo masigã. Ito ï bajibojarocati queno ïre tuorũnubea mua. <sup>32</sup>Nínive cuto gãna cuni ado bajiro yirã yirãji muare Dios ï waja seniri rumu: “Jaje seti ña muare”, yirã yirãji ïna. Jane mejeju Nínive cuto gãnare Dios oca gotiyoyijũ Jonás ñayoru. Jonás ï gotija tuocõri, ñenaro ïna yirise jidicãni ïna. Ito bajiri quenarise riti tuoïãni ïna. Adocãta sigũ ñami mua rãca Jonás ñayoru rëtoro ñasagu. Ito ï bajibojarocati queno ïre tuorũnubea mua, yiyijũ Jesús ïnare.

**Mani ya cajea busurica robo bajiro bajia, yi Jesús ï riasore gaye**

*(Mt 5.15; 6.22-23)*

<sup>33</sup>Noajua sãabusuoraga sãayocõri ruyubetoju, jacaju cuni cūmenaji mani. Ito yicõri rujajedo totijũ cuni cūmenaji mani. Ruyubeto cūrãonati guje tutuju jeobusorãji mani, ejari masa queno tijaro yirona. <sup>34</sup>Rãitĩarise iti godaroca ya busurica. Mani ya cajea cuni busurica robo bajiro bajia. Ito bajiri cajeana suoriti mani ya usi queno tuo masiro yiroja. Tite mua. Quenarise mani tija queno tuoïarã yirãji mani, mani ya usiju. Ito bajibojarocati ñenarise mani tija ñenaro tuoïarã yirãji mani, mani ya usiju. Ito bajiro mani yija busuroju meje ñarã yirãji mani. Rãitĩaroju ñarã bajiro ñarã yirãji mani ñenarise mani tuoïa uyaja. <sup>35</sup>Ito bajiri quenarise riti tuoïaruja manire, ñenarise riti mani tuoïa uyabe yirona. <sup>36</sup>Mare sãaticõri, “Adi majua ña quenari ma. Adi majua ña ñenari ma”, yi ti masia mani. Ito bajiroti bajia mani ya usiju cuni. Mani ya usiju quenarise riti mani tuoïa ñaja, “Iti ña quenarise. Iti ña ñenarise”, yi ti masia mani, yiyijũ Jesús ï rãca riasotirãre.

**Mua fariseo gaye tuoïarãre seti ña, Jesús ï yire gaye**

*(Mt 23.1-36; Mr 12.38-40; Lc 20.45-47)*

<sup>37</sup>Jesús ï busi tioroca sigũ fariseo gaye tuoïagũ, “Yu ya wiju bato mani”, yirocu Jesure baba cutiyijũ. Ito ï yija tuocõri, ï ya wiju sãja wacõri badoju eja rũjũyijũ Jesús. <sup>38</sup>Ïna baroto riojua judio masa ïna

ãmo coesotiro bajiro Jesús ï ãmo coebeja ticõri, ti ucayijũ fariseo gaye tuoãagã. 39 ï ti ucaja ticõri, ado bajiro yiyijũ mani Ujũ Jesús ïre:

—Mũa fariseo gaye tuoãarã, joeti coeboja mũa. Somotẽro idira tẽrori cuni joejua riti coea mũa. Totijũama ñarocõti ueri cuticõa. Mũa guaja cuni, joe rujũ riti coea mũa. Jubejũama ñeñaro tuoãa mũa maji. Ito bajiri gãjerã ïna rucorise ti uorã ïnare ruoa mũa. 40 Queno tuoãarã meje ña mũa. Dios mũa ya rujũ rujeoru, mũa ya usi cuni meniñi. ¿Itire masibeati mũa? 41 Mũa ya usijũ queno tuoãacõri bojoro bujarãre ejabũarũja mũare. Ito bajiro mũa yija queno usi cuti ñarã yirãji mũa.

42 'Bujato bujarã yirãji mũa, fariseo gaye tuoãarã. Dios ï rotiado bajiroti jeyaro mũa bujarise ïre jabeto judacõa mũa. Ito bajiro mũa yiriseama quena ña. Ito bajiro queno yirã ñabojarãti gãjerãre queno yibea mũa. Ito yicõri Diore maibea. Ito bajiro yibitirũja mũare.

43 'Bujato bujarã yirãji mũa, fariseo gaye tuoãarã. Minijuara wijũ sãja wacõri rucubũorajũ riti ruji ãmoboja mũa. Ma warã cuni gãjire mũa bocaaja, rucubũore rãca ï seniñare ãmoa mũa. Mũa ñaroti gaye riti tuoãa mũa.

44 'Bujato bujarã yirãji mũa. Gãjerã ïna tiro riojo queno yirã ña mũa. Ito bajibojarocati ïna tibetojũ ñeñaro yirã ña. Ito bajiro mũa yija ticõri, “Queno yirã ñama ïna”, yibojama gãjerã. Ito bajiro ïna tuoãabojarocati queno yirã meje ña mũa, yiyijũ Jesús ïnare.

45 Ito bajiro ï busija tuocõri, sigũ judio masa rotirise riasori masu ado bajiro cudiyijũ ïre:

—Yũre riasogu, ito bajiro mũ busija queno ejabea guare, yiyijũ ï Jesure.

46 Ito ï yija tuocõri, Jesujũa ado bajiro yiyijũ ïre:

—Bujato bujarã yirãji mũa judio masa rotirise riasori masa cuni. Gãjerãre jaje ãma rotia mũa. Nĩmũjũa mũo yiado ma itire. Ito bajiro yicõri ïnare ãma ejabũa ãmobeja mũa. Jaje rotia mũa. Jaje mũa rotibojaja ñimũjũa mũare cudi masibiquĩji. Ito bajiro rotirã ñabojarãti mũa rotiro bajiroti yibea mũa cuni.

47 'Bujato bujarã yirãji mũa. Mũa ñicusabatia Diore goti ïsiri masare sããni. ïnare bajiroti baja mũa cuni. 48 Ito bajiro mũa bajija ti masicõri, “Ïna ñicusabatia robo bajiro tuoãarã ñama ïna cuni”, yĩ tuoãama masa mũare.

49 'Ito bajiro ïna yiroto riojũa masi yucãyijũ Dios. Jane mejejũ queno tuoãagũ ñari, ado bajiro yiyijũ Dios mũare tuoãa yugu: “Yũre goti ïsiri masa, ito yicõri yũ oca goti ucuri masare cuni, ïna tũ yũ cõaja, coriarãre sãarã yirãji ïna. Ito yicõri gãjerãre ïna tõbujaroca yirã yirãji ïna”, yĩ gotiyijũ Dios jane mejejũ. 50-51 Jane mejejũ adi macãrucũro ï rujeoja bero ïre goti ïsiri masare sãasũoñi mũa ñicusabatia. Tite mũa. Abel ñayorũre sããni ïna. Ï bero gãnare cuni jãjarãre sããni ïna. Ito yicõri Zacarías wame cutigũre Dios ya wĩ gudareco rũgõgũre ïre sãasusañi mũa ñicusabatia. Ito bajiri ïna sãare waja, waja senigũ yiguĩji Dios, ya yũ mũare adi rũmũri gãnare cuni, yiyijũ Jesús.

52 'Bujato bujarã yirãji mũa judio masa rotirise riasori masa. Dios oca riasotirã ñabojarãti, ï ocare queno tuorũnũbea mũa. Ito yicõri Dios ocare gãjerã ïna tuorũnũ ãmobojarocati rãoa mũa ïnare, yiyijũ Jesús ïnare.

<sup>53</sup>Ito bajiro Jesús ï busi waja tucõri, judio masa rotirise riasori masa, ito yicõri fariseo gaye tuoïarã buto junisiniyijarã ïna Jesure. Ito bajiro junisinicõri usirioro ïre jeyaro seniïayijarã ïna. <sup>54</sup>Ito bajiro usirioro seniïa codeyijarã ïna, ï queno cudi masibeja ticõri, “Ïre seti ña”, yirona.

**“Queno yirã ña gua”, yibojarãti ñeñarise yija quenabea, yi Jesús ï riasore gaye**

**12** <sup>1</sup>Ito baji ñaroca jãjarã busa masa minijuarã, bidi warã gãmeri cudayijarã ïna. Ito bajiro ïna baji ñaroca ï rãca riasotirãre ado bajiro gotisuoijũ Jesús: —Fariseo gaye tuoïarãre queno tuoïa masima. Mũa tiro riojo queno yirãji ïna. Ito bajibojarãti mũa tibetoju ñeñaro yirãji ïna. “Queno yirã ña gua”, yirã ñabojarãti ñeñaro yama ïna. <sup>2</sup>Jeyaro mani yeyo busibojarise gayere masi jeorã yirãji masa. Ito yicõri no mani yeyobojarise cuni bujacõrã yirãji ïna. <sup>3</sup>Mũa yeyo busibojarisere masa jeyaro tuorã yirãji ïna. Ito yicõri sojere biatucõri mũa yeyo busibojarisere cuni masa jeyaro ïna tuo jeditoni ïmacũju oca ruyuro yiroja, yiyijũ Jesús ï rãca riasotirãre.

**Diore mani gãijja quena, Jesús ï yire gaye**

*(Mt 10.26-31)*

<sup>4</sup>Mũcana ado bajiro gotiyijũ Jesús ïnare:

—Yũ baba mesa ado bajiro mũare gotia yũ. Rujũre sïarãre gãibitirũja manire. ïna sïaja bero ñejuã gaje ñeñaro manire yi masimenaji ïna ïja.

<sup>5</sup>“¿Ñimũjuare mani gãijja quenati?” yirocũ mũare gotigũ ya yũ. Diore mani gãijja quena. Dios ï sïaja bero jeame ãjũroju mani ya usire ï cõa ãmoja, cõagũ yigũiji ï. Ito bajiri ïjuare mani gãijja quena.

<sup>6</sup>Co ñujamocõ minia mani ïsija niyeru juatiacã senirã yirãji mani. Queno waja mama ïnaõna. Queno waja mana ïna ñabojarocati sigũ ïnare ãcaboja yibiquiji Dios. ïnare queno tirũngũ yigũiji Dios. <sup>7</sup>Manire cuni queno tirũnũami Dios. Mani ya joare cuni, “Itocõ joa cutiami ï”, yi masiami manire. Ito bajiri tuoïa oca jãibitirũja manire. Minia rãtoro ñasarã ña mani, Dios ï tija, yiyijũ Jesús ïnare.

**“Jesure masigũ ña yũ”, mũa yi bojobeja quena, Jesús ï yire gaye**

*(Mt 10.32-33; 12.32; 10.19-20)*

<sup>8</sup>Ado bajiro mũare gotia yũ: No masa riojo, “Jesure masia yũ, ito yicõri ïre rũcũbuõa yũ”, yigũre, yũ Masa Rïjorũ cuni, “Masia yũ ïre”, yigũ yigũja yũ ángel mesa ïna tiro riojo. <sup>9</sup>No “Jesure masibeã yũ”, ï yija, “Masibeã yũ cuni ïre”, yigũ yigũja yũ ángel mesa tiro riojo.

<sup>10</sup>No yũ Masa Rïjorũre, busitugũ ñabojaguti, “Ñeñaro yũ yirise yũre ãcabojoya”, ï yija tucõri, ïre ãcabojojũ yigũiji Dios. Ito bajibojarocati no Espiritu Santore busitugũreama ï ñeñaro yirisere ãcabojo masibiquiji Dios.

<sup>11</sup>Minijuarã wijũ mũare ãmi warã yirãji, ujarã riojo, “Ñanare seti ña”, yirona. Ito bajiro ïna yibojarocati, “Ado bajiro cudicũja yũ”, yi tuoïa

usirio yibeja. <sup>12</sup>Mua busiroti iti eja waja, Espiritu Santo muare ejabuagu yiguñji mua queno busi masitoni, yiyijũ Jesús ñare.

### Gajeonire mani seobeja quena, Jesús ï yire gaye

<sup>13</sup>Ito bajiro ña baji ñaroca masa wato gagũ sīgũ ado bajiro yiyijũ Jesure: —Yũre riasogu, gũa jacũ ï rucogore gudarecona jidicãjaro yũ rijora yũre, ïre gotiya yiyijũ ï Jesure.

<sup>14</sup>Ito bajiro ï yija Jesujuama ado bajiro cãdiyijũ ïre:

—Ito bajiro yirocure meje ado yũre cũni yũ jacũ, yiyijũ Jesús ïre.

<sup>15</sup>Ito yicõri gaje ado bajiro gotiyijũ Jesús ñare:

—Queno tuoïaña mua gãjerã ya gajeoni ñobe yirona. Gajeoni jairo mani rucõja, jabetacã mani rucõja cũni no yibeja. Bũto ñasarise meje ña gajeoni, yiyijũ Jesús ñare.

<sup>16</sup>Ito bajiro ñare goticõri ado bajiro ñare oca goti masioyijũ Jesús:

—Sīgũ gajeoni jaigũ ñayijũ. Ì ñari sita gaye ote queno rica cutiyijũ.

<sup>17</sup>Ito bajiro ï ya ote rica cutija ticõri, ado bajiro tuoïayijũ ï: “¿Yũ ya ote jaje bucuarisere no bajiro cũgũ yigũjada yũ?” yĩ tuoïayijũ ï. <sup>18</sup>Gajereama ado bajiro tuoïayijũ ï: “Mutari wiri seora wiri jana batecũja yũ. Ito yicõri curi wiri menicũja. Ito bajiro curi wiri menicõri yũ ya ote seocũja yũ, ito yicõri yũ gajeoni cutirise cũni. <sup>19</sup>Iti gajeoni yũ seorise jaje rodori ñagũ yigũja yũ itina. Ito yicõri queno ñacõagũ yigũja yũ ïja. Yũmasiti queno bacũja yũ. Idicũja yũ”, yĩ tuoïayijũ ï. <sup>20</sup>Ito bajiro yĩ ï tuoïabojarocati, ado bajiro yiyijũ Dios ïre: “Queno tuoïabicũ ña mũ. Adi ñamiti godagũ ya mũ. Ito bajiri jeyaro mũ seobojarise gãji ye ñaro yiroja”, yiyijũ Dios ïre, yĩ gotiyijũ Jesús ï rãca riasotirãre. <sup>21</sup>Ito bajiro rêtaro yiroja sīgũ ï gajeoni cutirise ï seomucutija. Ito bajiro ï yija Dios tũjũ ñe bujabiquĩji ïocũ. Dios ï tija waja mami, yiyijũ Jesús ñare.

### Ì rĩa masare tirũnugũ yiguñji Dios, yĩ Jesús ï riasore gaye (Mt 6.25-34)

<sup>22</sup>Mũcana tũdi ado bajiro yiyijũ Jesús ï rãca riasotirãre:

—“¿Mani catirã baroti, no bajiro bujarãti mani?” yĩ tuoïa usirio yibesa. Ito yicõri, “¿No mani sãñaroti bujarãti mani?” yĩ tuoïa usiriobesa. <sup>23</sup>Bare rêtõ busaro ñasarise ña mani catirise. Ito yicõri yutabujuri rêtõ busaro ñasarise ña mani ya rujũ. Ito bajiri manire rujeorũ ñari mani ña masitoni bare, yutabujuri cũni ïsigũ yiguñji Dios. <sup>24</sup>Ãiriare tuoïate mua. Weseca menicõri ote otecõri babiticã ña. Ito yicõri ote rica bujacõri ña seoroto manõja ñare. Ito bajibojarocati Dioama queno ecaguñji ñare. Dios ï tija wũtirã rêtõ busaro ñasarã ña mani. <sup>25</sup>“Yoari cati ãmoa yũ”, yĩ mani tuoïabojaja cũni, “Itocõ catigũ yigũja yũ”, yĩ masibea mani. <sup>26</sup>“Itocõ catigũ yigũja yũ”, mani yĩ masibea gaje gaye cũni tuoïa usiriobiticõrũja manire, yiyijũ Jesús ñare.

<sup>27</sup>Gaje, go iti judi mũjarise tuoïate mua. Judi mũjacõri moabetõja iti. Ito yicõri iti sãñaroti cũni ãmabetõja. Ito bajibojarocati yũ Salomõn ñayora

seyorise ĩ sãñare rētoro seyorise ña go. <sup>28</sup>Nocõ mejeti ñacũ go. Gaje rumũti ũmacañi ĩ asirisenati siniacoacũ. Ito bajibojarocati seyorise cũñi Dios itire. Go rētoro ñasarã ña mani. Ito bajiri ĩre queno tuorũnurã meje ñabobarocati queno tirũnũgũ ñari mua sãñarotire muare jidicãgũ yiguĩji Dios. <sup>29</sup>Ito bajiri, “¿Gua sãñaroti, gua baroti no bajiro bujarũjati?” yi tuoĩa usiriobiticõrũja muare. <sup>30</sup>Ito bajiro tuoĩa usirio ñama adi macãrucũro gãna. Manireama mani jacũ sigũti ñami. “Adi ma ĩnare. Adire ãmoama ĩna”, yi masiguĩji ĩ. <sup>31</sup>“Dios masa jeyaro Uju ĩ rotiro bajiro yicũja yũ”, mani yija, iti ña ñasarise gaye. Ito bajiro mani yija mani ãmorise ĩsigũ yiguĩji Dios manire.

**Ũmacũju Dios tu quenarise mani bujaroti gaye**  
(Mt 6.19-21)

<sup>32</sup>Gũibesã yũ coderã mua. Coriarãti ña mua. Ito bajibojarocati ĩ rotiroju mua ejare buto ãmoami ĩ mani Jacũ. <sup>33</sup>Mua rucorise gãjerãre ĩsima. Iti waja bujacõri bojoro bujarãre ĩsima mua. Ito bajiro mua yija jai busaro Dios tu bujarã yirãji mua. Itoju mua bujaroti jogarise meje ñaroja. Ito yicõri itoju mua bujarise ñimũjua rinibiquĩji. Ito yicõri mua bujarisere butua bamenaji. <sup>34</sup>No mani gajeoni cutiroju iti tu ñarona buto tuoĩarã yirãji mani, yiyiju Jesús ĩnare.

**Quenaro ña yucãña mua, Jesús ĩ yire gaye**

<sup>35</sup>Quenaro ña yucãña mua, jeyaro mua rētaroti gaye yari. <sup>36</sup>Ĩna uju ãmo siare basa ti tĩo, budi wadicõri ĩna bocati ñado robo bajiro ña yucaña mua. Soje tu ĩ ejaroca jana yucãdo bajiro ñacãña mua. <sup>37</sup>Queno ña yucõri ĩna uju ĩ ejaja ticõri, queno wanurã yirãji ĩna. Ito bajiro ĩna bajija ticõri, “Rujija muare ecagu ya yũ”, yigu yiguĩji ĩ, ĩnare wanũgũ. <sup>38</sup>Ñami gudareco, busurijua cuni, ĩ ejaroto riojua ĩna ña yucãja wanurã yirãji ĩna. <sup>39</sup>Adi yũ gotirisere ãcabojabeja mua. Sigũ wi gagũ, “Itocõ tujaroca ejagu yiguĩji riniri masũ”, ĩ yi masija, ña yucãborũ ĩocũ, riniri masũ sãjacõri rinime yirocũ. <sup>40</sup>Itioni bajiroti queno ña yucaña mua cuni. “Adocõ ejagu yiguĩji Masa Rĩjoru”, mua yi masibiti rumũ ejagu yiguĩji. ĩti ña yũ Masa Rĩjoru, yiyiju Jesús ĩnare.

**¿No bajiro bajiguĩjida queno tuoĩagũ? yi Jesús ĩ riasore gaye**  
(Mt 24.45-51)

<sup>41</sup>Ito ĩ yija tuocõri, Pedro ado bajiro ĩre seniĩayiju:  
—Yũ Uju, ¿ito bajiro oca mũ goti masiorise, gua ye riti ñati? ¿Masa jeyaro ye ñatite? yiyiju ĩ Jesure.

<sup>42-44</sup>Ito bajiro ĩ yija tuocõri, ado bajiro cũdiyiju mani uju ĩre:  
—¿No bajigu ñati tuo masicõri ĩ ujure queno moa ĩsigũ? Tite mũ. Ado bajirojua bajiami ĩocũ. ĩ uju ĩre wiju cũgũ yiguĩji ĩ codetoni, ito yicõri gãjerã ĩre moa ĩsiri masare bare ĩ ecatoni. Sigũ moa ĩsiri masũ, ĩ rotiado bajiroti ĩ moagore ti ejacõri wanũgũ yiguĩji Uju ĩre. Uju ĩ rotiado bajiroti ĩ moaja ticõri, jeyaro tirũnũri



masu cūgū yiguūji ī ito bero. <sup>45</sup>Ito bajibojarocati, “Coji ejabiquūji yu ɸju maji”, yi tuoīacōri ire queno moa īsibiquūji. Ado bajiro yigu yiguūji. Gājerā ī rāca moari masare sēoro īnare rotigu yiguūji. Ūmuare romiare cūni, ito bajiro yigu yiguūji ī. Ito yicōri bare ba, idi mecu yigu yiguūji. <sup>46</sup>Ito bajiri, “Jane ejagu yiguūji yu ɸju”, ī yibiti rāmū ire ejabiagu yiguūji ī ɸju. Ī ito yire waja buto waja senigū yiguūji ire. Ito yicōri queno cūdimenare ī moa rotiado bajiro ire cūni moa rotigu yiguūji ī.

<sup>47</sup>Ī ɸju rotirise yiro robo yi masibojaguti ī nā yucābeja, ito yicōri yiro robo ī yibeja ī ɸju buto bajegu yiguūji ire. <sup>48</sup>“Ado bajiro āmoami yu ɸju”, yi masibicu nari, ī ɸjūre queno ī cūdi masibeja, ito yicōri yiro robo ī yibeja buto bajebiquūji ī ɸju ire. No Diore ī cūdiroca yigu buto busa ī cūdire āmogū yiguūji Dios. No ire tuorūnuroca ī yigu buto busa ī tuorūnure āmogū yiguūji Dios, yiyiju Jesús ī rāca riasotirāre.

**Yure mua tuorūnūja ticōri, muare ti junisinirā yirāji, Jesús ī yire gaye**  
(Mt 10.34-36)

<sup>49</sup>Masa yure īna tuorūnūtoni adi macārucūroju wadiru nā yu. Coriarā yure tuorūnūrā yirāji. Gājerā tuorūnūmena yirāji. Sīgūre bajiro tuoīamena nārā yirāji īna. Yure rētaroti nābojarocati iti rētaja quena yure. <sup>50</sup>Jaje quenabeto tōbujagu yiguja yu. Iti rētaroto riojua buto tuoīa usirioa yu. <sup>51</sup>“Masa jeyaro, sīgū ruyabeto oca mano īna nātōni wadiru nāmi ī”, yi tuoīaboja mua yure. Bajibea. Yu oca tuocōri sīgūre bajiro tuoīamena yirāji masa. <sup>52</sup>Jane adi rāmūna ado bajirojua nārā yirāji masa. Co dūjamocō nārā ɸdiarā yure tuorūnūrā yirāji. Gājerā tuorūnūmena yirāji. Yibeja, ɸdiarā yure tuorūnūbiticōri jūarā yure tuorūnūrā yirāji gajea. <sup>53</sup>Jacu yure ī tuorūnūja, macu tuorūnūbicu yiguūji. Macu ī tuorūnūja, jacu tuorūnūbicu yiguūji. Jaco iso tuorūnūja, maco tuorūnūbeco yigōji. Maco iso tuorūnūja jacu tuorūnūbeco yigōji. Mañicō iso tuorūnūja, jējo tuorūnūbeco yigōji. Jējo iso tuorūnūja, mañicō tuorūnūbeco yigōji. Yu oca tuocōri sīgūre bajiro tuoīamena yirāji masa, yiyiju Jesús ī rāca riasotirāre.

**“Queno yirā nā gua”, yibojarāti mua tuoīaro bajiro yibeja mua,**  
**Jesús ī yire gaye**  
(Mt 16.1-4; Mr 8.11-13)

<sup>54</sup>Gaje ado bajiro goti remoyiju Jesús masare:

—Ūmacañi ruji waro ide bueri iti mūja wadija ticōri, “Ide quediro wadia”, yi masia mua. Mua yiro bajiroti quedia iti. <sup>55</sup>Wesicajuare mino iti wēa mūocōaja ticōri, “Asiro wado ya”, yi masia mua. Mua yiro bajiroti bajia iti. <sup>56</sup>Macārucūro gaye ticōri, “Ado bajiro rētaro yiroja”, yi masia mua. ¿No yija ito bajiro ti masirā nābojarāti, “Gua nēnaro yirise gua jidicābeja quenabeto tōbujarā yirāji gua”, yi masibeati mua? “Queno yirā nā gua”, yibojarāti mua tuoīaro bajiro yibeja mua, yiyiju Jesús īnare.

**Gãji rãca mua oca josaja, oca quenoja quena, Jesús í yire gaye**  
(Mt 5.25-26)

<sup>57</sup>“Ado bajiro yija quena manire”, yi tñoia mua. Ito bajibojarocati “Quenarise riti yiruja mani”, yibea mua. <sup>58</sup>Gãji muare í seti yija, oca quenori masu taju mua waroto riojua oca quenoña. Oca quenori masu tu ejamenati mua oca queno masibeja porecia tu muare ãmi wacu yiguíji. Ñna poreciaju muare tubiarã yirãji. <sup>59</sup>Ñeñaro mua yigore mua waja yibeja, budimena yirãji mua. Ito bajiroti baja. Ito bajiri Dios í waja seniri rumu ejaroto riojua í rãca oca quenoña. Mua quenobeja í waja seniri rumu muare jeame ñjuroju cõagũ yiguíji. Ito yicõri í cõaja bero macana tãdi budire ma, ya yu muare, yi gotiyiju Jesús ñnare.

**Diore mani tuorũnaja iti ña ñasarise, Jesús í yire gaye**

**13** <sup>1</sup>Iti rumuriti ado bajiro Jesure gotirã ejayjarã masa:  
—Galilea gãna Diore rucuburona waibucurã síacã ñna. Ito bajiro waibucurãre ñna síaja bero Pilatojuama ñnareti sía rotiquí í ñja. Ito bajiro yicõri waibucurã ya rí rãca ñna ya ríre wõoquí í ñja, yi goti ejayjarã ñna Jesure.

<sup>2</sup>Ñna ito yija tuocõri, ado bajiro yiyiju Jesús:

—¿No bajiro tñoiati mua? “Gãjerã Galilea gãna rëtoro ñeñaro yirã ñacã ñna. Ito bajiri goda jediyjarã ñna”, ¿yire masiati mua? <sup>3</sup>Meje ito bajiro meje baja. Ado bajiro ya yu muare: Muare cuni mua ñeñaro mua yirise mua jidicãbeja, ito bajiroti godarã yirãji mua cuni. <sup>4</sup>“Jerusalénju ñmari wi Siloé wame cutiri wi dieciocho ñarã ñna juja quedi godaja, gãjerã Jerusalén gãna rëtoro seti ñadoja ñnare”, ¿yi tñoiati mua? <sup>5</sup>Meje, ito bajiro meje ya yu. Mua ñeñaro yirise mua jidicãbeja, ito bajiro rëtarõ yiroja muare cuni, yiyiju Jesús masare.

**Higueragu rica manigũ gaye Jesús í gotire**

<sup>6</sup>Ito bero masare goti masiore ocana ado bajiro gotiyiju Jesús:

—Sígũ higuera wame cutiricu í oteragu tigu wayiju, “¿Rica cuticuatí?” yirocu. Rica manigũti ti ejayiju í itigure. <sup>7</sup>Ito bajija ticõri, í ya wese coderi masure ado bajiro yiyiju: “Tite. Udia rodoju coji ruyabeto rica ãmigũ ejasotiboja yu. Rica ma itigu. Quëacãcõña. Rica cutia yiro meje ña ajea itigu”, yiyiju í, í ya wese coderi masure. <sup>8</sup>Ito bajiro í yija tuocõri: “Yu ñju, ito ñacõato maji. Sita seacũgũ ya maji. Ito yicõri quenarise itigure tucuja yu. <sup>9</sup>Ito yija rica cutiro yiroja gajea. Iti rica manija, quëacõre ñaro yiroja”, yiyiju í, í ñjũre. Ito bajiroti baja. Sígũ, “Diore tuorũnugũ ña yu”, yibo jaguti í ñeñaro yirise í jidicãbeja ticõri, ñre waja senigũ yiguíji Dios, yi gotiyiju Jesús ñnare.

### Tujacāra r̄m̄u cōgōre Jesús ī yisiore gaye

<sup>10</sup> Co r̄m̄u tujacāra r̄m̄u judio masa īna minijuasotiri wij̄u riaso ñayij̄u Jesús. <sup>11</sup> Ito ī yiroca sīgō ñayijo dieciocho rodori cō tujago. Ito bajiri isore ruja mutiḡū ñaroca yiyij̄u r̄m̄ú. Ito bajicōri riojo rūgō masibisijo iso. <sup>12</sup> Isore ticōri isore busirocu ji ñucayij̄u Jesús:

—Romio m̄ure quenoa yu. M̄u ñarise cutirise ma m̄ure ĩja, yiyij̄u Jesús isore.

<sup>13</sup> Ito yicōri isore āmo moa jeoyij̄u Jesús. Ito ī yirocati riojo rūgūcoayijo iso ĩja. Ito bajiri Diore rūc̄ubugo wan̄ure ocana ĩre busis̄uoyijo iso.

<sup>14</sup> Tujacāra r̄m̄u Jesús isore yisioja ticōri, iti wi minijuara wi ̄j̄u Jesure junisiniyij̄u. Ito bajiri ado bajiro yiyij̄u ī masare:

—Co āmojeno r̄m̄uri ña moaroti r̄m̄uri. M̄ua yisio roti āmoja iti r̄m̄uri wadija quena, tujacāra r̄m̄u meje, yiyij̄u ī masare.

<sup>15</sup> Ito bajiro ī yija t̄uocōri, ado bajiro c̄diyij̄u mani ̄j̄u ĩre:

—“Tujacāra r̄m̄u moare ma”, yi bojarāti moarāji m̄ua. Tite. Tujacāra r̄m̄u ñabojarocati m̄ua ya wecu m̄ua ya burro ide iditoni ōja m̄ua.

<sup>16</sup> Adio ñamo mani ñic̄u Abraham janerābatia janeño. Dieciocho rodori iso cō ñaroca yiñi r̄m̄úa ̄j̄u Satanás. ¿Tujacāra r̄m̄u ñabojarocati isore yu yisioja quenabetojada? yiyij̄u Jesús ĩre.

<sup>17</sup> Ito bajiro Jesús ī busija t̄uocōri, ī wajana ĩre bojo tiyijarā ĩna. Masama jeyaro tiyamani Jesús ī ĩoja ticōri, buto wan̄u quenayijarā ĩna.

### Ado bajiro baja mostaza ajeri, yi Jesús ī riasore gaye

(Mt 13.31-32; Mr 4.30-32)

<sup>18</sup> Ito yija m̄ucana ado bajiro gotiyij̄u Jesús masare:

—Īre t̄uor̄ñur̄are ī rotiroj̄u Dios ī miojuja, ¿no bajirojada? ¿Ñe goti masiore ocana m̄uare goti r̄etobuḡujada yu? Bāu, ado bajirojua m̄uare gotic̄uja yu.

<sup>19</sup> Mostaza ajerire t̄uoiate m̄ua. Sīgū ī ya weseca mostaza ajeri oteyij̄u. Gaje ote ajeri r̄etoro mutacā busa ña iti mostaza ajeri. Ito bajiro mutacā ñabojaroti buc̄ua wato gaje ote yucuri r̄eto busaro jajocu ñaroja itigu. Jajocu itigu ñajare itigu r̄ujarij̄u minia jib̄u menirāji ĩna. Itire bajiroti Dios mani ̄j̄u ī ñaja, ḡajer̄are goti āmorāji mani, jājarā busa ĩre masirā ĩna ñatoni, yiyij̄u Jesús ĩnare.

### Ado bajiro baja naju wadarise uco, yi Jesús ī riasore gaye

(Mt 13.33)

<sup>20</sup> Gajereama ado bajiro yiyij̄u Jesús ĩnare:

—Īre t̄uor̄ñur̄are ī rotiroj̄u Dios ī miojuja, ¿no bajirojada? Ado bajiro goti masiorena m̄uare gotia yu. <sup>21</sup> Romio pan menigō waco udia coacō pan menire gaye āmiyijo iso. Ito yicōri wadarise uco w̄uoyijo iso. Ito bajiri iso w̄oja jairo wadayij̄u iti. Itire bajiroti bajiro yiroja, “Īre t̄uor̄ñur̄are ī rotiroj̄u miojuḡu yiguñi Dios”, masare mani yi riaso ucuja. Ito bajiri jājarā busa ĩre t̄uor̄ñu warā yirāji ĩja, yi riasoyij̄u Jesús masare.

**Eyabiti soje ña Dios tu sājara soje, yi Jesús i riasore gaye**  
(Mt 7.13-14, 21-23)

22 Ito yija Jesús Jerusalénju wasuoyiju mucana mana. Wacu riti cutori i eaja masare riaso rêta wayiju i. 23 Ito bajiro i riaso rêta waroca sīgũ ire seniīayiju:

—Yu Ʋju, ¿coriarāreti, masogũ yiguījida Dios? yiyiju i Jesure.

Ito bajiro i yija tuocōri, ado bajiro cudiyiju Jesús:

24 —Masa jeyaro meje Dios i ñaroju sājarā yirāji ñna. Ito bajiri ñeñaro mua yirise jidicāña mua, “Dios ñaroju sājana gua”, yirona. Jājarā sāja āmobarā yirāji ñna. Ito bajibojarocati coriarāti sājarā yirāji. 25 Ado robojua baja. Dios i ñaroju i biaja, macūjuju mua ñaja, sāja masimena yirāji mua. “Gua Ʋju, guare soje jana ĩsiña”, yibojarā yirāji mua. “Meje yu ñarā meje ña mua. Mũare masibea yu”, yigu yiguīji Dios. 26 Ito bajiro i yija tuocōri, ado bajiro cudibojarā yirāji mua: “Mu rāca bacu gua. Mu rāca ñacu gua. Ito yicōri gua ya cutoriju masare riaso ucucu mu”, yibojarā yirāji mua. 27 Ito bajiro mua yibojarocati ado bajiro mũare cudigu yiguīji i: “Mũare masibea yu. Yu tu ñabesa mua. Ñeñaro yi jairā ña mua”, yigu yiguīji i, ya yu mũare. 28 Dios i rotiroju sāja masimena yirāji mua. Abraham, Isaac, Jacob, ito yicōri Diore goti ĩsiri masa ñayoana i tu ñna ñaja tibojarā yirāji mua. Ito bajibojarocati ñna tujju eja masimena yirāji mua. Mũare cōacōgũ yiguīji Dios. Ito bajiri sāja masibiticōri ruje otirā yirāji mua. Ito yicōri buto tōbujarā ñari mua ya guji cuni canamũorā yirāji. 29 Co sita gāna ruayabeto Dios i rotiroju ejacōri minijua barā yirāji. Ñna rāca sāja masibiticōri ti bujatomena yirāji mua. 30 Adoju coriarā ñasari masa ñarā, itoju ñasari masa meje ñarā yirāji ñna. Ito yicōri adoju coriarā ñasari masa meje ñarā itoju ñasari masa ñarā yirāji ñna, yiyiju Jesús ñnare.

**Jerusalén gānare tuoīa maigũ Jesús i otire gaye**  
(Mt 23.37-39)

31 Iti rumuti Jesure oca gotirā ejayijarā fariseo gaye tuoīarā:

—Rudi wasa adijure. Herodes mũre sīa āmoami, yiyijarā ñna Jesure.

32 Ñna ito bajiro yija tuocōri:

—Ĩ ñeñaro yi jaigũre ado bajiro gotitēña mua: “Tũoya jane, jane busuri cuni cōrāre yisiocuja yu. Rūmú sāñarāre cuni rūmũare bucōacuja yu. Ito yicōri, ija sōjua moa tiogũ yiguja yu, yimi”, yi gotitēña mua Herodesre, yiyiju Jesús fariseo gaye tuoīarāre. 33 Jane, jane busuri, gaje rumu cuni Jerusalénju ware ña yure. Jerusalénju godagu yiguja, jājarā Diore goti ĩsiri masa ñna godado bajiroti, yiyiju Jesús ñnare.

34 Jerusalén gānare tuoīagũ, ado bajiro busiyiju Jesús:

—Diore goti isiri masare s̄ayija mua. M̄are oca gotitoni Dios ī cōanare c̄uni ḡta reayija mua. Coji meje m̄are mioju āmobjacu yu. Cara iso r̄iare caero rocaju iso miojuro bajiro, m̄are yi āmobjacu yu. Ito bajiro yu yi āmobjarocati āmobicu mua. <sup>35</sup>Queno t̄oĩaña mua. Mua wiri wagora wiri bajiro tujaro yiroja. Ito yicōri m̄are jidicāgū yiguūji Dios. Riti ado bajiro m̄are gotia yu. “Ḡare yiari Dios ī cōaru ña m̄. M̄are queno yiñi Dios”, mua yiroto riojua m̄cana juaji yure timena yirāji mua, ya yu m̄are, yiyiju Jesús masare.

### Rujuri mijigūre Jesús ī yisioire gaye

**14** <sup>1</sup>Co r̄amu tujacāra r̄amu fariseo gaye t̄oĩarā uju tu bagu wayiju Jesús. Gājerā fariseo gaye t̄oĩarā, “¿No bajiro yigu yiguūjida Jesús?” yi t̄oĩayijarā ña. <sup>2</sup>Ito bajiro Jesús ī baji ñaroca, s̄igū rujuri mijigū ejayiju ī tu. <sup>3</sup>Ī ejaja ticōri, judio masa rotirise riasori masa, ito yicōri fariseo gaye t̄oĩarāre ado bajiro seniñayiju Jesús ñare:

—¿Cōgūre tujacāra r̄amu ñaroca mani yisioja quenati? yiyiju Jesús ñare.

<sup>4</sup>Īnama c̄udibisijarā. Īna c̄udibeja ticōri, cōgūre moaiacōri ĩre yisioyiju. Ito yicōri, “Wasa m̄”, yiyiju ī ĩre. <sup>5</sup>Ito yicōri fariseo gaye t̄oĩarāre, ado bajiro yiyiju Jesús:

—“Tujacāra r̄amu moare ma”, yibojarāti moarāji mua. Tite. S̄igū mua macu, ito yicōri ecaru wecu ide gojeju ī quedi s̄ajaja, yuari mejeti āmimorāji mua ĩre, tujacāra r̄amu ñabojarocati, yiyiju Jesús ñare.

<sup>6</sup>Ito ī yija t̄ocōri, no bajiro c̄udi masibisijarā ña.

### Ado bajiro bajiamā āmo siare basa tiri masa, yi Jesús ī riasore gaye

<sup>7</sup>Barā ejari masa cumurori r̄ucub̄oraju riti ña ruji āmoja ticōri, ado bajiro goti masioyiju Jesús ñare:

<sup>8-9</sup>—S̄igū āmo siare basa titoni ī jija, buto r̄ucub̄oraju meje rujiba mua. Buto r̄ucub̄oraju mua rujija, gāji mua bero ñasari masu ī ejaja ticōri, m̄are oca cōari masu, ado bajiro yigu yiguūji: “Bau wum̄ña, ānijua ñami ñasari masu, ĩjua mua godo rujijaro”, yigu yiguūji. Ito bajiro ī yija t̄ocōri, masa tiro riojo bojo bujarā yirāji mua, ī ito yija. Ito yicōri susari cumuroju r̄ucub̄oraju meje masa tu rujirā yirāji mua. <sup>10</sup>Ado bajirojua mua yija quena. Gāji m̄are oca cōaja buto r̄ucub̄oraju meje rujiba. Ito bajiro mua yija m̄are oca cōari masu, ado bajiro yigu yiguūji: “Yu baba r̄ucub̄oraju busa rujija m̄”, yigu yiguūji ī m̄are. Ito bajiro m̄are ī yija, mua rāca gāna ti r̄ucub̄orā yirāji ña m̄are. <sup>11</sup>“Masa r̄etoro ñasagu ña yu”, yigu, ñasari masu meje ī ñaroca yigu yiguūji Dios ĩre. Gājiama, “Gājerā r̄etoro ñasagu ña yu”, yibicu, Ī ñasari masu ñaroca yigu yiguūji Dios ĩre. Ito bajiri, “Gājerā r̄etoro ñasagu ña yu”, yi t̄oĩabitiruja manire, yiyiju Jesús ñare.

<sup>12</sup>Ito yicōri ado bajiro yiyiju Jesús ĩre oca cōarure:

—Gājerāre m̄ ba roti āmoja, m̄ baba mesa, m̄ ocabajirā, m̄ tu gāna, ito yicōri gajeoni jairāre, “Barā waya”, yibeja. Īnare riti m̄ jija, “Yure c̄uni bare eca gāmejarō ña”, yigu bajiro ya m̄. <sup>13</sup>Ito bajiri ito bajiro t̄oĩabesa itire.

Ado bajirojua mu yija quena. Gajeräre, “Barã waya mua”, mu yi ämoja bojoro bujarājuare mu jija quena. Ruduana, queno wa masimena, ito yicöri cajea timenare cuni mu jija quena. <sup>14</sup>Ito bajiro ñare yicöri queno wanu quenagũ yiguja mu, “Yure waja yiado mama ña”, yirocu. “Diojua yure waja yigu yiguiji ire tuorünurã tãdi catiroca i yiri rumu”, yi tuoïacöri wanugũ yiguja mu, yiyiju Jesús ire.

**Basa bucũ gaye Jesús i riasore gaye**

*(Mt 22.1-10)*

<sup>15</sup>Iti tuocöri sigũ Jesús räca ba rujigu, ado bajiro yiyiju:

—No Dios rotiroju ba ejagu, wanu quenagũ yiguiji, yiyiju i Jesure.

<sup>16</sup>Mucana gaje goti masiore ocana ado bajiro gotiyiju Jesús ñare:

—Co rumu sigũ basa bucũ menigũ jãjarã masare, ji ñucayiju. <sup>17</sup>Basa ñasuroca ire moa isiri masure, “Masare jitëña. Itocö ña waju ñja”, yiyiju i, i ya moari masure. <sup>18</sup>Ñare i gotibojarocati, “Bujato baja no masia ma guare. Wado ma guare, moare jaje ña”, yiyijarã ña. Sigũ ado bajiro yiyiju: “Canuti sita coju waja yibu yu. Ito bajiri itire tigu wacu ya yu”, yiyiju sigũ ire. <sup>19</sup>Gãji ado bajiro yiyiju: “Co ñajamocö babari wecua waja yibu yu. Ito bajiri ñana moaïasugũ wacu ya yu. Ito bajiri josabesa yure. Wado ma yu”, yiyiju i. <sup>20</sup>Gãjiama ado bajiro yiyiju: “Canuti manajo bujabu yu. Ito bajiri wa masia ma yure”, yiyiju i, ñare jigu ejabojarure. <sup>21</sup>Ito bajiro ña yija tuo tãdi wacöri, i çjure ñarocöti gotiyiju i. Ito i yija tuocöri, i çju junisiniyiju. Ito bajiri gajerājuare ji roti ñucayiju i mucana ire. “Coji wasa cutoju, çuri mari mutari mari cuni warã mu ti bujaro bajiroti ämi wadiba. Bojoro bujarã, ruduana, cajea mana, wa masimenare cuni ämi wadiba mu”, yiyiju i ire moa isiri masure. <sup>22</sup>I çju rotiro bajiroti yiyiju i. Ito yi, ñare ämi tãdi ejacöri i çjure gotiyiju: “Yu çju mu rotiado bajiroti ya yu. Ito bajibojarocati mu ya wi masa ñajabea maji”, yiyiju i, i çjure. <sup>23</sup>Ito yija i çju ado bajiro gotiyiju ire: “Cuto tunima gãnare, masa mu bocaña buto adoju wadi rotiba, yu ya wi iti ñajaton. <sup>24</sup>Cajero yu oca cöabojana, yu ya wi säjacöri bamena yirãji ña, ya yu mure”, yiyiju i ya moari masure. Ito bajiri Dios ñaroju mua eja ämoja, mua ñaroti gaye riti tuoïabiticöri Diore riti mua tuorünũ suyaja quena, yi oca goti masioyiju Jesús ñare.

**Yure mua tuorünũ saya ämoja josari ñaro yiroja muare,**

**Jesús i yire gaye**

*(Mt 10.37-38)*

<sup>25</sup>Co rumu jãjarã masa Jesure sua wayijarã. Ito bajiro ña baji ñaroca ñare jãda ticöri, ado bajiro yiyiju ñare:

<sup>26</sup>—Sigũ yu räca i riasoti ämoja, i jacusabatia, i manajo, i ria, i ñarã rëto busaro maigũ yiguiji yure. I queno catija, i cöja cuni yure maigũ yiguiji i. <sup>27</sup>Ñëñaro töbujagu yure i tuorünubeja yu räca riasotigu ñabiquiji i.

<sup>28</sup>Ado bajirojua baja. Ñumari wi mua meni ämoja, mua meniroto riojua, “¿Waja tijacuri seyoati?” yirona cöiarã yirãji mua. <sup>29</sup>Ito bajiro mua yibeja menisubojarãti mua töbeja, gajerã muare ticöri ajarã yirãji. <sup>30</sup>Ado bajiro

yi ajarā yirāji īna mware: “Āni ūmugū ūmari wi menisubojaguti tīo masibeami”, yi ajarā yirāji īna mware. <sup>31</sup>Sīgū sita ūju, gaje sita gagu rāca ī gāmeri sīa āmoja, īna gāmeri cana mworoto riojua, ado bajiro tuoīagū yiguīji ī: “¿Yū ya surara diez mil nārā, ī nārā veinte mil nārāre rētocūrā yirājida īna?” yi tuoīagū yiguīji. <sup>32</sup>“Īnare rētocūado ma yū”, ī yija, gaje sita gagu sōju ī tujaroca oca quenori masa cōagū yiguīji ī. <sup>33</sup>Iti bajiroti, mua rucorise maicōri mua jidicā āmobeja yū rāca riasoti masimenaji mua. Ito bajiri yure mua swyaroto riojua mua queno tuoīaja quena, yiyiju Jesús īnare.

### Moa iti ocabeja ñe waja ma, yire gaye

(Mt 5.13; Mr 9.50)

<sup>34</sup>Moa iti ocaja quenarise ña. Iti ocabeja ñe waja manoja iti. <sup>35</sup>Ocabitreama ñe yiya manoja. Ito bajiri itire cōacōrā yirāji masa, iti ocabejare. Ñe waja manoja itioni. Mua gāmo goje cutirā tuo masiña. Yū sīgūre mua tuorūnubeja moa ocabiti waja mani robo bajiro nārā yirāji mua. Ito bajiri yure mua swya āmoja yure riti tuorūnūja quena, yiyiju Jesús īnare.

### Oveja wisarure āmagū yiguīji coderi masu, yi Jesús ī riasore gaye

(Mt 18.10-14)

**15** <sup>1</sup>Jājarā ūjarāre yiari waja seni īsiri masa, ito yicōri ñeñaro yi jairā cūni, Jesús tu minijua wayijarā ī busija tuorona. <sup>2</sup>Īna rāca Jesús ī baba cutija ticōri, fariseo gaye tuoīarā, ito yicōri judio masa rotirise riasori masa cūni Jesure busituyijarā īna:

—Āni Jesús ñeñaro yirāre boca āmiami. Ito yicōri īna rāca bami ī, yi busituyijarā īna īre.

<sup>3</sup>Īna ito yija tuocōri, ado bajiro oca goti masioyiju Jesús: <sup>4</sup>—Mua wato sīgū cien oveja rucogu, sīgū ī wisaja, gājerā noventa y nueve nārāre wago cūgū yiguīji ī, gāji wisarure āmagū wacu. Īre āma bujacōrijū susagu yiguīji ī. <sup>5</sup>Īre bujacōri wanugū, gācojoeju gajagu yiguīji īre. <sup>6</sup>Īre buja tūdi ejacōri ī baba mesare jicōri, ado bajiro yigu yiguīji ī īnare: “Yū rāca wanūña mua. Oveja godarure bujacōmū yū”, yigu yiguīji ī īnare. <sup>7</sup>Sīgū ī ñeñaro yirise ī jidicāja ticōri, buto busa wanūrā yirāji āngel mesa. Jājarā queno yirāre wanūrā ñabobarāti sīgū ī ñeñaro yirise ī jidicāja ticōri, buto busa wanūrā yirāji īna, yiyiju Jesús īnare.

### Romio niyeru cuji ruyuriocōri tūdi iso bujare gaye

<sup>8</sup>Gaje ado bajiro īnare goti masioyiju Jesús:

—Sīgō jua dūjamocō niyeru tiri rucocōri coti iso ruyurioja, sīabusuoragu sīgō yigōji. Roariti iso ya wi tucāgō yigōji. Iti cuji bujacōrijū āmasusago yigōji iso. <sup>9</sup>Iti cuji bujacōri iso baba mesare jigo yigōji iso. Ito yicōri ado bajiro yigo yigōji: “Yū rāca wanūña. Niyeruti godarati bujacōmū yū”, yigo

yigōji iso ñnare. <sup>10</sup>Ito bajiroti ángel mesa cuni buto wanurã yirãji, sigũ ñ ñeñaro yirise ñ jidicãja ticōri, yiyiju Jesús ñnare.

### Ñ macu tũdi ejaja ticōri, ñ ñeñaro yigore jacu ñ ácabojarare gaye

<sup>11</sup>Mucana ado bajiro ñnare goti masioyiju Jesús:

—Sigũ ñayiju jũarã rĩa cutigu. <sup>12</sup>Ñ macu, bero gagu ado bajiro yiyiju ñ jacure: “Cuna ija yu rucoroti gaye adocãtati ñsĩna yure”, yiyiju ñ. Ito ñ yija tuocōri, ñ riare, ñna rucorotire ñnare batoyiju ñ. <sup>13</sup>Ñ batoja bero co rumu ñ macu, bero gagu ñ ya gajeoni miojuyiju. Ito yicōri sõju gaje sitaju wayiju. Itoju ejacōri ñeñaro yicōri ñ ya niyerure jeoyiju ñ. <sup>14</sup>Ito ñ baji ñaroca iti sitaju bare queno mañiju. Ito bajijare ruje ñnocosotiyiju ñ. <sup>15</sup>Ito bajiri sigũ iti sita gagu tu moare ñmagũ wayiju. Moare ñ bujaja bero, iti sita gagu ñ ya yeseare code rotiyiju. <sup>16</sup>Ñiocõ wacu ñna cõareti yesea ñna bariseti ba ñmobjoyiju. Ito ñ bajibojarocati sigũjuama ecabisjarã ñre. <sup>17</sup>Ito baji ñagũju tuõiyiju ñ ñja: “Yu jacu ya moari masa jãjarã ñabojarocati ñna ba ruarise ruyaroja ñnare. Ito ñna bajiroca yũjuama adoju ñnojoga godagu ya yu. <sup>18</sup>Yu jacu tũju tũdi wacu yigũja yu. Ñ tu ejacōri, ado bajiro ñre yicũja yu: ‘Cuna ñeñaro mure yicu yu. Ito yicōri Dios ñ tiro riojo cuni ñeñaro yicu yu. <sup>19</sup>Ito bajiri, “yu macu”, mu yigũcũ meje ña yu. Mure moa ñsiri masu bajiroti ñacũja yu, yigu yigũja yu, yu jacure”, yu tuõiyiju ñ. <sup>20</sup>Ito bajiro tuõiacōri ñ jacu tu tũdi wasuoyiju ñ.

’Sõju ñ tũjaroca ñ jacu ñre ti bujacōri ñre ti maiyiju. Ito bajiri ñmaquedi wacōri ñre jababayiju ñ. Ito yicōri ñre wanũgũ usuyiju. <sup>21</sup>Ñ ito yijare ñ macu ado bajiro yiyiju ñre: “Cuna ñeñaro mure yicu yu. Ito yicōri Dios ñ tiro riojo cuni ñeñaro yicu yu. Mu macu bajiro meje bajia yu ñja”, yiyiju ñ, ñ jacure. <sup>22</sup>Ito ñ yibojarocati ñre moa ñsiri masare ñ ñucacōri ado bajiro yiyiju ñ: “Yutabuju quenarise ñmi wadicōri, sãña mu ñre. Ito yicōri ñmo sãñara bedo, sãña. Ito yicōri guboco cuni ñre sãña. <sup>23</sup>Wecu macu ri jaigure sãña mu. ñre bacōri basa meni, wanu quena yiana mani. <sup>24</sup>Ñni yu macure ‘Godacoaguñi’, yibojacu yu. Catiñi maji. ‘Wisa godacoañi’, yibojacu mani. ñre bujacõa mani”, yiyiju ñ ñre moa ñsiri masare. Ito bajiro ñ rotija tuo wanucōri, basa gaye menisuoyijarã ñna.

<sup>25</sup>’Ito bajiro iti baji ñaroca wesecaju moagũ yiyiju ñ macu ñnasuogu. Tũdi wacu wi tu ñna basaja tuoyiju ñ. <sup>26</sup>Ito bajiro ñna basa ñaja tuocōri, sigũ moa ñsiri masare ñ ñucayiju, “¿No bajiat?” yirocu. <sup>27</sup>Ñ seniñajare ado bajiro gotiyiju ñ: “Mu ocabaji tũdi ejacoami queno cati quenagũ. Ñ tũdi ejajare wecu macu ri jaigure sã rotimi mu jacu”, yiyiju ñ ñre. <sup>28</sup>Ito bajiro ñ gotija tuocōri, junisiniyiju ñ. ñ sãja ñmobeja ticōri, “Sãjaña mu”, yirocu ñre jigũ budi wayiju jacu. <sup>29</sup>Ito bajiro jacu ñ josaja ticōri, ado bajiro yiyiju ñ, ñ jacure: “Mu masia co rodo meje queno cudicōri moa ñsibojacu yu. Ito yu yibojarocati sigũ cabra macu yure ñsibiticu mu, yu baba mesa rãca basa yu menitoni. <sup>30</sup>Ñni mu macu romia rãca niyeru aje baterureama ñ ejaja ticōri, wecu macu jaigu sãyija mu”, yiyiju ñ, ñ jacure.

<sup>31</sup>Ito ñ yija tuocōri, ñ jacu ado bajiro yiyiju: “Yu macu, yu rãca riti ñacu mu. Ito bajiri yu rucorise jeyaro mu ye riti ña. <sup>32</sup>Adi rumuri mu ocabaji ñ tũdi ejaja ticōri, basa menirũja manire. Ito yicōri wanurũja manire. ‘Godacoañi’, yu tuõibojacu





(San Lucas 15.20)

yá. Ito yá yibojarocati catiñi í. Ito yicōri, ‘Wisa godacoañi’, yi t̄oíabojacú mani. Ito mani yibojarureti bújacōa mani”, yiyijú í, í macú ñas̄uorure. Ito bajiroti manire c̄uni boca ámigū yiguíji Dios. S̄igū í ñeñaro yirise jidicāja ticōri, búto wan̄re rāca íre boca ámigū yiguíji Dios, yiyijú Jesús í rāca riasotirāre.

Ūjare roti ísiri masú í rotiado bajiro í yibitire gaye

**16** <sup>1</sup>Mucana í rāca riasotirāre ado bajiro yiyijú Jesús: —S̄igū ñayijú ñiyeru jaigú. Ito bajiri s̄igūre í ya ñiyeru, ito yicōri í ya moari masare c̄uni tir̄un̄ rotiyijú. Co r̄um̄, “M̄u ya ñiyeru m̄u tir̄un̄ rotibojaru m̄u ya ñiyeru aje bategú yami”, yire gaye oca ejayijú í ūjare. <sup>2</sup>Ito bajiri, “¿Riti bajiati iti oca?” yirocú, ji ñucayijú í ūjare íre. Í ejaja ticōri, ado bajiro yiyijú íre: “M̄u moagore, ‘Ado bajiro moacú yá’, yiari gotiya m̄u yare. Ito bero yá rāca moabicú

yigujá mu ĩja. Ito bajiri yu rucorisere tirũnubicu yigujá mu ĩja”, yiyiju ĩ ɛju ĩre. <sup>3</sup>Ito ĩ yija tuocõri, ado bajiro tuoĩayiju ĩ, ĩre roti ĩsiri masu: “Yu ɛju yure ĩ bucõaja, ¿no yicuja yu? Weseri moare queno sēobeá yu. Gãjeräre bare yu seni ruji ucurotire bojo ña yu”, yi tuoĩayiju ĩ. <sup>4</sup>“Yu ɛju yure ĩ bucõaja, ado bajiro yu yijare ãmirã yirãji gãjerã yure”, yi tuoĩayiju ĩ. <sup>5</sup>Ito bajiro tuoĩacõri ĩ ɛjũre waja ruyurioäre jiyiju ĩ. ĩna ejaja ticõri, ĩnare seniĩayiju: “¿Nocõ yu ɛjũre waja ruyurioati mua?” yiyiju ĩ. <sup>6</sup>“Cien ɛyegari roa bare gaye waja ruyurioa yu ĩre”, yi cadiyiju sigũ. Ito ĩ yija tuocõri, ĩna ɛjũre roti ĩsiri masure ado bajiro yiyiju: “Adocãta yoari mejeti cincuenta ɛyegari mure waja yigu ya yu”, yi wõña mu, yi rotiyiju ĩ ĩre. <sup>7</sup>Gãji ĩ ɛjũre waja ruyuriogure, “¿Nocõ waja ruyurioati mu?” yi seniĩayiju. “Cien jibũri trigo ajeri ĩre waja ruyurioa yu”, yiyiju ĩ. “Yoari mejeti ochenta jibũri mure waja yicuja yu”, yi wõña, yi rotiyiju ĩ ĩre. <sup>8</sup>Ito bajiro ĩ yija tuocõri, “Queno yigu meje ñabojaguti tuoĩa masigũ ñami ĩ”, yi tuoĩayiju ĩ ɛju ĩre, yi oca gotiyiju Jesús ĩ rãca riasotirãre. Ito bajiro tuoĩama adi macãrucũro gaye bũto tuoĩarã. Adi macãrucũro gaye bũto tuoĩarã, masare tuocõri waja bũja masiama ĩnaõna. Yure tuorũnũrama ito bajiro yibeama ĩna. “Waja bũja masiana mani”, yi tuoĩacõri bũto ruo masirã ñama adi macãrucũro gaye tuoĩarã, yiyiju Jesús ĩ rãca riasotirãre.

<sup>9</sup>Ado bajirojũa mua yija quena yu tija. Adi macãrucũro gaye mua rucorisena gãjeräre ejabũaya, queno mure ĩna baba cutitoni. Ito bajiro ĩnare mua yija, ũmacũju catitĩnadoju mua ejaroca mure boca ãmirã yirãji ĩna, yiyiju Jesús ĩnare.

<sup>10</sup>No jabetacã rucogu yiro robo ĩ yija, jairo ĩ rucobojaja cuni ito bajiroti queno yigu ñatĩnagũ yiguĩji iocũ. No jabetacã rucogu yiro robo yibicu, ĩ jairo rucobojaja cuni, yiro robo yigu meje ñagũ yiguĩji iocũama. <sup>11</sup>Adi macãrucũro gaye gajeoni jaje rucobojarãti yiro robo mua yibeja, ũmacũju gaye quenarise Dios ĩ cõarise cuni boca ãmimena yirãji mua. <sup>12</sup>Gãjerã ye gajeoni queno mua tirũnubeja mua ye ñarotire cuni queno tirũnũmena yirãji mua. Ito bajiri queno mure ĩsibicu yiguĩji Dios, yiyiju Jesús ĩnare.

<sup>13</sup>Cocati mani ɛjarã jũarãre cudi masibeá mani. Jũarã ĩna ñaja sigũre queno ti maicõri, gãjire ti tudirã yirãji mani. Sigũre queno cudirã yirãji mani. Gãjire queno cudimena yirãji mani. Iti robo bajiroti Diore mani cudija, niyerujuare bũto tuoĩamenaji mani. Niyerure riti mani bũto tuoĩaja Diore queno cudisabeá mani, yiyiju Jesús ĩ rãca riasotirãre.

<sup>14</sup>Ito bajiro Jesús ĩ busija, fariseo gaye tuoĩarã tuo rujijjarã. ĩna ñayijarã niyerure bũto mairã. Ito bajiri Jesure aja tudijjarã ĩna. <sup>15</sup>Ito bajiro ĩna aja tudi rujija ticõri, ado bajiro yiyiju Jesús ĩnare:

—Masa ĩna tiro riojo riti, “Queno yirã ña gũa”, yiboja mua. Ito bajiro mua tuoĩabojarise masicõguĩji Diojũama. “Ñasarise ña”, masa ĩna yi tuoĩabojarise, ñasarise meje ña, Dios ĩ tija, yiyiju Jesús ĩnare.

### **Dios ĩ rotirise ñatĩnaroti ña, Jesús ĩ yire gaye**

<sup>16</sup>Juan masare ĩ riasoroto riojũa, Dios ĩ rotirise, ito yicõri ĩre goti ĩsiri masa ĩna ucare gaye riti ñayiju maji masa ĩna tuoroti. Ito bero adi

rũmũriama, “No ãre tuorũnrãreti ã rotiroju miojugu yigũiji Dios”, yi riasore gaye ña ãja. Jãjarã ado bajiro tuoãbojarãji mua: “Yũrioti ado bajiro yũ yija Dios ã rotiroju ejagu yigũija yũ”, yi tuoãbojarã jãjarã ñama, yiyiju Jesũs ãnare.

<sup>17</sup>Adi tuti adi macãrucãro cũni coji jedibetoja. Ito yicõri Dios ã rotirise cũni jedibeto yiroja. Ñãtũñaroti ña Dios ã rotirise, yiyiju Jesũs ãnare.

### **Manojore jidicãre ma, yi Jesũs ã riasore gaye**

*(Mt 19.1-12; Mr 10.1-12)*

<sup>18</sup>Sĩgũ ã manoyo ñasũogo rãca isore jidicãcõri gajeo rãca ã manoyo cãtibojaja isore ajegu yigũiji ãocũ. Ito yicõri ã cõarore gãji ã manoyo cãtija, iso rãca ajegu yigũiji ãocũ cũni, yiyiju Jesũs ã rãca riasotirãre.

### **Niyeru jaigu ñabojaru jeame ãjũroju ñeñaro ã tõbũjare gaye**

<sup>19</sup>Mũcana gaje ado bajiro gotiyiju Jesũs ãnare:

—Sĩgũ niyeru jaigu quenarise yutabujuri sãñagũ ñayiju. Co rãmũ rũyabeto ã ãmoro bajiro ã ya niyerure aje batesotiyiju ã. <sup>20</sup>Ito ã baji ñaroca sigũ Lãzaro wame cãtigũ ñayiju bojoro bũjagu. Bũto rujuri camĩ cãtigũ ñayiju ã. Ito bajicõri niyeru jaigu ya, soje tũ macũju rujijiju. <sup>21</sup>Niyeru jaigu ã bagorise barocũ, ito rujibojayiju Lãzaro. Ito ã rujiroca yaia ejacõri, ã ya camire weroyjarã. <sup>22</sup>Co rãmũ bojoro bũjagu godayiju. ã godarocati, ángel mesa ãmi wayjarã ãre Abraham tũ Diore tuorũnrã ãna ñaroju. Ito bero niyeru jaigu cũni godacoayiju ãja. Ito bajiri ãre yujeyjarã masa. <sup>23</sup>Diore tuorũnũbicũ ñari ñeñaro yigoana ãna ñaroju ejacõri bũto tõbũjayiju niyeru jaigu ñabojaru. Ito bajiro tõbũja ñagũ sõju Abraham ñayorũre ti bũjayiju ã. Ito bajiri Lãzaro ã rãcãju ã ñaja ti bũjayiju. <sup>24</sup>Ito bajiri ado bajiro oca sãoro busibojayiju ã: “Ñicũ Abraham yũre ti maiña mũ. Adoju jeame ãjũroju ñeñaro tõbũja yũ. Ito bajiri Lãzarore cõãña, ã ya ãmo wãsoa ide yicõri yũ ya ñemero ide weogu wadijaro. Ito yija jabeto tujari seyoa yũ”, yibojayiju ã Abrahamre. <sup>25</sup>Ito ã yibojarocati ado bajiro cũdiyiju Abraham ãre: “Tũoya yũ janami mũ. Cãtigũ queno ñacãcũ mũãma. Lãzaroreama ã cãtibojaja queno ejabiticũ. Ito bajiri adoju queno ñagũ yami ã. Mũãma ñeñaro tõbũjagu ya mũ itoju. <sup>26</sup>Mani watojoe ãmari goje eyari goje ña. Ito bajiri no yi masia ma manire”, yiyiju ã, niyeru jaigu ñabojarũre. <sup>27</sup>Ito bajiro ã yija tuocõri, ado bajiro cũdiyiju ã: “Tũoya yũ ñicũ mũ. Lãzaro ado ã eja masibeja, cũna tũju wajaro. <sup>28</sup>Itoju ñarãji yũ ñarã, yũ ocabaji mesa. Co dũjamocõ ñarãji ãna. ãnare gotigu wajaro ã, ado ñeñaro tõbũjarajuju ãna ejabe yirocũ”, yiyiju ã Abrahamre. <sup>29</sup>Ito ã yija tuocõri, ado bajiro yiyiju Abraham: “Moisã ñayorũ ã ucayore, ito yicõri Diore goti ãsiri masa ãna ucare ñacã ãnare. Itijua tuorũnrũja ãnare”, yiyiju Abraham ãre. <sup>30</sup>“Meje ñicũ, sigũ godana wato gagũ wacõri ã gotija tuocõri, ñeñaro ãna yirise jidicãrã yirãji ãna”, yiyiju ã. <sup>31</sup>Ito ã yija tuocõri: “Moisã ñayorũ ã gotire gaye ito yicõri Diore goti ãsiri masa ãna ucare gaye ãna tuorũnũbeja, godarã wato ñagũ mũcana cãticõri ã gotibojaja, tuorũnũmena yirãji ãna ãre cũni”, yiyiju Abraham niyeru jaigu ñabojarũre. Ito bajiri Dios ñaro mũa eja ãmoja cãtirãti ñeñaro mũa yirise jidicãcõri Diore tuorũnũña, yi gotiyiju Jesũs ã rãca riasotirãre.

**Ñeñaro mua yi uyaja guiJORISE ña, yi Jesús i riasore gaye**  
(Mt 18.6-7, 21-22; Mr 9.42)

**17** <sup>1</sup>Mucana tãdi busigu ado bajiro yiyiju Jesús i rãca riasotirãre:  
—Co rumu ruyabeto mani ñeñaro yitoni usirioro yi codeami rãmú. Mani ñeñaro yitoni usirioro yigu ñeñaro tóbujagu yiguíji. <sup>2</sup>Jane yure tuorũnusuorã ñeñaro ña yiroca yigu, ñeñaro tóbujagu yiguíji i. Ito bajiri i ya amumaju gütagã räcricã sia yocõri riaca jajosaju rucõaja quena ñre. <sup>3</sup>Itire queno tuoia masiña mua.

‘Sīgũ mua yagu ñeñaro i yija, “Dios tiro riojo queno yibea mu”, yiba ñre. Ito bajiro mua yija tuocõri, i ñeñaro yirise i jidicãja, “Mu ñeñaro yirisere acabojoa gua”, yiba ñre. <sup>4</sup>Co rumure jua amojenocõ muare ñeñaro sigũ i yija, “Muare ñeñaro yibu yu”, i yija tuocõri, “Mu ñeñaro yirisere acabojoa gua”, yiba ñre, yiyiju Jesús.

**Yure mua tuorũnuja mua amoro bajiro rëtarõ yiroja, yi Jesús i riasore gaye**

<sup>5</sup>Co rumu ado bajiro yiyijarã Jesús rãca riasotirã ñre:  
—Mure tuorũnuja gua. Ito bajibojarocati buto busa gua mure tuorũnuroca yiya, yiyijarã ña Jesure.

<sup>6</sup>Ña ito yija:

—Jabetacã yure mua tuorũnuja, jaibiti aje mostaza aje robo bajiro yure mua tuorũnuja, mua rotiro bajiroti bajiroja. Ito bajiri, yucugu Sicómoro wame cutiricure ado bajiro roti masirãji mua: “Mamasiti rudu wacõri itajura gudarecoju rügõña”, yi rotirãji mua. Ito bajiro mua rotiro bajiroti yiroja itigu yucugu, yure mua tuorũnuja, yiyiju Jesús ñare.

**ĩ uju rotiro bajiroti moari masu i cudija quena, Jesús i yire gaye**

<sup>7-9</sup>Gaje ado bajiro gotiyiju Jesús ñare:

—Sīgũ muare moa isiri masu ovejare tirũnucõri i tãdi ejaja, mua riojuajua basuobiquíji. Ado bajiro ñre rotirã yirãji mua: “Bare meni isiña guare. Ito yicõri gua ba rujiroca guare codeya mu. Gua ba tjoja berojua mu baja quena”, yi rotirã yirãji mua. “Iti ña yu ya moare”, yi tuoñacõri mua rotiro bajiroti yigu yiguíji. Ito bajibojarocati biyaro goroama, “Queno ya mu”, yimena yirãji mua ñre. <sup>10</sup>Ito bajiroti mua cuni Dios i rotirisere cudibojarãti, “Ñasarã meje ña mani. Mani uju i ñaja cudiruja manire. Ititi ña, mani ya moare”, yiruja mua, yiyiju Jesús ñare.

**Jua ñujamocõ ruju cami jogarãre Jesús i yisioRE gaye**

<sup>11</sup>Jerusalénju wacu Galilea sita rëtacõri, Samaria sitaju ejayiju Jesús.  
<sup>12</sup>Iti sita, cuto i ejaroca jua ñujamocõ ñmua wadicõri sõ busaju tujayijarã. Ruju cami jogarã ñayijarã ña. <sup>13</sup>Ado bajiro yi awasãyijarã ña Jesure:

—Jesús gua Uju, guare ti maiña, yi awasãyijarã ña.

<sup>14</sup>Ñare ticõri ado bajiro yiyiju Jesús:

—Wasa paiare, mua ya rujuri ñotëña, yiyiju i ñare.

Ito ï yijare wayijarã ñna. Ñna wasuorocati ñna ya cami yaticoayijũ. <sup>15</sup>Sigũ ñna rãca gagu ï ya cami yatija ticõri: “Yũre queno yami Dios. Rẽtoro masigũ ñami Dios”, yi tudĩ wayijũ ï Jesús tujuare. <sup>16</sup>Jesús ta ejacõri rijomunigãna ñini rũjũyijũ ï. Ito yicõri ï ya rio sitajũ muquea ruji wayijũ, “Queno ya mũ”, yirocũ. Judio masũ meje ñayijũ ï. Samaria sita gagũjua ñayijũ. <sup>17</sup>Ï ejaja ticõri, ado bajiro yiyijũ Jesús ïre:

—Jua dujamocõ cami cutirãre yisiobũ yũ. ¿Nojũ ñati gãjerã mũ rãca gãna? <sup>18</sup>¿Mũ Samaria sita gagũ sigũti, “Queno yami Dios”, yirocũ gotigũ wadiri mũ? yiyijũ Jesús ïre.

<sup>19</sup>Ito yicõri gaje ado bajiro yiyijũ ï:

—Wũmũña, wasa. “Jesús yũre yisiogũ yiguũji”, yi mũ tuoĩajare, mũ ya cami yaticoajũ, yiyijũ Jesús ïre.

**¿Nocãta masare Dios ï miojuri rũmũ ejaro yirojada? yi Jesure ñna seniãare gaye (Mt 24.23-28, 36-41)**

<sup>20</sup>Co rũmũ fariseo gaye tuoĩarã, ado bajiro yi seniãayijarã Jesure:

—Ñre tuorũnurãre ï rotirojũ Dios ï miojuri rũmũ, ¿nocãta ejaro yirojada? yi seniãayijarã ñna Jesure.

Ñna ito yija tuocõri, ado bajiro cudiyijũ Jesús:

—Ñre tuorũnurãre Dios ï miojuja, masa jeyaro recoti mani tiriseoni meje ñaroja. <sup>21</sup>Diore tuorũnurã mua ñaja, mua ya usijũ ñacãguũji ïja. Ito bajiri, “Recoti ado ña. Ojũ ña ï rotiro”, yi masiña ma, mani ya usijũ ï ñajare, yiyijũ Jesús fariseo gaye tuoĩarãre.

<sup>22</sup>Ñnare ï busija bero ï rãca riasotirãre, ado bajiro yiyijũ Jesús:

—Yũ ña Dios Macũ, Masa Rĩjorũ. Co rũmũ yũre ti ãmobojarã yirãji mũa. Ito bajibojarãti yũre ti bujamena yirãji mũa. <sup>23</sup>“Ado ñami Jesús”, ñna yija, “O ñaguũji gajea Jesús”, yibojarã yirãji masa mũare. Ito bajiro ñna yija ñna rãca sũya wabeja. Macũ yigũja yũ itojũ. <sup>24</sup>ũmacũju gaye bujo borea yirise iti busu bataja masa jeyaro tirã yirãji. Ito bajiroti bajiro yiroja Masa Rĩjorũ ñacõri, yũ tudĩ ejari rũmũ. Masa jeyaro tirã yirãji ñna, yũ ito bajija. <sup>25</sup>Iti riojua adoju ñagũ, bũto ñeñaro tõbũjagu yigũja yũ. Iti rũmuri masa tirã yirãji yũre. <sup>26</sup>Noé ñayorũ ï catiroca masa Diore rãcũbuobitiyoni. Ito bajiro bajirã yirãji masa, yũ Masa Rĩjorũ yũ tudĩ ejari rũmũ. <sup>27</sup>Noé ñayorũ ï ñaroca masa idirãtibe, barãtibe, manajo cutirãtibe ito yicõri ñna rĩa romiare manũju bosarãtibe yi ñayijarã ñna. “Manire ruyuriobiquĩji Dios”, yi tuoĩa ñayijarã ñna. Ito bajiro ñna baji ñabojaroca riti, cumajũ sãjayijũ Noé ñayorũ. Cumajũ ï sãjaja bero rujayijũ. Ito bajiri ñarocõti goda jedicoayijarã ñna. <sup>28</sup>Ito bajiroti rẽtayijũ Lot ñayorũ ï ñaroca cuni. Ï ñajacũ ï ñaroca ado bajiro bajijijarã ñna. Barã, idirã, waja gãmerã, gãjerãre isirã, ito yicõri wiri meni ñacõayijarã ñna. “Manire ruyuriobiquĩji Dios”, yi tuoĩa ñayijarã ñna. <sup>29</sup>Ito bajiro ñna baji ñaroca ñna ñari cuto Sodoma wame cutiri cutore budigoyijũ Lot. Lot iti cuto ï budigoja bero ũmacũju gaye jea azufre wame cutirise queoyijũ Dios. Ito yicõri gãta ãjurise cuni queoyijũ. Ito bajiri ñarocõti uã jedicoayijarã ñna ïja. <sup>30</sup>Ito

bajiroti bajiro yiroja, yu Masa Rijoru yu goaïori rumu cuni. Ito bajiro yu goaïori rumu Diore rucubuořã meje ñarã yirãji masa, yiyiju Jesús ñnare.

<sup>31</sup>Yu tãdi ejari rumu sigũ wi rijogodo ï bua ñaja, ï ya gajeoni ãmigũ ruji wabitrujaguïji ï. Ito yicõri sigũ ï ya weseca ï moaroca yu tãdi ejaja, ï ya gajeoni ãmigũ wacu tãdi wabitrujaguïji ï cuni. <sup>32</sup>Lot manajo ñayore bajire gaye tuoïaña mua. Iso ya gajeonire tuoïa jidicã ãmabisijo iso. Ito bajiri godayijo iso. <sup>33</sup>No ï catirise maibojaguti godagu yiguïji. Ito bajibojarocati yure tuorũnugũ, yu oca ï gotija tuo junisinicõri, ñna siagũama catitĩnare gaye bujagu yiguïji.

<sup>34</sup>Co rumu yu ejari rumu jũarã ñna caniroca ejaqu yiguja yu. Jũarã ñna canibojarocati sigũre ãmigũ yiguïji Dios. Ito yicõri gãjire ruacõgũ yiguïji. <sup>35</sup>Romia jũarã coro tu oe rujirã yirãji. Ñna ito bajibojarocati sigõre ãmigũ yiguïji Dios. Ito yicõri gajeore ruacõgũ yiguïji. <sup>36</sup>Jũarã ãmua wesecaju moa ñarã yirãji. Ito bajibojarocati sigũre ãmigũ yiguïji Dios. Gãjire ruacõgũ yiguïji, yiyiju Jesús ï rãca riasotirãre.

<sup>37</sup>Ito bajiro ï yija tuocõri, ado bajiro ñre seniñayjarã ñna:

—¿Noju rãtaro yirojada iti? yi seniñayjarã ñna mani Ujũre.

Ado bajiro goti masiore ocana cudiyiju Jesús ñnare:

—Ruju jogarise iti ñaro itoju minijuarã yirãji yuca. No masa ñna ñeñaro yiroju, ito bajiro rãtaro yiroja, yiyiju Jesús ñnare.

#### Oca quenori masu tu wajeago iso ejasotire gaye

**18** <sup>1</sup>Diore busi jidicãmenati buto busa oca seõjaro yirocu, ado bajiro goti masiore ocana gotiyiju Jesús ñnare:

<sup>2</sup>—Cutoju ñayiju sigũ oca quenori masu. Diore guibisiju, ito yicõri masare cuni rucubuořãbisiju ï. <sup>3</sup>Iti cutoju sigõ ñayijo manuju godagoro. Coji meje oca quenori masu tu ejasotibojayijo iso, “Mu rãca oca cutigujũare seti ña”, ï yitoni. <sup>4-5</sup>Biyaro iso ejasotibojarocati, isore boca ãmibisiju oca quenori masu. Biyaro iso ejaja ticõri, ado bajiro tuoïayiju ï. “Yu isore tirũnubeja biyaro ejasotigo yigõji iso. Ito yicõri bogagu yiguja yu. Ito bajiri Diore guibitibojaguti, masare cuni rucubuořãbitibojaguti isore ejabuacuja yu, yure iso usirioro yi rãcõcũme yirocu”, yi tuoïayiju oca quenori masu, yi oca gotiyiju Jesús ï rãca riasotirãre.

<sup>6</sup>Ito yicõri mucana mani Uju ado bajiro gotiyiju:

—Ñeñaro yigu ñabojaguti isore bogagu ejabuayiju oca quenori masu.

<sup>7</sup>¿Dios ñarãre ãmua, ñami cuni ñna josaja, ñnare tirũnubiquijida? ¿Ito yicõri yoari ñnare ejabuabiquijida? <sup>8</sup>Ado bajirojua mũare ya yu. Yoari mejeti ñnare ejabuagu yiguïji. Yu Masa Rijoru adi sitaju tãdi ejaqu yiguja mucana. ¿Adoju yu tãdi ejaroca yure tuorũnurã ñarã yirãjida maji? yiyiju Jesús ñnare.

**“Ñasarã ña gua”, yibojarãre ñnasmena ñna ñaroca  
yigu yiguïji Dios, Jesús ï yire gaye**

<sup>9</sup>“Gãjerã rãtoro queno yirã ña gua”, yi tuoïacõri, gãjerãre ti tudirãre ado bajiro oca goti masioyiju Jesús ñnare:

10—Co rumu ñmua jũarã Dios ya wiju Diore busirã wayijarã. Sīgũ ñ rãca gagu fariseo gaye tũoĩagũ ñayiju. Gãji ñjarãre yiari waja seni ñsotiri masu ñayiju.  
 11 Fariseo gaye tũoĩagũ rũgõcõri, ado bajiro Diore busiyiju: “Gãjerã bajiro bajigu meje ña yu. Riniri masu meje ña yu. Ñeñaro yiri masu meje ña yu. Gãji manajo rãca ajegu meje ña yu. Ito yicõri ñni bajiro bajigu meje ña yu. Ñ ñami ñjarãre yiari waja seni ñsiri masu. Ñre bajiro bajigu meje ñacõri, ‘Queno ya Dios mu’, ya yu.  
 12 Co semana ruyabeto jua rumu mare rucubogogu babicu riti busisotia yu mare. Ito yicõri jeyaro yu bujarise jabeto mare ñsotia yu”, yi busiyiju ñ Diore. 13 Ito bajiro ñ yiroca ñjarãre yiari waja seni ñsiri masuama bojori bujagu jacajua riti ti wa rũgũcoayiju. Buto bojori bujacõri soje tujũ tujayiju ñ. Diore ado bajiro busiyiju ñ: “Dios yure ti maiña. Ñeñaro yi jaigu ña yu”, yiyiju ñ, yi gotiyiju Jesús ñnare.  
 14 Ado bajiro muare gotia yu. Ñjarãre yiari waja seni ñsiri masu, ito bajiro Diore ñ busija, ñeñaro ñ yirisere acabojoyiju Dios. Ito bajibojarocati fariseo gaye tũoĩagũreama ñ ñeñaro yirise acabojobisiju Dios. No, “Gãjerã rëtoro ñnasarã ña gua”, yibojarãre ñna ñsamena ñnaro ca yigu yiguñi Dios. Ito yicõri, “Ñnasarã meje ña gua”, yirãreama, ñnasarã ñna ñnaro ca yigu yiguñi Dios, yiyiju Jesús ñnare.

### Rĩacare queno yijaro Dios, Jesús ñ yire gaye

(Mt 19.13-15; Mr 10.13-16)

15 Ñna rĩare Jesús ñ moaĩatoni ñmi ejayijarã masa ñ tujũ. Ito bajiro rĩacare ñna ñmi ejaja ticõri, “Ñmi wadibesa”, yiyijarã Jesús rãca riasotirã.  
 16 Ito bajiro ñna yija tũocõri, ado bajiro yiyiju Jesús:  
 —Rĩacare rēobesa, yu tu wadijaro ñna. Rĩaca ñnama yure queno tuorũnrã. Ñna robo yure queno tuorũnrãre riti ñ rotiroju miojugu yiguñi Dios. 17 Riti muare gotia yu. Rĩaca queno cudi ñmoama Dios ñ rotirisere. No rĩaca ñna cudiro bajiro cudi ñmobicuti Dios ñ rotiroju ejabiquñi, yiyiju Jesús ñnare.

### Gajeonire buto maisabeja quena, Jesús ñ yire gaye

(Mt 19.16-30; Mr 10.17-31)

18 Sīgũ judio masa ñju Jesure ado bajiro seniñayiju:  
 —Yu Ñju queno yigu, ¿no bajiro yicõri catitiñnare gayere bujagu yigujada yu? yiyiju ñ Jesure.  
 19 Ito bajiro ñ yija tũocõri:  
 —¿No yija queno yigu yati mu yure? Sīgũ ñnami queno yigu. Ñti ñami Dios. 20 Dios ñ rotirise masigũ ñna mu: “Gãji manajo rãca ajebitiruja mu. Gãjire sĩabitiruja mu, rinibitiruja, gãjerãre ruo gotibitiruja, ito yicõri mu jacusabatiare rucuboruja mu”, yiyiju Jesús ñre.  
 21 Ito bajiro ñ yija ado bajiro cudyiju ñ Jesure:  
 —Ñarocõti itire macuacã ñagũju cudisucocũ yu, yiyiju ñ Jesure.  
 22 Ito ñ yija ado bajiro cudyiju Jesús:  
 —Jabeto ruya maji queno Diore mu cudi jeoroti. Ñarocõti mu cudi jeo ñmoja, ado bajiro yiya. Jeyaro mu rucorise gãjerãre ñsi jeocõña. Ito yicõri iti

waja bujacōri bojoro bujarāre isiña. Ito bajiro m̄ yija, ūmacūju queno bujagu yigūja m̄. Ito bajiri yu gotirise cūdiya. Ito yicōri yu rāca waya, yiyiju Jesús ire.

<sup>23</sup>Ito bajiro Jesús busija tuocōri, b̄to bojori bujayiju ī. Gajeoni jaigu ñacōri itire b̄to maiyiju. Ito bajiri Jesús busire tuocōri bojori bujaguti wayiju ī. <sup>24</sup>Ī bojori bujaja ticōri, ado bajiro yiyiju Jesús ī rāca riasotirāre:

—Niyeru jairā Dios ī rotiroju josari bero ejarā yirāji īna. <sup>25</sup>Gawa jotaga yuta jiosōrajure, camello queno sāja masibiquīji. Iti robo bajiroti Dios ī rotiroju queno eja masisabiquīji niyeru jaigu, yiyiju Jesús īnare.

<sup>26</sup>Ito bajiro ī yija tuocōri, ado bajiro yiyijarā īna:

—¿Ito yija noajua Dios ī ñaroju ejarā yirājida? Riti m̄ yijama sīgū ejabiquīji gajea, yiyijarā īna Jesure.

<sup>27</sup>Īna ito yija tuocōri, ado bajiro yiyiju Jesús m̄cana:

—Masamasiti yiado ma itire. Dios sīgūti jeyaro yi masiguīji. Ñejua josarise manoja ire, yiyiju Jesús īnare.

<sup>28</sup>Ito bajiro ī yija tuocōri, ado bajiro yiyiju Pedro Jesure:

—Gua Ūju, m̄ rāca warona jeyaro gua rucorisere jidicācu gua, yiyiju ī Jesure.

<sup>29-30</sup>Ito yija Jesujuama ado bajiro cūdiyiju:

—Riti ya yu m̄are. “Dios ñami mani Ūju”, yi goti ucuroña, īna ya wi, īna jacusabatia, īna manojosāromia, ito yicōri īna riare cūni īna cū waja, queno waja bujarā yirāji īna. Ito yicōri ūmacūju Dios tujū catiūñarā yirāji īna, yiyiju Jesús ire.



(San Lucas 18.22-23)



**Yure sīarā yirāji, Jesús ī yi busisusare gaye**  
(Mt 20.17-19; Mr 10.32-34)

<sup>31</sup>Ito ī yija bero jua gubojeno ñarā, ī rāca riasotirāre ricati busa ji wayijū Jesús ñnare busirocū. Ito yicōri ado bajiro yiyijū ī ñnare:

—Adocāta Jerusalénjū warā ya mani. Itojū mani ejaroca jane mejeju Diore goti īsiri masa ñna ucado bajiroti rētarō yiroja Masa Rijorure. <sup>32</sup>Gaje masa ñre ñna ñiatoni, mani masati ñre oca menirā yirāji. ñre ñnacōri aja tudirā yirāji ñna. Ito yicōri ñre tīborā yirāji ñna. ñre go ide eobate gurā yirāji ñna. <sup>33</sup>Ñre jarā yirāji ñna. Ito yicōri ñre sīarā yirāji. ñre ñna siabojarocati ũdia ramū bero godana wato ñnabojaguti mucana tūdi catigū yiguīji ī, yiyijū Jesús ñnare, ñre rētaroti gaye tūoīa yugū.

<sup>34</sup>Ito bajiro ī gotibojarocati tūo masibisjarā ñna. “Iti gayere busiguīji”, yi masibisjarā ñna. Ito bajiri ī busirise queno tūo masibisjarā ñna.

**Cajea macure Jesús ī yisiore gaye**  
(Mt 20.29-34; Mr 10.46-52)

<sup>35</sup>Jericó ejagū wagū ī yiroca ma tū sīgū cajea macū rujijijū. Ito ma tū rujicōri masa ñre ti maitoni masare josayijū. <sup>36</sup>Jājarā masa ñna rētaja tūocōri, “¿No bajiatī?” yirocū seniīayijū ī.

<sup>37</sup>Ito ī yija:

—Jesús Nazaret gagū rētagū wagū yami, yiyijarā ñna.

<sup>38</sup>Ñna ito yija tūocōri, awasāyijū ī:

—Jesús, David ñayorū janerābatia janami, yure ti maiña mū, yi awasāyijū.

<sup>39</sup>Ñre rētasuorā, “Awasābesa mū”, yibojayijarā ñna ñre. Ito yibojarocati buto busa awasāyijū ī:

—David ñayorū janerābatia janami yure ti maiña mū, yi awasāyijū ī.

<sup>40</sup>Iti tūocōri tuja rūgūyijū Jesús. Ito yicōri, “Cajea tibicure āmitēña”, yi ñucayijū. Ī tū ī ejagū wagū yiroca, ado bajiro seniīayijū Jesús cajea macure.

<sup>41</sup>—¿No bajiro mure yū yire āmoati mū? yiyijū ī ñre.

—Yū ũjū mucana tūdi cajea ti āmoa yū, yiyijū ī Jesure.

<sup>42</sup>Ito ī yija tūocōri:

—Mucana tiya mū. “Jesús yure yisiogu yiguīji”, mū yi tūoīajare, tūdi mū cajea tiroca ya yū, yiyijū Jesús ñre.

<sup>43</sup>Ito ī yirocati cajea macū ñnabojarū ticoayijū ĩja. Ito yicōri Jesús rāca wacū, “Buto rētoro masigū ñnami Dios”, yi wanū quena wayijū ī. Jājarā masa ito bajiro iti rētaja ticōri, “Queno yigū ñnami Dios”, yi wanū quena wayijarā ñna cūni.

**Jesure Zaqueo ī ti āmore gaye**

**19** <sup>1</sup>Ito yija bero Jericójū ejayijū Jesús ĩja. Ito yicōri iti cūtojū wa ucuyijū Jesús. <sup>2</sup>Iti cūto gagū sīgū niyeru jaigū ñayijū, Zaqueo wame cūtigū. ũjarāre yari waja seni īsiri masa ũjū ñayijū ī. <sup>3</sup>Ī Zaqueo Jesure buto ti āmoyijū. Ito bajibojarocati ũmabicū ñari, masa ñna jājarā

ñajare Jesure ti bujabisijũ ĩ. <sup>4</sup>Ito bajiri masa riojũa ũmaquedi wacõri, ma tu rŭgõricure Sicómoro wame cutiricure m̃ja jeayijũ Zaqueo Jesús ĩ rĕtaja tirocũ. <sup>5</sup>Ito rĕta wacũ ti m̃ucõri ado bajiro yiyijũ Jesús Zaqueore:

—Zaqueo coji ruji waya m̃. Jane m̃ ya wi tuja āmoa yũ, yiyijũ Jesús ĩre.

<sup>6</sup>Jesús ito bajiro ĩ yija t̃ucõri, ejoriti ruji wayijũ ĩ. Ito yicõri wanũre rāca Jesure boca āmicõri, ĩ ya wijũ āmi wayijũ. <sup>7</sup>Zaqueo rāca Jesús ĩ waja ticõri, ĩre b̃sutyijarā masa. “Ñeñaro yi jaigũ ya wi tujagũ wami”, yirona b̃siyijarā ĩna. <sup>8</sup>ĩ ya wijũ Jesús ĩ ñaroca, ado bajiro yiyijũ Zaqueo Jesure:

—Yũ Ʋjũ, tite m̃. Bojoro bujarāre gũdarecona yũ r̃corisere ĩnare ĩsi batogũ yigũja yũ. Yũ r̃co āmigoanare juariajiricõ ĩnare juacõagũ yigũja yũ, yiyijũ ĩ Jesure.

<sup>9</sup>Ito ĩ yija t̃ucõri, ado bajiro yiyijũ Jesús:

—M̃ ñeñaro yirise m̃ jidicāja ticõri, m̃ ñarāre, m̃re c̃ni masogũ yigũji Dios, ya yũ m̃re. Ñeñaro yigũ ñari m̃ ñicu Abraham ñayoru



(San Lucas 19.5)

Diore ī r̄nc̄ub̄oado bajiro yibiticu m̄u maji. <sup>10</sup>M̄ure bajiro jeame ūjuroju waboanare masori masu wadia yu. Yu ña Masa R̄jor̄u, yiyiju Jesús ire.

**Moa isiri masa gaye Jesús ī goti masiore oca**  
(Mt 25.14-30)

<sup>11</sup>Ito bajiro Jesús ī yi ñaroca ī busirise tuo ñayijarā masa. “Yoari mejeti Jerusalénju mani ejaja beroti, ire tuor̄un̄ur̄are ī rotiroju miojus̄uogu yiguīji Dios”, yi ña tuoībojarisere masic̄oyiju Jesús. <sup>12</sup>Ito bajiri goti masiore ocana ado bajiro yiyiju Jesús ñare:

—S̄igū ñasari masa r̄aca gagu ñayiju. S̄oju gaje sitaju wayiju ī, “M̄u ya sita ūju ñama m̄u”, ḡaji ire yitoni. <sup>13</sup>Ī waroto riojua jua d̄ujamoc̄o ire moa isiri masare jiyiju ī. Sigū r̄uyabeto ñare niyeru tiri b̄uto waja cutirise isiyiju ī. Ito yic̄ori ado bajiro rotiyiju ī ñare: “Ito yu waroca riti adi niyeruna moac̄ori jai busaro niyeru buja is̄iña m̄u ȳure”, yiyiju ī ñare. <sup>14</sup>Ī ya sita ḡana ti teyijarā ire. Ito bajiri ī beroti masa c̄oyijarā ña. “Āni gua ūju ñare āmobeā gua”, ña yi gotitoni ñare c̄oyijarā ña. <sup>15</sup>Ito bajiro ña yilobarocati gaje sita gagu ūju ire wame yiyiju. “M̄u ya sita ūju ñama”, ī yija bero, ī ya sitaju t̄adi wayiju ī m̄ucana. Itoju t̄adi ejac̄ori, ī ya moari masare jiyiju ī. “¿Yu niyeru c̄u warena, noc̄o jairo niyeru buja remoyijari ña?” yirocu, ñare jiyiju ī. <sup>16</sup>Īna ejaja tic̄ori, cajero gagure sen̄īas̄uoyiju ī: “¿Noc̄o jairo niyeru buja remori m̄u?” yiyiju ī ire. Ito ī yija tuoc̄ori: “Yu ūju m̄u ya niyeruna jua d̄ujamoc̄oti m̄ucana t̄adi buja remom̄u yu”, yiyiju ī. <sup>17</sup>Ito yija tuoc̄ori, ado bajiro cudiyiju ī ūju ire: “Queno yiyija m̄u. Queno ȳure moa is̄igū ña m̄u. Jabetacā yu m̄ure rotija, ñaro bajiroti ȳure cudiyija m̄u. Ito bajiri jua d̄ujamoc̄o cutori tir̄un̄roc̄ure c̄ua yu m̄ure”, yiyiju ī ire. <sup>18</sup>Ī bero ḡaji ado bajiro yiyiju ī ūj̄ure: “Yu ūju, m̄u ya niyeruna co d̄ujamoc̄oti buja remom̄u yu”, yiyiju ī ire. <sup>19</sup>Ito ī yija tuoc̄ori, ado bajiro yiyiju ī ūju: “M̄u ȳure queno cudire waja co d̄ujamoc̄o cutori tir̄un̄gū ya m̄u”, yiyiju ī ire. <sup>20</sup>Ī bero ḡaji m̄ucana ī t̄u ejayiju. “Yu ūju, ado ña m̄u ya niyeru. Resurona ḡumac̄ori seocu yu itire. <sup>21</sup>M̄ure tuo ḡuic̄u yu. Oca s̄eogū ña m̄u. Ḡajerā ña otebojareti ēmagū ña m̄u. Ito yic̄ori ḡajerā ña bujaboreti ēmagū ña m̄u. Ito bajiri m̄ure masic̄ori m̄ure tuo ḡuic̄u yu”, yiyiju ī, ī ūj̄ure. <sup>22</sup>Ito bajiro ī yija tuoc̄ori, ado bajiro yiyiju ī ūju: “Ȳure queno moa is̄igū meje ña m̄u. Janeti ȳure m̄u busigorisenati, m̄ure s̄eoro yigu ya yu. ‘S̄eoro yigu ña m̄u. Ito yic̄ori ḡajerā ya otere ēmagū ña m̄u. Ito yic̄ori ḡajerā ye ñaboreti ēmagū ña m̄u’, yiyija m̄ugo ȳure. <sup>23</sup>Ito bajiro yi masibojaguti, ¿no yija yu ya niyerure jai busaro buja remora wiju c̄ubiticati m̄u? M̄ucana yu ya wiju t̄adi ejac̄ori jai busaro niyeru ti t̄adi eja āmobojac̄u yu”, yiyiju ī ūju ire. <sup>24</sup>Ito yic̄ori ḡajerā itiju ñanare ado bajiro rotiyiju ī: “Ī ruc̄oriti niyerutire ēmaña m̄u. Ito yic̄ori jua d̄ujamoc̄o ruc̄oḡure is̄iña m̄u”, yiyiju ī ñare. <sup>25</sup>Ī ito yija tuoc̄ori: “Tite gua ūju. Jua d̄ujamoc̄o niyeru ñacā ire”, yiyijarā ña ire. <sup>26</sup>Ito yija ña ūju ado bajiro cudiyiju: “Tite. Ado bajiro m̄ure gotia yu. No ȳure queno moa is̄iḡure jai busaro ire is̄i remogū yiguj̄a yu. Ito bajibobarocati no queno ȳure moa is̄ibic̄ureama ī ruc̄oriseac̄ati ēma jeoc̄oc̄uja yu. Īre ēmac̄ori ḡaji ȳure queno moa is̄iḡure is̄igū yiguj̄a yu. <sup>27</sup>Ito yic̄ori ūju yu ñare

ãmobitianare, adojua ãmi waya ñnare. Ito yicõri, yu tiro riojo ñnare sãña”, yiyiju ẽju ï ya moari masare. Ito bajiri iti oca tuocõri Diore mani queno moa ïsija quena, yi oca goti masioyiju Jesús masare.

**Jerusalénju Jesús ï ejare gaye**  
(Mt 21.1-11; Mr 11.1-11; Jn 12.12-19)

<sup>28</sup>Ito ï yija bero, Jerusalénju wayiju Jesús mucana. <sup>29</sup>Ï waro riojo Olivos wame cutiri turia ñayiju. Iti turia judo jua cuto ñayiju. Betfagé, ito yicõri Betania wame cutiri cutori ñayiju iti. Ï ejaroto riojua jãarã ï rãca riasotirãre cõayiju ï. <sup>30</sup>Ado bajiro yiyiju ï ñnare:

—Ï cutojũ wasa. Ito ejacõri burro, ñna sia rügögũre bujarã yirãji mua. Sígũ masũ mũja jeaãña macũ ñaguïji maji. Ñre õjacõri ãmi wadiba.

<sup>31</sup>Sígũ mũare ï seniãja: “¿No yirã ñre õjati mua?” ï yija, ado bajiro gotiba ñre: “Mani Ẽju ñre ãmoami”, yiba ñre, yiyiju Jesús ï rãca riasotirãre.

<sup>32</sup>Ito ï yija tuocõri, wayijarã ñna. Ito ejacõri Jesús ï gotiado bajiroti bujayjarã ñna ñja. <sup>33</sup>Burrore ti bujacõri õjayijarã ñna. Ñre ñna õjaroca ado bajiro seniãjayjarã ï ẽjarã:

—¿No yija ñre õjati mua? yiyijarã ñna.

<sup>34</sup>Ñna ito yija tuocõri:

—Mani Ẽju ñre ãmoami. Ito bajiri ñre õja gũa, yiyijarã ñna.

<sup>35</sup>Ito yicõri Jesús tũju ñre ãmi wayijarã ñna ñja. Jesús tũ ejacõri ñna ya yutabuju ruacõri burro joe jidi jeoyijarã ñna. Ito yicõri Jesús ï mũja jeatoni ñre ejabuayijarã ñna. <sup>36</sup>Ï joe jesa wayiju Jesús ñja. Ito bajiro ï jesa waroca jãjarã ñna ya yutabujuri ruacõri ï waro riojo eyocũ yuyijarã ñna. “Gũa Ẽju ña mũ”, yirona ito bajiro yiyijarã masa, ñre rũcũbuorã. <sup>37</sup>Ito bajiro wacũju turia judo ejayiju, Jerusalén roja wara majũ. Ito ï ejaroca ñre rũcũbuorã ado bajiro yi awasã wanũyijarã masa: “Rẽtoro quenagũ ñami Dios. Jaje tiyamani manire ñoami”, yi awasã wanũyijarã ñna, Diore rũcũbuorã:

<sup>38</sup>—Quenarise ñajaro mani Ẽjure. Ï ñami Dios ï cũru. Ûmacũju gãna cũni wanũ quenare rãca ñajaro ñna. Masa jeyaro Diore queno rũcũbuojaro, yiyijarã ñna Jesure wanũrã.

<sup>39</sup>Jesure sũyarã ñna rãca ñabojayijarã fariseo gaye tuoãrã cũni. Masa ñna ito bajiro wanũ busija tuocõri, Jesure ado bajiro yiyijarã ñna:

—Gũare riasogu, ito bajiro mũre busi sũyarãre, “Busibesa mua”, yija, yiyijarã fariseo gaye tuoãrã Jesure.

<sup>40</sup>Ito bajiro ñna yibojarocati:

—Riti ado bajiro mũare gotia yũ. Yũre ñna awasã wanũbeja, masa ñna awasã wanũro bajiro gãta cũni awasã wanũro yiroja, yiyiju Jesús ñnare.

<sup>41</sup>Ito bajiro wacũti Jerusalénju ticõyiju ï. Iti cuto gãnare tuoãcõri otiyiju Jesús. <sup>42</sup>Tuoã oticõri ado bajiro yiyiju Jesús:

—Wanũ quenatĩnare buja masibojarãti ãmobisjarã ñna. Ito bajiri adocãta buja masiãna ma ñnare. <sup>43</sup>Quenabiti rũmuri ejaro yiroja ñnare. Ito bajiri ñna wajana rujabedo ñnare camotarã yirãji. Ito yicõri coju ruyabeto camotarã

yirāji ñinare sīarona. <sup>44</sup>Ito bajiro yicōri ñinare ruyurio jeorā yirāji. Ito yicōri ñinare sīarā yirāji. Ñinare sīacōri ñina cuto Jerusalénre dara baterā yirāji ñina. Ito bajiri ñina camotabojare gūta ñarocōti quedicoaro yiroja. Ito bajiro rētaro yiroja, ñinare Dios boca āmi āmobjarocati ñina āmobitire waja, yiyijū Jesús.

### Dios ya wijū niyeru wasoari masare Jesús ī bucōare gaye

(Mt 21.12-17; Mr 11.15-19; Jn 2.13-22)

<sup>45</sup>Ito bajiro Jerusalénjū ejacōayijū Jesús ija. Ito bajiro ejacōri Dios ya wijū sājayijū ī. Ito sājacōri waja gāmeri masare ti bujayijū Jesús. Ñinare ti bujayacōri ñinare bucōayijū ī. <sup>46</sup>Ito yicōri ado bajiro yiyijū ī:

—Dios oca tuti ado bajiro gotia: “Yure rūcubūorona yū ya wi sājārā yirāji masa”, yi gotia Dios oca tuti. Mūa ito bajiro niyeru gāmeri waja yija, riniri masa ñina rudirijū robo bajiro ya mūa, yi tudiyijū Jesús waja gāmeri masare.

<sup>47</sup>Jerusalén ñagū co rāmū ruyabeto Dios ya wijū masare riasosotiyijū Jesús. Ito bajibojarocati paia ūjarā, judio masa rotirise riasori masa, ito yicōri cuto ūjarā cūni ti tujabisijarā ñina. Ito bajiri ado bajiro yi tūoīayijarā ñina: “ ‘Īre seti ña’, mani yija, ĩre sīarā yirāji mani”, yi tūoīayijarā ñina.

<sup>48</sup>Ito bajibojarocati masama Jesure wanūcōri buto busa ĩre tūorūnūyijarā ñinama. Ito bajiri, “Seti ña ĩre”, yi masibisijarā ūjarā mesa.

### ¿Ñimū ī rotijare ito bajiro yati mū? yi Jesure ñina seniāare gaye

(Mt 21.23-27; Mr 11.27-33)

**20** <sup>1</sup>Co rāmū Dios ya wijū masare riaso ñayijū Jesús. Masare Dios ī masore gayere ñinare riaso ñayijū Jesús. Ito bajiro ī riaso ñaroca paia ūjarā ejayijarā. Ito yicōri judio masa rotirise riasori masa, judio masa bucūrā cūni ejayijarā. <sup>2</sup>Jesús tū ejacōri ado bajiro seniāayijarā ñina:

—¿Waja gāmeri masare mū bucōaja ñimū rotirisena ñinare bucōati mū? Ito yicōri, ¿ñimū mure cūcati ito bajiro mū yitoni? yi seniāayijarā ñina Jesure.

<sup>3</sup>Ñina ito yija tūocōri:

—Yū cūni mūare ado bajiro seniāa yū. Cūdiya mūa cūni yure. <sup>4</sup>¿Ñimū masare Juan ī idé gutoni cōayijari? ¿Dios ĩre cōayijarite? ¿Masa ĩre cōayijarite? yi seniāayijū Jesús ñinare.

<sup>5</sup>Ito bajiro ī yija tūocōri, ñinamasiti gāmeri tūoīa busiyijarā ñina:

—¿No bajiro ĩre cūdirūjati mani? “Dios cōayijū ĩre”, mani yija, “¿No yija ito bajibojarocati ĩre tūorūnūbiticati mūa?” yigū yigūijī ī manire, yi tūoīayijarā ñina. <sup>6</sup>“ ‘Masa cōarū ñami Juan’, mani yija, masa manire junisinicōri gūtagāna manire rea sīarā yirāji. ‘Diore yiari busiñi Juan’, yi tūoīacōri gūtagāna rea sīarā yirāji ñina manire”, yi tūoīa gāmeri busiyijarā ñina. <sup>7</sup>Ito bajiro tūoīacōri ado bajiro cūdiyijarā ñina Jesure:

—“Ī ñañi masare idé gutoni cōarū”, yi masibea gua, yiyijarā ñina Jesure.

<sup>8</sup>Ñina ito yija tūocōri:

—“Ī rotirisena ya yū”, yi gotibicūja yū cūni, yiyijū Jesús ñinare.

**Queno moare rujeo masimena Jesús i yire gaye**  
(Mt 21.33-44; Mr 12.1-11)

<sup>9</sup>Ito yicōri masare busisuoyijũ Jesús mucana. Ado bajiro goti masiore ocana gotiyijũ Jesús ñinare:

—Sĩgũ ñayijũ uyé wese, rucogu. Gaje sita yoari warocu i ya uyé wesere gãjerã moari masare wasooyijũ i. Ito yicōri yoari gaje sitajũ ñayijũ i. <sup>10</sup>Uyé iti rica cutiroca sĩgũ i ya moari masure cōayijũ i, i ya ote ãmitoni. Iti ote coderi masa i wadija ticōri, ñre jañosãcōyijarã ñina. Ito bajiri ñe macuti tũdi wayijũ i. <sup>11</sup>Ito bajiro ñe macuti i ejaja ticōri, gãji ñre moa ñsiri masure cōayijũ i. Iti ote coderi masa i ejaja ticōri, ñre tiboyijarã ñina. Ito yicōri jañosãcōyijarã ñina. Ito bajiri i cuni ñe macuti tũdi wayijũ. <sup>12</sup>ĩ ito bajija ticōri, gãjire cōayijũ mucana. ĩ ejaja ticōri, ito bajiroti ñre cuni jañosãcōyijarã ñina mucana.

<sup>13</sup>Iti jeyaro bajija ticōri, ado bajiro tũoĩayijũ iti sita uju: “¿No bajiro yirũjati yũ? Ado bajiro yicũja yũ. Yũ macũ, yũ maigũre cõagũ ya yũ. ĩre ñina tija rũcũbuorã yirãji gajea”, yi tũoĩabojayijũ i. <sup>14</sup>ĩ macũ ejaja ticōri, ado bajiro ñinamasi gãmeri tũoĩa busiyijarã ñina, ote coderi masa: “Ñni ñami adi sita uju i godaja bero boca ãmirocu. ĩre sĩacãcõrũja, manijua bujana yirona”, yi tũoĩa gãmeri busiyijarã ñina. <sup>15</sup>Ito bajiri ñre tucõa wacõri sĩayijarã ñina, yi oca goti masioyijũ Jesús masare. Ito yicōri ado bajiro ñinare seniĩayijũ Jesús:

—Ñina ito bajiro yija, ¿no bajiro yigũ yigũjida iti sita uju? <sup>16</sup>Ado bajirojua yigũ yigũji. Ote coderi masa tũ ejacõri ñinare sĩagũ yigũji. Ito yicōri i ya sita gãjerãre wasoagu yigũji. Dios cuni ito bajiroti yigũ yigũji. No i cõarũre boca ãmimenareti ruyuriogu yigũji Dios, yiyijũ Jesús ñinare.

Ito bajiro i yija tũocõri, ado bajiro yiyijarã ñina:

—Iti ito bajiro rõtame yirocu camotajaro Dios, yiyijarã ñina.

<sup>17</sup>ĩnajuare ticōri ado bajiro yiyijũ Jesús:

—¿Ñe yireoni ñati adi Dios oca tuti gaye mua tũoĩaja?

Gũta wi meniri masa coga gũtagã cõayijarã ñina. Ito bajibojarocati gaje gũta rẽto busaro quenarica ñayijũ itiga ñina cõabojaraga. Itiga gũtagãna suoriti quenari wi menigũ yigũji Dios. Itiga gũtagã manija, ñe menire manoja ĩja, yi gotia Dios oca tuti.

<sup>18</sup>No gũtagã joe quedi jeagũre i ya gõari jearo yiroja. Ito yicōri itiga gũtagã sĩgũre iti quedi jeaja mano abocõro yiroja. Ado bajiro baja iti oca. No Dios i cõarũre tũorũnũbicũ catitĩnũbicũ yigũji ĩocũ. Ito yicōri jeame ãjuroju i cõa ãmorãre ruyuriorocu cõagũ yigũji i, yi gotiyijũ Jesús masare.

<sup>19</sup>Ito bajiro Jesús i oca goti masioja tũocõri, “Manireti busiami”, yi tũo masiyijarã paia ujarã, judio masa rotirise riasori masa cuni. Ito bajiri Jesure ñina ãmoyijarã ñina. Ito bajibojarocati masare gũirã ñina masibisijarã ñina maji.

**Ujaräre mani waja ruyurioja ñaro bajiroti waja yija quena,  
Jesús i yire gaye  
(Mt 22.15-22; Mr 12.13-17)**

<sup>20</sup> Ñre ñia masibiticōri coriarā Jesús rāca baba cuti ruoronare cōayijarā ñna: “Titēña. Sita ujaräre i busituja tuoba. Ñ busituja tuocōri, Ñre seti ña”, yirā yirāji mani. Ito yicōri adi sita uju tuju ñre āmi warā yirāji mani”, yiyijarā ñna. <sup>21</sup> Jesús rāca baba cuti ruoana i tu ejaçōri, ado bajiro ñre gotiyijarā ñna:

—Guare riasogu, jeyaro mu riasorise, mu busirise riti ñasarise ña, yi tuoia gua. Masa ñasari masa, ñasamenare cuni corocōti ti maia mu. Dios i amoro bajiro masa ña yitoni, queno riasoa mu. <sup>22</sup> Ito bajiri ado bajiro mre seniia gua: “¿Roma cuto gagu ujure i rotiado bajiroti ñre gua waja yija quenati? ¿Ñre gua waja yibeja cuni quenatite?” yi seniayijarā ñna Jesure.

<sup>23</sup> Ito bajiro ñna yibojarocati ñna ñeñaro tuoiarisere tuo masicōyiju Jesús. Ito bajiri ado bajiro yiyiju i ñnare:

<sup>24</sup>—Adi sita gaye niyeru cuji isina yure, yiyiju Jesús.

Iti cuji niyeru cuji boca amicōri ado bajiro seniayiju Jesús ñnare:

—¿Ñimū ya rio ito yicōri ñimū wame wāñati adi cujiñu? yi seniayiju Jesús ñnare. Ito i yija tuocōri:

—Adi sita uju rioti ña, ito yicōri i wame cuni, yiyijarā ñna Jesure.

<sup>25</sup> Ñna ito yija ado bajiro cudiyiju Jesús ñnare:

—Sita uju gaye iti ñajama ñreti isija quena. Ito yicōri Dios ye iti ñaja Diore isija quena, yiyiju i ñnare.

<sup>26</sup> Ito bajiro queno Jesús i cudija tuocōri, masa tuoro riojo oca meni masibisijarā ñna. I queno cudi masija ticōri, mano ucayijarā ñna. Ito bajiri ñre oca meni amobojarāti busibisijarā ñna ija.

**¿Godacōri tudi caticoarā yirājida masa? yi Jesure ñna seniñare gaye  
(Mt 22.23-33; Mr 12.18-27)**

<sup>27</sup> Ito i baji ñaroca coriarā saduceo gaye tuoiarā, Jesure ti amorā ejayijarā. Saduceo gaye tuoiarā, “Godabojarāti mucana tudi catire manoja”, yi tuoiarā ñayijarā ñna. Ito bajiri ado bajiro Jesure seniayijarā ñna:

<sup>28</sup>—Guare riasogu, Moisés ñayoru ado bajiro ucayoni: “Rijoru ñasugū rīa macuti manojore i godagoja i ocabaji manojore cuti wasoaja quena. Ito bajiro yiguti i rijoru ñabojarure rīa cuti isigū yiguñi”, yi ucañi Moisés ñayoru, yiyijarā ñna Jesure.

<sup>29</sup> Gaje ado bajiro gotiyijarā ñna Jesure:

—Mre oca gotia gua. Sigū rīa ado bajiro rētayijarā. Jua amojeno ñayijarā ñna. Ñasugū manojore cutibojaguti rīa macuti godagoyiju. <sup>30</sup> Ñ bero gagu manuju godagoro rāca manojore cutibojayiju. Ñ cuni rīa macuti godagoyiju.

<sup>31</sup> Ito yicōri ñna bero gagu cuni manuju godagoro rāca manojore cutibojayiju. Ñ cuni rīa macuti godacoayiju. Ñ bero gāna cuni isore manojore cuticōri, rīa manati goda jediyijarā ñna. <sup>32</sup> Ñna goda jedija beruju goda suyayijo ñna

manoyo ñabojaro cuni. <sup>33</sup> ¿Ûmacũju mucana tũdi ña catija ñimũ manojoma ñasagõjida ña jeyaro manoyo iso ñaja bero? yi seniãayjarã ña Jesure.

<sup>34</sup> Ito yija Jesús ado bajiro cudiyiju ñare:

—Adi tutijũ masa ña ñaja, manoyo cuti, manujũ cuti yama ña. <sup>35</sup> Adi tutijũ ito bajiro ña yi ñabojarocati mucana tũdi caticõri, Dios tũju ña ejaja manoyo cutire manoya itojũama. Ito yicõri ña rĩa romiare manoyo cuti rotimenaji ña. <sup>36</sup> Dios rĩa ñari mucana tũdi catirã yirãji ña. Ito yicõri juaji godamenaji ña. Ángel mesa robo bajiro bajirã yirãji ña ija. <sup>37</sup> Gaje Moisés ñayoru ï ucare ticõri, “Godana mucana tũdi catirã yirãji”, yi tuoia mani. Yucu tutu ãjurise wato Dios oca ruyurisere ucayoyiju Moisés. Ado bajiro gotiyiju Dios Moisésre: “Yũ ña Abraham ãju, Isaac ãju, ito yicõri Jacob ãju cuni”, yiqui Dios yũre, yi ucayiju Moisés ñayoru. <sup>38</sup> Ito oca tuocõri, “Godana Uju meje ñami Dios. Catirã Ujujũ ñami”, yi tuoia mani. Godana ñabojarãti Dios ï tija catirã riti ñarãji masa, yiyiju Jesús ñare.

<sup>39</sup> Ito ï yija tuocõri, judio masa rotirise riasori masa, ado bajiro yiyijarã ña: —Queno ñaro bajiroti tuo masia, gũa Uju mu, yiyijarã ña Jesure.

<sup>40</sup> Ito yicõri queno masigũ ï ñajare ñejũa gaje seniãa yua masibisjarã ña.

**¿Ñimũ janami ñayijari Cristo mũa tija? yi Jesús ï seniãare gaye**  
(Mt 22.41-46; Mr 12.35-37)

<sup>41</sup> Ito bero ado bajiro ñare seniãayiju Jesús:

—¿No yija, “David ñayoru janerãbatia janami ñami Cristo”, yati masa?

<sup>42</sup> David ñayoru ñmasiti, Salmos wame cõtiri tutijũ ucagũ ado bajiro yiñi:

Yũ Ujure ado bajiro yiñi Dios: “Yũ ya riojocadũja rũcũbuoraju, rujiya mũ.

<sup>43</sup> Mũ wajanare mũ rëtocũroca yigũ yigũja yũ”, yiñi Dios yũ Ujure, yi ucayoñi David.

<sup>44</sup> ¿No yija, “Yũ Uju ñami Cristo”, yiyijari David ñayoru? Cristo David janerãbatia janami ñacõri, ¿no bajiro David ãju bajiyijari Cristo? ï janerãbatia janami ï ñaja, “Yũ Uju”, yibitiboru David ñayoru, yiyiju Jesús ñare.

**“Seti ña muare”, judio masa rotirise riasori masare, Jesús ï yire gaye**  
(Mt 23.1-36; Mr 12.38-40; Lc 11.37-54)

<sup>45</sup> Ñãca riasotirãre, Jesús ï busi ñaroca jãjarã masa tuo ñayijarã. Ado bajiro yiyiju Jesús ñare:

<sup>46</sup> —Judio masa rotirise riasori masa bajiro mũa yibe yirona queno tuoiaña mũa. Tite. Ado bajiro yama ña. Yutabujuri quenarise yoarise sãnacõri masa ña tiro riojo wa ucu ãmorãji ña. Ito yicõri cuto gudareco gãjire ña canamũoja, rũcũbuore rãca seniãare ãmorãji ña. Minijuara wiju sãjacõri rũcũbuora cumuro ruji ãmorãji ña. Ito yicõri basari rũmũ cuni ñasari masa tũ riti ba ruji ãmorãji ña. <sup>47</sup> Manujũ godagoana romiare cuni ña ya wiri ãmarãji ña. Ito yicõri masa ña tiro riojo yoari Diore busirãji ña. “Queno yirã ñama ña”, masa yi tuoãjaro yirona yoari Diore busirãji ña. Ito bajiro ña yija quenabetoja. Ito bajiri ñeñaro



ĩna yirise waja, waja yirã buto busa quenabeto tũbujarã yirãji ĩna. ĩnare bajiro mua yibe yirona queno tũoĩaña mua, yiyijũ Jesũs masare.

**Wajeago bojoro bujago Diore niyeru iso ĩsire gaye**  
(Mr 12.41-44)

**21** <sup>1</sup>Dios ya wijũ Jesũs ĩ ñaroca masa Diore yiari niyeru ĩna sãri jedore ĩna niyeru sãja ti codeyijũ ĩ. Ito bajiri niyeru jairãre cuni ĩna sãja tiyijũ ĩ. <sup>2</sup>Ito yicõri manujũ godagoro bojoro bujago ñabojagoti juati niyeruti waja mani iso sãja tiyijũ Jesũs. Cobre ñayijũ iso sãrise. <sup>3</sup>Ito bajiro iso yija ticõri, ado bajiro yiyijũ Jesũs:

—Riti mũare gotia yũ. Niyeru jairã rẽto busaro ĩsiamu adio bojoro bujago. <sup>4</sup>Ĩna niyeru jairã jaje rucocõri rėtarisere ĩsiamu ĩna. Iso bojoro bujagoama ñarocõti, iso rucobojariseti ĩsiamu, yiyijũ Jesũs ĩnare.

**Dios ya wi õjea bate godaro yiroja, Jesũs ĩ yire gaye**  
(Mt 24.1-2; Mr 13.1-2)

<sup>5</sup>Ado bajiro busiyijarã coriarã, Dios ya wire ti tũoĩacõri:

—Queno seyo quenari wi ña adi wi. Adi wi gũta quenarisena ĩna menira wi ña. Ito yicõri jãjarã Diore yiari iti wire rucubuurã, iti wi ñarotire isiĩni ĩna, yiyijarã ĩna. ĩna ito yija tũocõri, ado bajiro yiyijũ Jesũs:

<sup>6</sup>—Co rumũ ado jeyaro mua ti ñabojarise gãjerã ruyuriorã yirãji. Ito bajiri adi wi gaye gũtagã gajega joe jesabeto yiroja, yiyijũ Jesũs ĩnare.

**Adi mũmũari jediroto riojũa ado bajiro**  
**rõtaro yiroja, Jesũs ĩ yire gaye**  
(Mt 24.3-28; Mr 13.3-23)

<sup>7</sup>Ito ĩ yija ado bajiro seniĩayijarã ĩna ĩre:

—Guare riasogũ, ¿nocãta rõtaro yirojada iti guare mũ busirise? ¿no bajiro ti masicõri, “Ito bajiro rõtaro ya”, yi masirã yirãjida gũa? yiyijarã ĩna Jesure.

<sup>8</sup>Ito bajiri Jesũs ado bajiro yiyijũ:

—Queno tũoĩaña mua, gãjerã ĩna mũare ruobe yirona. Jãjarã mũare ruorona ejarã yirãji ĩna. “Yũti ña Cristo”, yirã yirãji ĩna. Ito yicõri, “Adi rumũriti ña, sũsari rumũri”, yi ruorã yirãji ĩna. Ito bajiri ĩnare tũorũnũbeja mua. <sup>9</sup>Masa ĩna gãmeri sãrise gaye mua tũoja, ito yicõri ƚjarãre, masa ĩna queno tũo ãmobeja, ĩna oca meni ãmoja



(San Lucas 21.3-4)

cuni güibeja mua. Ito bajiro rêtaro yiroja cajero sūsari rumu iti ejaroto riojua, yiyiju Jesús ñare.

<sup>10</sup> Ito yicōri mucana ado bajiro goti remoyiju:

—Co masa ñabobarāti gāmeri siarā yirāji ña. Ito yicōri co sita gāna gaje sita gāna rāca gāmeri siarā yirāji. <sup>11</sup> Co cuto meje sita buto uero yiroja. Ñiocōrā yirāji masa. Ñarise ñaro yiroja. Ito yicōri ūmacūju gaye guijorise tiyamani goaïoro yiroja.

<sup>12</sup> Ito jeyaro rêtaroto riojua, yure tuorūnurā mua ñajare muare ñiarā yirāji. Ito yicōri mua tōbujaroca yirā yirāji ña. Minjuara wiju ujarā riojo, “Ñare seti ña”, yirona muare āmi warā yirāji ña. Yure tuorūnurā mua ñajare tubiara wiju muare cūrā yirāji ña. Masa ujarā, sita ujarā riojo cuni, “Ñare seti ña”, yirona āmi warā yirāji ña muare. <sup>13</sup> Ito bajiro muare ña yija, “Jesure rucuborā ña gua”, yi gotirā yirāji mua. <sup>14</sup> “Muare seti ña”, ña yija, “Ado bajiro cūdiana mani”, yi tūoia usiriobeja. <sup>15</sup> Mua queno cudi masitoni tuo masire gaye muare jidicāgū yigūja yu. Ito bajiri queno mua busi masijare, mua wajana sigūjua muare busi rētocū yimena yirāji. <sup>16</sup> Mua jacusabatia, mua baba mesa, mua ñarā, ito yicōri mua co masi, muare gājerā ñiatoni gotirā yirāji. Ito yicōri mua coriarāre siarā yirāji ña. <sup>17</sup> Ito yicōri yure tuorūnurā mua ñajare masa jeyaro muare ti tudirā yirāji. <sup>18</sup> Queno muare tirūnugū yigūja yu. Ito bajiri cora joara godabeto yiroja muare. <sup>19</sup> Yure mua tuorūnurise mua jidicābeja catitiñarā yirāji mua, yiyiju Jesús ñare.

<sup>20</sup> Mucana ado bajiro goti remoyiju Jesús:

—Jerusalénja surara ña gāni biaja tuocōri, “Nocō mejeti adi cutore ruyurorā wana yama”, yi tuoïarā yirāji mua. <sup>21</sup> Ito bajiri Judea sita gāna, gūta yucuriju rudirūjarāji ña. Ito yicōri Jerusalén cutoju ñarā, iti cutore budigorūjarāji ña. Ito yicōri joaju ñarā cutojuare wija wadibitirūjarāji ña. <sup>22</sup> Ito rumuri buto ñeñaro tōbujarā yirāji masa. Dios oca tuti iti gotiro bajiroti, rêtaro yiroja. <sup>23</sup> Bujato bujarā yirāji iti rumuri macu sānarā ñarā. Ito yicōri macuacāre ūjurā cuni bujato bujarā yirāji. Ito rumuri iti sitare ñarise jaje ñaro yiroja. Ito yicōri ñeñaro tōbujarā yirāji ña. <sup>24</sup> Masa jājarā godarā yirāji ña gāmeri siaroca. Ito yicōri gājerāre ñiacōri jaje cutoriju tubiarā yirāji ña. Ito yicōri gaje sita gāna gājerā ñabobarāti Jerusalén cutoju ejaçōri ñarā yirāji ña. Dios ï āmorocōti iti sitare ñarā yirāji ña, yiyiju Jesús ï rāca riasotirāre.

### **Yu Masa Rijoru tudi ejaçu yigūja, Jesús ï yire gaye**

*(Mt 24.29-35, 42-44; Mr 13.24-37)*

<sup>25</sup> Mucana ado bajiro goti remoyiju Jesús:

—Sūsari rumuri ejaroto riojua ūmacañi ūmua gagu, ñami gagu, ito yicōri ñocōare cuni, tiyamani jaje goaro yiroja. Ito yicōri adi tutiju ñarā, sigū bajiro riti tuoïacōri ña masimena yirāji ña. Ide jacūrise buto iti ruyuja tuocōri, buto tuoia oca jairā yirāji ña. <sup>26</sup> Adi macarūcūro gaye rêtaroti tuoia güirā, usi jedirā yirāji masa. Ñocōa cuni quedicoarā yirāji. <sup>27</sup> Ito yicōri yu Masa Rijorure tirā yirāji masa. Ide buerina wadigu yigūja yu. Dios ï rotirisena queno ruyugu yigūja

yū, masa ñna tija. <sup>28</sup>Iti ito bajiro rētarō wado yiroca wanu oca sēocōri ti m̄uorā yirāji m̄ua. Yoari mejeti masogū yiguūji Dios m̄uare, yiyiju Jesús masare.

<sup>29</sup>Gaje goti masiore ocana ado bajiro gotiyiju Jesús ñnare:

—Higueragure tuoiate m̄ua. <sup>30</sup>Itigu jū buja ticōri, “Jabeto r̄aya c̄uma ejaroto”, yi ti masia m̄ua. <sup>31</sup>Iti bajiroti, j̄iju yū gotirise bajiro iti rētaja ticōri, “Jabeto r̄aya ñre tuor̄un̄arē Dios ñ miojuroto”, yi masirā yirāji m̄ua, yiyiju Jesús ñnare.

<sup>32</sup>Riti m̄uare gotia yū. Adi macāruc̄uro gāna ñna goda jediroto riojua, yū busiro bajiroti rētarō yiroja. <sup>33</sup>Adi sita macāruc̄uro c̄uni jedicoaro yiroja. Ito bajibojarocati yū ya ocama jedibeto yiroja. Yū gotiada bajiroti rētarō yiroja, yiyiju Jesús ñnare.

<sup>34</sup>Queno tuoiaña m̄ua. Basa gaye riti tuoia rētocū yibeja. Ito yicōri mecubeja. Ito yicōri adi macāruc̄uro gaye riti tuoiaabeja. Iti gaye riti m̄ua tuoiaja, yū t̄udi ejari r̄umu mano ucarā yirāji m̄ua. Ñacāmena yirāji m̄ua. <sup>35</sup>Adi macāruc̄uro gāna jeyaro yū t̄udi ejari r̄umu mano ucarā yirāji. Yū t̄udi ejari r̄umu yure bocati ñamena yirāji ñna. Ito bajiri mano ucarā yirāji ñna. <sup>36</sup>Ñnare bajiro bajibeja m̄uama. Queno ña yucāña m̄ua, yū ejaroto riojua. Ija iti rētaroti gayere m̄uare rētame yirona Diore busit̄inasotiba m̄ua. Ito yicōri yū Masa Rijora riojo m̄ua ña masitoni Diore busit̄inasotiba m̄ua, yiyiju Jesús ñnare.

<sup>37</sup>Co r̄umu r̄uyabeto minijuara wiju masare Dios oca gotisotiyiju Jesús. Ito yicōri ñamijua Olivos wame cutiri turiaja canigū wasotiyiju ñ. <sup>38</sup>Co r̄umu r̄uyabeto busuri j̄iju ejasotiyijarā masa ñ busirisere tuorona.

**¿No yicōri Jesure ñnarujati mani? ñna yi tuoiare gaye**  
(Mt 26.1-5, 14-16; Mr 14.1-2, 10-11; Jn 11.45-53)

**22** <sup>1</sup>Iti r̄um̄uriti cōña wayiju naju wadarise uco w̄uoya mani bare basa. Gaje Pascua wame cutiyiju iti basa. <sup>2</sup>Jesure siarona, ¿no bajiro yicōri s̄iarujati mani? yi tuoia yijarā paia ujarā, ito yicōri judio masa rotirise riasori masa. Ñre s̄ia amobojarāti masajuare tuo güiyijarā ñna.

<sup>3</sup>Iti r̄um̄uriti Judas Iscariotere r̄um̄úa uju Satanás wame cutigu quedi s̄ajayiju. Judas ñayiju jua gubojeno ñagū Jesús r̄aca riasotigu. <sup>4</sup>Paia ujarā ito yicōri minijuara wi ujarāre c̄uni busigu wayiju ñ. ¿No bajiro m̄uare Jesure gotiguti yū? yiroca, ñnare busigu wayiju ñ. <sup>5</sup>Ito ñ yija tuocōri, wanuyijarā ñna. Ito bajiri, “M̄ure niyeru ñsiana ḡua”, yiyijarā ñna Judasre. <sup>6</sup>Ñna ito yija tuocōri, ñaro bajiroti c̄udiyiju ñ. “¿Nocāta masa mano ñnare ñogū yigujada yū?” yi tuoia ñayiju ñ.

**Jesús ñ basusare gaye**  
(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup>Ito yija naju wadarise uco w̄uoya mani bare basa ejayiju. Iti r̄umu Pascua ñaroca Diore r̄uc̄ub̄uorā oveja macu s̄iacōri ñna soera r̄umu ñayiju.

<sup>8</sup>Ito bajiri Pedro, Juanre ado bajiro gotiyiju Jesús ñnare:

—Mani Pascua basa mani baroti quenotēña, yiyiju Jesús ñnare.

<sup>9</sup>Ito ñ yija tuocōri, ñre seniñayijarā ñna:

—¿Noju ḡua quenore amoati m̄u? yiyijarā ñna.

<sup>10</sup>Ado bajiro ñnare cudiyijũ Jesús:

—Cutojũ mũa ejaja ide gõna wacũre ti bujarã yirãji mũa. Ito bajiri ñre sũya warã yirãji mũa. Ñ bero wacõri ñ sãjari wijũ ejaba mũa. <sup>11</sup>Iti wi ujure ado bajiro gotiba mũa. “¿Di sõa ñnati yũ riasorã rãca Pascua basa baroti sõa?” yimi mani Ujũ, yi gotiba ñre. <sup>12</sup>Ito bajiro mũa yija tuocõri, co tuti weca ñnari sõa, jaja sõa, quenocãra sõa muare gotigũ yiguĩji. Muare ñ gotija bero iti sõajũ bare menima mũa, yiyijũ Jesús ñnare.

<sup>13</sup>Ito ñ yija tuocõri, wayijarã ñna. Itojũ ejacõri ñ gotiado bajiroti bujayijarã ñna. Ito yicõri bare meniijarã Pascua basa ñnaroca ñna baroti.

<sup>14</sup>Bare tĩjaroca Jesús ñ rãca riasotirã rãca bare jeoado tũ rujiijarã ñna. <sup>15</sup>Ito yija ado bajiro ñnare gotiyijũ Jesús:

—Yũre ñna sũaroto riojũa adi Pascua basa mũa rãca basũsarocu ruje tuõiacu yũ. <sup>16</sup>Itire mũcana tũdi mũa rãca babicu yigũja yũ, Dios rotirojũ ñre tuorũnũrãre ñ miojuroto riojũa, yiyijũ Jesús ñnare.

<sup>17</sup>Ñ ito yija bero rujatẽro ãmi rucocõri, “Queno ya Dios mũ”, yiyijũ ñ. Ito yicõri ñnare ado bajiro yiyijũ Jesús:

—Ñmo adi muamasiti bato idiya. <sup>18</sup>Dios rotirojũ ñre tuorũnũrãre ñ miojuroto riojũa, mũa rãca juaji uyé ide idibicũja yũ, yiyijũ Jesús ñnare.

<sup>19</sup>Ito bero ñ ya ãmona naju ãmi rucocõri, “Queno ya Dios mũ”, yiyijũ. Ito bero igata batocõri ado bajiro yiyijũ ñnare:

—Adi ña yũ ya ruju robo bajiro bajirise. Muare yiari goda ñsigũ yigũja yũ. Ito bajiri iti bacõri yũre tuõĩama mũa, yiyijũ ñ ñnare.

<sup>20</sup>Ñna baja bero ito bajiroti yiyijũ uyé ide tẽrona. Ado bajiro yiyijũ ñnare:

—Yũ ya rí mũare yiari iti budija ticõri, “Riti ña Dios ñ gotire. Bucũ oca jidicãcõri mame oca wasoãni Dios”, yirã yirãji mũa, yiyijũ Jesús ñnare.

<sup>21</sup>Mũcana busigũ ado bajiro yiyijũ Jesús:

—Gãjerã yũre ñna ñnatonĩ gotirocu ado mani rãca ñnaguĩji. <sup>22</sup>Yũ ñna Masa Rijoru. Dios ñ ãmoro bajiroti rẽtaro yiroja yũre. Ito bajibojarocati masa yũre ñnatonĩ gotirocu bujato bujagũ yiguĩji, yiyijũ Jesús ñnare.

<sup>23</sup>Ito ñ yija tuocõri, ñnamasiti gãmeri seniĩayijarã ñna:

—¿Ñimũ ñnaguĩjida ñnatonĩ gotirocu? yiyijarã ñna.

### **¿Ñimũ ñnaguĩjida ñnasagũ ñnaroçu? yi Jesure ñna seniĩare gaye**

<sup>24</sup>Ito yija ado bajiro gãmeri tuoĩa busiyijarã ñna:

—¿Ñimũ ñnaguĩjida mani wato rẽtoro ñnasagũ ñnaroçu? yi tuoĩayijarã ñna.

<sup>25</sup>Ito bajiro ñna tuoĩaja ticõri, ado bajiro yiyijũ Jesús ñnare:

—Adi macãrucũro gãna ujarã ñnasarã ñna ya moari masare rotirãji. Ito bajiri ñna moa ñsiri masajũa ñe gaje yire manijare, riojoti “Baũ, quena ña”, yicõrãji ñna. <sup>26</sup>Mũama ito bajiro meje bajirũja. Ñnasari masa mũa ñna ãmoja, “Ñnasarã meje ña gũa”, yi tuoĩarã yirãji mũa. Ito yicõri no rotiri masũ ñna ãmogũ, muare ñ moa ñsija quena. <sup>27</sup>Mũa tija ¿ñimũjũa ñnati ñnasari masũ ba rujiũjũa, ecari

masujua? Yu tuoïaja, ba rujigujua ñami ñasagu. Ito bajiri mua Uju ñabojaguti, mware moa ïsiri masu robo bajiro ado mua watoju ña yu, yiyiju Jesús ñnare.

<sup>28</sup>Coji ruyabeto yu töbujaja yu räca ñatĩnacu mua. Gäjerä yure ti tudibojarocati muama yure jidicäbiticu. <sup>29</sup>Yu rotirotoju yure cügũ yiguïji Dios. Ito bajiri mua cuni yu rotiroju yu räca ñarä yiräji mua. <sup>30</sup>Yu räca barä yiräji mua. Itoju yu räca ñarä ujarä ñna rujiri cumuroju rujirä yiräji mua cuni. Ito yicöri Israel sita gäna jua gubojeno masa buturi gänare yu räca beserä yiräji mua, yiyiju Jesús ñnare.

**“Jesure masibea yu”, yigu yigujua mu, Pedrore Jesús ï yire gaye**  
(Mt 26.31-35; Mr 14.27-31; Jn 13.36-38)

<sup>31</sup>Gaje ado bajiro gotiyiju mani Uju:

—Simón tuoja mu. Trigo ajeri ñna sïguë bateado bajiro mware yi ämoami rümúa uju. Mure rucocöri mu uju ñna ämoguïji Satanás wame cutigu. <sup>32</sup>Ito ï yi ämobarocati mure yiari Diore busisotia yu, Diore mu tuoïa jidicäbititoni. Mucana yure mu tuorünu quenoja mu ñarä yure ñna tuorünu oca sëotoni ñnare ejabuaba, yiyiju Jesús Simón Pedrore.

<sup>33</sup>Ito bajiro ï yija tuocöri, ado bajiro yiyiju Simón Pedro:

—Yu Uju mure ñna tubiaja, mure ñna siäja cuni mu räca warocu ñacä yu. Mure jidicäbicuja yu, yiyiju ï Jesure.

<sup>34</sup>Jesujua ado bajiro yiyiju Pedrore:

—Riti mure gotia yu. Adi ñnamiti busurijua cara ï yujiroto riojua udiäji, “Jesure masibea yu”, yigu yigujua mu, yiyiju Jesús Simón Pedrore.

**Jesure ñna siaroti cöña ware gaye**

<sup>35</sup>Ito ï yija bero ado bajiro yiyiju Jesús ï räca riasotiräre:

—Yu oca goti ucurona cöacu yu mware. “Niyeru sära buju, guboco cuni ämima”, yibiticu yu mware. Ito bajiro yu yibojarocati disejua mware ruyabiticu, yiyiju Jesús ñnare:

—Ri ya mu, ruyabitibojacu guare, yiyijarä ñna Jesure.

<sup>36</sup>Ñna ito yija ado bajiro cudiyiju Jesús ñnare:

—Adocätamäri ïja mware rotia yu. No niyeru rucogu, niyeru sära buju rucogu cuni ämi waja quena. Sarera jäi rucobicu ï ya camisa ïsicöri wasoa ämija quena. <sup>37</sup>“Ñeñaro yiräre ñna siädo bajiro siarä yiräji ïre”, yi gotia Dios oca yure rëtaroti gaye. Ito bajiroti rëtaru yiroja iti, yiyiju Jesús ñnare.

<sup>38</sup>Ito ï yija tuocöri:

—Gua Uju ado ñna jua jäi sarera jäiri, yiyijarä ïre.

—Itocö ñajaro maji, yiyiju Jesús ñnare.

**Getsemaní wame cutiri weseju Jesús i Diore rúcabuore gaye**

*(Mt 26.36-46; Mr 14.32-42)*

<sup>39</sup>Ito i yija bero i yisotiro bajiro yigu Olivos wame cutiri tariaju wayiju i. Ito bajiri i rāca riasotirā ire suya wayijarā. <sup>40</sup>Diore i busisotiroju ejacōri ado bajiro gotiyiju Jesús inare:

—Diore seniña mua ñeñaro yibe yirona, yiyiju Jesús inare.

<sup>41</sup>Ito yicōri inare cūcōri gūtagā rea ñucaja quedirocō wayiju Jesús. Ito yicōri ñini rŷjūcōri Diore busiyiju Jesús. <sup>42</sup>Ado bajiro yiyiju i Diore:

—Cuna mu āmoja ija yu tōbujaroti gaye camotaya. Ito bajibojarocati yu āmoro bajiro meje mu yija quena. Mu āmoro bajirojua mu yija quena, yiyiju Jesús Diore.

<sup>43</sup>Ito i yija bero sīgū āngel ire goaīcōri i oca sēoroca yiyiju. <sup>44</sup>Buto tuoīa oca jaicōri tōbujayiju i. Ito yicōri buto oca sēocōri Diore busiyiju. Buto oca sēocōri i busiroca riti asi budirise bajiro rí budiyiju ire.

<sup>45</sup>Diore busi tiogū wumu rūgūcōri mucana i rāca riasotirā tu wayiju i. Ina tu ejacōri tiyiju i. Buto tuoīa oca jaicōri caniana ñayijarā ina. <sup>46</sup>Ito yija ado bajiro yiyiju i:

—¿No yija caniatu mua? Diore seniña mua ñeñaro yibe yirona, yiyiju Jesús inare.

**Jesure ina ñiare gaye**

*(Mt 26.47-56; Mr 14.43-50; Jn 18.2-11)*

<sup>47</sup>Jesús i busiroca riti, masa jājarā ejayijarā. Inare ūmatā wacu Jesús tu eja rūgūyiju Judas wame cutigu. I ñayiju Jesús rāca riasotigorū jua gūbojeno ñarā rāca ñagoru. Jesús tu ejacōri wayugaju muwācōri usuyiju ire. <sup>48</sup>Ito yija ado bajiro yiyiju Jesús ire:

—Judas, yu ña Masa Rijoru. ¿Gājerā yure ñiatoni yure usu ioati mu? yiyiju Jesús ire.

<sup>49</sup>Ito gāna Jesús rāca ñarā, iti ito bajija ticōri, ado bajiro seniñayijarā Jesure:

—¿Gua Uju sarera jāina inare gāmeri jarujabeati mani? yiyijarā ina.

<sup>50</sup>Ina rāca gagu sīgū paia ujure moa isiri masure riojocaduja gāmoro jatayiju. <sup>51</sup>Ito bajiro i yija ticōri, ado bajiro yiyiju Jesús:

—Ito mua yirise itocō jidicāña, yiyiju Jesús.

Ito bajiri gāmoro moaīcōri ire yisoyiju Jesús. <sup>52</sup>Ito yicōri ire āmi warona paia ujarā, minijuara wi ujarā ito yicōri judio masa bācūrāre cūni, ado bajiro yiyiju Jesús:

—Riniri masu meje ña yu. ¿No yirā yure āmirona sarera jāiri rucocōri, yucu rucocōri ejati mua? <sup>53</sup>Co rumu ruyabeto minijuara wiju yu ñaja yure ñiabiticu mua. Adocāta rūmūa uju i āmoro bajiro, bajiro yiroja. Ito bajiri ire cūdirā mua āmoro bajiro ya mua, yiyiju Jesús inare.

**Jesure masibea yu, Pedro i yire gaye**

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup>Ito i yija bero paia uju ya wiju ire ami wayijarã ina. Pedro sã busaju sayayiju. <sup>55</sup>Paia uju ya wi soje riojo jea riocõri sũma rujiyijarã ito gãna. Pedro ina tu ejacõri ina wato jea sũma rujiyiju i cuni. <sup>56</sup>Sigõ iti wi moari maso i sũma rujija ticõri, ire riti tiyijo. Ito yicõri ado bajiro yiyijo iso:

—Åni cuni Jesús rãca gagu ñami, yiyijo iso.

<sup>57</sup>Ito bajiro iso yija tuocõri, goti amobisiju Pedro.

—Ire masibea yu, yiyiju i isore.

<sup>58</sup>Ito bero yoa busari gãji ire ticõri ado bajiro yiyiju:

—Jesús rãca gaguti ña mu cuni yiyiju i Pedreore.

Ito i yija tuocõri:

—Buguti ya mu. Meje ña yuama, yiyiju Pedro.

<sup>59</sup>Coji cõre berocõ gãji, ado bajiro ire yisayiju:

—Riti ya yu, Jesús rãca gaguti ñami ani. Galilea gaguti ñami i. Ito bajiroti busiami, yiyiju i gajerãre.

<sup>60</sup>Ito bajiro i yija tuocõri, ado bajiro yiyiju Pedro:

—Mu busirisere masibea yu, yiyiju Pedro.

Ito bajiro i busiroca riti cara yujicoayiju ija. <sup>61</sup>Ito i bajiroca riti mani Uju juda tiyiju Pedreore. Ito i yija ticõri, mani Uju i gotire tuoia bujayiju Pedro. Cara i yujiroto riojua udiãji, “Jesure masibea yu”, yigu yiguja mu, Jesús i yire gaye tuoia bujayiju Pedro. <sup>62</sup>Ito bajiri gajero busa wacõri buto tuoia otiyiju Pedro.

**Jesure ina aja tudire gaye**

*(Mt 26.67-68; Mr 14.65)*

<sup>63</sup>Jesure ñiacõri ire coderi masa aja tudiyijarã. Ito yicõri ire jayijarã. <sup>64</sup>I ya cajea moabiãcõri i ya rioju jayijarã ina. Ito yicõri ado bajiro seniãayijarã ina ire.

—Queno tuoãgũ mu ñaja, “Í yure jami”, yi masigũja mu, yiyijarã ina ire.

<sup>65</sup>Gaje jaje ire aja tudiyijarã ina.

**Ujarã ñasarã, “Seti ña mure”, Jesure ina yire gaye**

*(Mt 26.59-66; Mr 14.55-64; Jn 18.19-24)*

<sup>66</sup>Gaje rumu busuri, judio masa bucãrã, paia ujarã, ito yicõri judio masa rotirise riasori masa cuni, minijuayijarã. Minijuacõri Jesure ujarã ñasarã riojo ami wayijarã ina. Ito ejacõri ire seniãayijarã ina:

<sup>67</sup>—¿Muti ñati Cristo Dios i cõaru? yiyijarã ina Jesure.

—“Íti ña yu”, yu yibojaja cuni tuomena yirãji mua yure. <sup>68</sup>Muare yu seniãabojaja cuni cudimena yirãji mua. Ito yicõri yure jidicãmena yirãji mua. <sup>69</sup>Jane adi rumuna rëtoro masigũ Dios ya riojocaduja rucubnoraju rujigu yiguja yu. Yu ña Masa Rijoru, yiyiju Jesús ñnare.

<sup>70</sup>Ito bajiro i yija tuocõri, ado bajiro seniãa jediyijarã ina:

—¿Dios Macu mu ñarise riti ñati? yiyijarã.

—Íti ña yu. Mua yiro bajiroti bajaia, yiyiju Jesús ñnare.

<sup>71</sup>Ito bajiro i yija tuocõri:

—“Íti ñami ñeñaro busigu”, gãjerã ñna yire amobeia ija. Manimasiti i busija tuoia mani, yiyijarã ñna.

**Pilato taju Jesure ñna ãmi ejare gaye**

(Mt 27.1-2, 11-14; Mr 15.1-5; Jn 18.28-38)

**23** <sup>1</sup>Ito yija Pilato riojo Jesure ãmi wa jediyijarã ñna. <sup>2</sup>Uju riojo ãmi ejacõri, “Ãni ñami seti cutigu”, yirona busisuooyijarã ñna:

—Ãni ñami gua masa ricati riti tuoiaroca yigu. Ito bajiri ado bajiro yiqui i gua masare. “Roma gagu ujure i rotiro bajiro niyeru isibitiruja muare”, yiqui ãni. Ito yicõri, “Yuti ña Cristo Dios i cõaru mua uju”, yiqui i, yiyijarã ñna Pilatore gotirã.

<sup>3</sup>Ñna ito yijare ado bajiro seniñayiju Pilato Jesure:

—¿Judio masa uju ñati mu? yiyiju i Jesure.

—Au ñti ña yu. Mu yiro bajiroti bajaia, yiyiju Jesús.

<sup>4</sup>Ito i yija tuocõri, paia ujarã, masare cuni ado bajiro yiyiju Pilato.

—Yu tija ñejuia seti ma ñnare, yiyiju Pilato ñnare.

<sup>5</sup>Ito i yibojarocati ñre seti ñnasameti, yi busiyijarã ñna:

—Í riasorise tuocõri, sigũ bajiro meje tuoiamama Judea sita gãna ija. Galileaju cajero riasosuoñi i. Ito bajiro riaso wadicõri adoju ejami i, yiyijarã ñna.

**Herodes taju Jesure ñna ãmi ejare gaye**

<sup>6</sup>Ñna ito yija tuocõri:

—¿Galilea gagu ñati ãni? yi seniñayiju Pilato ñnare. <sup>7</sup>—Galilea gaguti ñami i, yiyijarã ñna.

Ñna ito yija tuocõri:

—Adi rumuriti ejami Galilea gagu uju Herodes wame cutigu. Ito bajiri i tu ãmi wasa mua, yiyiju Pilato ñnare. <sup>8</sup>Jesús rãca ñna ejaja ticõri, buto wanuyiju Herodes. Yoari i oca tuocõri ruje ñre ti amoyiju Herodes. Tiyamani Jesús i yija ti amoyiju Herodes. <sup>9</sup>Jesure ticõri jaje ñre seniñabojayiju i. Ito bajibojarocati Jesús coji cudibisiju ñre. <sup>10</sup>Paia ujarã, judio masa rotirise riasori masa cuni ito ñayijarã. “Seti ñnacõa ñre”, yiyijarã ñna. <sup>11</sup>Ito yija bero, Herodes i ya surara rãca Jesure aja tudiyijarã ñna. ñre tudisarã ñarã ujarã mesa ñna sãñarise ñre sãyijarã ñna, ñre aja tudirã. Ito bajiro ñna yija bero mucana tudi Jesure Pilato taju cõayiju Herodes. <sup>12</sup>Ito bajiro ñna yira rumuti Herodes Pilato rãca queno gãmeri baba cutiyijarã ñna ija. Ito bajiro ñna bajiroto riojua buto gãmeri ti tudirã ñayijarã ñna maji.

**Jesure sãaruja mani, ñna yire gaye**

(Mt 27.15-26; Mr 15.6-15; Jn 18.39-19.16)

<sup>13</sup>Mucana Jesure ñna ãmi ejaja ticõri, paia ujarã ñnasarã ujarã, ito yicõri masare cuni mioyuyiju Pilato. <sup>14</sup>Ado bajiro yiyiju i:



—“Gua masare sīgũre bajiro gua tũoĩaroca yibeami ãni”, yirona yũre ãmi ejacu mua. ãnire, “¿Riti mũre seti ñati?” yirocu seniĩabojacu ya, mua tiro riojo. Ito bajibojarocati, “Ĩre seti ña”, mua yibojarocati disejua seti ma ĩre ya tija. <sup>15</sup>Ito yicĩri, Herodes cũni, “Iti seti ña ĩre”, yi masibĩsi ĩ cũni. Ito bajiri, “Iti seti ña ĩre”, yi masibiti wacu guaũuare judacõañi ĩ. “Ito bajiro seti cutiami ãni”, yi masibea mani. Ito bajiri ĩre siado ma mani. <sup>16</sup>Ĩre baje rotigu ya ya. Ito yicĩri ĩre bucõacũja ya, yiyiju Pilato.

<sup>17</sup>Pascua basa ñaroca, “ãnire mu bucõare ãmoa gua”, masa ĩna yigureti bucõasotiyiju Pilato. Ito bajiri ado bajiro ĩnare seniĩayiju ĩ: <sup>18</sup>“¿Nĩmuũuare ya bucõare ãmoati mua?” ĩ yiroca masajua ado bajiro awasã busiyijarã:

—Sĩacõña ãni ãmũgũre. Ito yicĩri, Barrabás wame cutigure jidicãña, yi awasãyijarã ĩna.

<sup>19</sup>Cũto gãnare oca menicĩri siari masu ĩ ñajare ĩna tubiaru ñayiju Barrabás. <sup>20</sup>Jesũuare jidicã ãmobjayiju Pilato. Ito bajiri mũcana masare busibojayiju. <sup>21</sup>Ito bajiro ĩ busibojarocati buto busa awasãyijarã ĩna:

—Sĩacõũja ĩre. Sĩacõũja ĩre, yiyijarã ĩna.

<sup>22</sup>Mũcana tũdi udiãji busigu ado bajiro yiyiju Pilato ĩnare:

—¿Ñeoni ñeñaro yicati ãni? Ya tija, “Itina godarũjami ĩ”, yi masibea ya ĩre. Ito bajiri ĩre bajecĩri jidicãũja ya, yibojayiju ĩ masare.

<sup>23</sup>Buto awasã busirã, “Yucutẽoju ĩre jaju siãña”, yiyijarã ĩna. Buto masa ĩna awasãja, paia ujarã ĩna awasãja tũocĩri, “Ĩna ãmoro bajiroti yijaro no cũni”, yi tũoĩayiju Pilato. <sup>24</sup>Ito bajiri, “Ĩna ãmoro bajiroti yicũja no cũni”, yi tũoĩayiju Pilato ĩja. <sup>25</sup>Ito bajiro tũoĩacĩri, masare oca menicĩri siari masure bucõayiju Pilato. Ito yicĩri Jesure ĩnare ĩsiyiju Pilato, ĩna ãmoro bajiro ĩna yitoni.

**Yucutẽoju Jesure ĩna jaju siãre gaye**  
(Mt 27.32-44; Mr 15.21-32; Jn 19.17-27)

<sup>26</sup>Ito bajiri Jesure yucutẽoju jaju siãrona ĩre ãmi wayijarã ĩna. Ito bajiro ĩna waroca Cirene gagu Simón wame cutigu joaju wadicĩri ejayiju. ĩre ti bujacĩri yucutẽo ĩre gaja rotiyijarã surara. Ito bajiri Jesús bero yucutẽo gaja sũyayiju ĩ.

<sup>27</sup>Masa jãjarã ĩ bero sũya wayijarã. Ito yicĩri romia jãjarã awasã otiyijarã ĩre tũo mairã. <sup>28</sup>Ito bajiro ĩna otiroca ĩnare juda ticĩri ado bajiro yiyiju Jesús:

—Jerusalén gãna romia yũre otibesa mua. Muamasiti, ito yicĩri mua riãre rẽtarotire tũoĩa otiya mua. <sup>29</sup>Ado bajiro yirã yirãji masa buto ĩna tũbũjari rũmu: “Romia riã mana queno wanũ quenama ĩna. Ito yicĩri riã rũcomena, ũjumenã cũni wanũama ĩna”, yirã yirãji masa. <sup>30</sup>Gũare Dios tibe yirona ado bajiro yirã yirãji masa: “Gua joe juja biaya”, yirã yirãji gũta yucũrire. Ito yicĩri, “Gũare õjea biaya”, yirã yirãji tũriare. <sup>31</sup>Yũũuare tũbũjaroca ĩna yija, ya rẽto busaro mua tũbũjaroca yirã yirãji ĩna, yiyiju Jesús romiare juda ticĩri.

<sup>32</sup>Ñeñaro yi jairã jũarãre ãmi wayijarã Jesús rãcati ĩnare jaju siãrona.

<sup>33</sup>Calavera wame cutiriju ejacĩri Jesure jajuyijarã ĩna. Ito yicĩri ĩ rãca

gāna jūarāre cūni, sīgū Jesús ya riojocaduja, ito yicōri gāji ī ya gācodujare jajuyijarā īna cōtoni. <sup>34</sup>Īre īna jajuroca ado bajiro yiyijū Jesús Diore:

—Cuna, yure īna ñeñaro yirisere īnare ācabojoya, “Buto ñeñaro ya mani”, yi masibeama surara, yiyijū Jesús Diore.

“¿Jesús ī sāñagorere ñimujua bujagu yiguūjida?” yirona gūta ajeri rea ajejijarā surara. <sup>35</sup>Ito bajiro yi ajecōri ī ya yutabujuri gāmeri batoyijarā īna īja. Ī godaroca jājarā masa ti ñayijarā Īre. Ito ñarā ujarā Jesure aja tudiyijarā. Ado bajiro aja tudiyijarā īna:

—Gājerāreama masoñi ī. Riti Cristo Dios cōaru ī ñaja ĩmasiti masogū yiguūji, yi aja tudiyijarā īna.


<sup>36</sup>Surara cūni ito ñarā, ito bajiroti Īre aja tudiyijarā. Ī tū eja rūgūcōri uyé ide sūerise Īre iobojayijarā īna. <sup>37</sup>Ito yicōri ado bajiro yiyijarā īna:

—Riti judio masa uju mū ñaja, mūmasiti masogū yigūja mū, yiyijarā īna.

<sup>38</sup>Jesús ya rijoga weca ũdiaji gaye oca ucare wāñayijū. Griego, Latín, Hebreo ocana cūni ucare ado bajiro ñayijū: “Āni ñami judio masa uju”, yi busiyijū iti īna ucare.

<sup>39</sup>Sīgū ñeñaro yi jaigū ī rāca godarocū ado bajiro yiyijū:

—Riti Cristo mū ñaja mūmasiti masoña. Ito yicōri guare cūni masoña mū, yi aja tudiyijū Īre.



(San Lucas 23.32-34)

40 Gãji gaje dũja gagũ Jesús rãca godarocũ, ado bajiro yiyijũ Jesure aja tudigũjuare:

—¿Diore güire mati mure? Mani ñeñaro yirise waja godarã ya mani.

41 Ñeñaro yicũ mani. Ito bajiri iti waja quenabeto tũbujarã ya mani. Mani ñeñaro yiado bajiroti itire waja yirã ya mani. Ito bajibojarocati ãniama ñeñaro yibicũ ñabojaguti mani rãca godagu yigũiji, yiyijũ ï Jesure aja tudigure.

42 Ito yija Jesure ado bajiro yiyijũ ï:

—Mũ rotirojũ ejacõri mure tuorũnrãre mũ miojusũoja yure ãcabojabeja, yiyijũ ï Jesure.

43 Ito bajiro ï yija tuocõri:

—Jane adi rãmuti ñe ñeñarise manojũ yũ rãca ñagũ yigũja mũ, ado yũ yirise riti mure gotia yũ, yiyijũ Jesús ïre.

#### Jesús ï usi jedire gaye

(Mt 27.45-56; Mr 15.33-41; Jn 19.28-30)

44 Ito bajiro iti baji ñaroca ãmũa gũdarecocõ tũjayijũ. Ito yija bero macãrcũro ñarocõti rãiocoayijũ. Yucũ weca ãmacañi tũjarocacõ rãitãiyijũ.

45 ãmacañi ãmũa gagũ cuni busubisijũ. Ito yicõri minijuara wi yobiado saya webutiro gũdarecona ñigãyijũ. 46 Ito bajiroca Jesús ado bajiro awasãyijũ:

—Cuna, yũ ya Æsi ãmiña mũ ïja, yiyijũ Jesús Diore.

Ito yi tiogũti usi jedicoayijũ.

47 Surara ẽjũ Roma gagũ ito bajiro iti rõtaja ticõri, Diore rucubũo busiyijũ:

—Riti seti manibojañi ãni, yiyijũ surara ẽjũ.

48 Masa ito ti ñana ito bajiro iti rõtaja ticõri, bojori bũjarã ïna ya usi riojo jatu wayijarã. 49 Jesús rãca baba cutigoana Galilea gãna romia ïre sũya wana cuni sõ busajũ ti rũgõyijarã ïna, ito iti bajijare.

#### Jesure ïna yujere gaye

(Mt 27.57-61; Mr 15.42-47; Jn 19.38-42)

50 Sīgũ ñayijũ ï yiro bajiroti queno yigũ. José wame cutigu ñayijũ ï. Judea sitajũ Arimatea wame cutiri cutojũ gagũ ñayijũ ï. Judio masa ẽjarã ñasari masa rãca gagũ ñayijũ ï. 51 “Ïre tuorũnrãre ï rotirojũ miojugũ yigũiji Dios”, yi tuoña yugũ ñayijũ ï. Ito bajiri ẽjarã ñasarã ïna yirisere queno ïna robo tuoñabisijũ ï.

52 Ito bajiri Pilatore busirocũ wayijũ ï. Itojũ ejacõri Jesús ya rujũre seniyijũ ï. 53 “Baũ”, ï yija tuocõri, Jesús ya rujũre yucutõjũ ñagũre rujiojũ wayijũ ï. Ïre rujiocõri saya botirona ïre gũmayijũ. Ito yicõri gũta tũriajũ ïna goje meniadojũ Jesús ya rujũre cũyijũ ï. Yujeñaña mani goje ñayijũ iti goje. 54 Tujacãra rãmũ riojũna ïna queno yuri rãmũ ñayijũ José Jesure ï yujera rãmũ. Ito bajiri jabetoti ruyayijũ tujacãra rãmũ iti busuroto.

55 Cajero Galilea gãna romia Jesure sũya wadiana gũta gojejũ ïre ïna cũja, “¿Ado bajiro cũati ïna?” yi tiyijarã ïna. 56 Ñna cũja bero wiju tudĩ wayijarã

ĩna. Wijũ tũdi ejacõri queno sũtirise, ito yicõri rujũ ture gaye quenoyijarã ĩna. Ito yija judio masa ĩna rotiado bajiroti tujacãra rumũ ñacõayijarã ĩna.

### Jesús ĩ tũdi catire gaye

(Mt 28.1-10; Mr 16.1-8; Jn 20.1-10)

**24** <sup>1</sup>Tujacãra rumũ bero busuri jĩju tũdi tirã wayijarã ĩna. Sũtirise rujũ ĩna turotire ĩna moa quenorere ãmi wayijarã ĩna. Gãjerã romia cũni ĩna rãca wayijarã. <sup>2</sup>Itoju ejacõri ĩna tija gãta goje biado gajeroju iti cũ ñaja tiyjarã ĩna. <sup>3</sup>Ito bajija ticõri, sãjayijarã ĩna. Sãjacõri mani Uju ya rujure ti bujabisijarã ĩna. <sup>4</sup>Ito bajija ticõri, ucayijarã ĩna. Ito yicõri, “Ito yirũja manire”, yi masibisijarã ĩna. Ito bajiro ĩna baji ñaroca ãmũa jũarã ĩna tũ rũgõja tiyjarã. Saya yorise sãñarã ñayijarã ĩna. <sup>5</sup>ĩnare gãirã jacaju muqueayijarã ĩna. Ito bajiro ĩna gãiija ticõri, ado bajiro yiyijarã ĩna ãmũa:

—¿No yija ĩ catibojaroti godanare ĩna yujeroju ãmati mũa? <sup>6</sup>Mami ĩ adoju. Catigu ñami ĩ. Mũcana tũdi catirũ ñami ĩ. Galilea ñagũ mũare ĩ busire tũoĩate mũa. Ado bajiro mũare gotĩni ĩ: <sup>7</sup>“Yũ Masa Rĩjorũre ñeñaro yirã yũre ñiacõri yũ tũbũjaroca yirã yirãji ĩna. Ito yicõri yũre yucũtẽoju sãrã yirãji ĩna. Ito bajiro ĩna yibojarocati mũcana uĩa rumũ bero catigu yigũja yũ”, yi gotĩni Jesús mũare, yiyijarã ĩna romiare.

<sup>8</sup>Ito bajiro ĩna yija tuocõri, Jesús ĩ busire gaye tũoĩa bujayijarã ĩna. <sup>9</sup>Ito yija bero iti tuo tũdi wacõri Jesús rãca riasotigoana coga gubojeno ñarã, ito yicõri ito ñarãre cũni jeyaro ĩna tigorere gotiyijarã ĩna. <sup>10</sup>ĩna romia Jesús rãca riasotigoanare oca ãmi wana ñayijarã María Magdalena, Juana, María Santiago jaco cũni. Ito yicõri gãjerã romia cũni ñayijarã iti oca gotiana. <sup>11</sup>Ito bajiro romia gotija tuocõri, “Bũrãti yama”, yi tũoĩayijarã Jesús rãca riasotigoana. Ito bajiri ĩnare tuorũnũbisijarã ĩna.

<sup>12</sup>Ito bajibojarocati Pedroama ãmaquedi wacõri masari cuma tigu wayiju. Ito totiju ĩ tija gãmado riti gajeroju iti cũ ñaja tiyiju ĩ. Ito bajija ti ucacõri ĩ ya wijũ tũdi wayiju ĩ.

### Jũarã ĩ rãca riasotigoanare Jesús ĩ goaĩore gaye

(Mr 16.12-13)

<sup>13</sup>Iti rumũ riti jũarã Jesús rãca riasotigoana Emaús wame cutiri cutoju wasũoyijarã. Jerusalén sõjua once kilõmetroco ñayiju Emaús cuto. <sup>14</sup>Jeyaro ĩna tigure gaye warãti busi wayijarã ĩna. <sup>15</sup>Ito bajiro ĩna tũoĩa busi waroca Jesuti mũcana ĩna tũ ejacõri ĩna rãca wayiju. <sup>16</sup>ĩre tigoana ñabojarãti “Jesuti ñami ĩ”, yi masibisijarã ĩna. <sup>17</sup>Ito bajiro ĩna waroca Jesús ado bajiro ĩnare seniĩayiju:

—¿Ma warã ñe gaye tũoĩa busiati mũa? Ito yicõri, ¿no yija bojori bujati mũa? yiyiju Jesús ĩnare.

<sup>18</sup>Ito ĩ yija tuocõri, Cleofas wame cutigu, ado bajiro cũdiyiju:

—Masa jeyaro Jerusalenju rẽtare gayere masiama ĩna. ¿No yija Jerusalenju ñaru ñabojaguti itire masibeati mũ? yiyiju ĩ Jesure.

<sup>19</sup>Ito bajiro ĩ yija tuocõri:

—¿Ñe rētacati? yiyijũ Jesús.

Ito ï yija ado bajiro yiyijarã ïna Jesure:

—¿Jesús Nazaret gagũre rētare masibeati mũ? Ado bajiro baja ita. Diore goti ïsiri masũ ñaquĩ ï. Jaje tiyamani yiquĩ ï. Ito yicõri Dios ï masirisena masare riasoquĩ ï. Dios cuni ïre rãcũbuõni. <sup>20</sup>Paia Ƴjarã, gua Ƴjarã cuni ïre sĩa rotirã gãjerãre ïsicã ïna. Ito yicõri yucutẽojũ ïre sĩa roticã ïna. <sup>21</sup>“Ï ñagũ yiguĩji gua masa Israel gãna Ƴjũ. Guare masorocũ ñaguĩji ï”, yĩ tuoĩabojacũ gua. Ito bajibojarocati Ƴdia rãmũ tũja ïre ïna sĩaja bero. <sup>22</sup>Jijũ gua rãca gãna romia masari cuma tirã wabojana. Ñe manoti ti ejayijarã ïna. Ito bajiri guare ïna goti tũdi ejajare Ƴcabũ gua. <sup>23</sup>Gua tũ ejacõri ado bajiro goticã ïna: “Dios ñaro gãna ángel mesare jũarã tibũ gua. ‘Mami Jesús. Catigu ñami’, yĩ gotima ïna guare”, yĩ goti tũdi ejacã guare romia. <sup>24</sup>Gua rãca gãna coriarã wacõri masari cuma tirã ejañi. Ito bajiri romia ïna gotiado bajiro ti ejayijarã ïna. Itojũ Jesure ti bũjabisijarã ïna cuni, yiyijarã ïna Jesure.

<sup>25</sup>Ïna ito yija tuocõri, ado bajiro yiyijũ Jesús ïnare:

—Queno tuoĩa masimena ña mũa maji. Ito bajicõri, Diore goti ïsiri masa ïna gotija tuorã ñabojarãti ï ocare tuorũnũ jeobea mũa maji. <sup>26</sup>Yũre tuoĩa yurã ado bajiro yĩ ucayõni Diore goti ïsiri masa: “Dios ï ñarõjũ ï ejaroto riojua tũbũjagũ yiguĩji Cristo Dios ï cõaru”, yĩ ucayõni Diore goti ïsiri masa, yiyijũ Jesús ïnare.

<sup>27</sup>Ito ï yija bero Dios oca tuti ï oca gaye ita bũsija ïnare goti rētobuyijũ Jesús. Cajero Moisés ï ucara tuti gaye ïnare goti rētobuyijũ ï. Ito yicõri Diore goti ïsiri masa ïna ucare cuni goti rētobuyijũ Jesús ïnare.

<sup>28</sup>Ïna wara cutojũ ejacõri gaje majũ riojoti rēta wacũ bajiro yiyijũ Jesús. <sup>29</sup>Ï rēta wabe yirona ado bajiro yiyijarã ïna:

—Ado gua rãca tujaya mũ. Ûmacañi quedi sãjacoami. Rãio wato ya ïja, yiyijarã ïna Jesure.

Ïna ito yija tuocõri, ïna rãca wijũ sãjayijũ Jesús ito canirocũ. <sup>30</sup>Bara casabo tũ ïna rujiroca najũ ãni rãcoyijũ Jesús. Ito yicõri, “Queno ya Dios mũ”, yiyijũ ï. Ito ï yija bero igata batocõri ïnare ïsiyijũ ï. <sup>31</sup>Ito bajiro ï yirocati ïna ya cajeari titãcãdo robo bajiro ejayijũ ïnare. Ito bajiri Jesure ti masiyijarã ïna ïja. “Jesuti ñami ãni”, ïna yirijuti godacoayijũ Jesús mũcana. <sup>32</sup>Ïna jũarã ado bajiro gãmeri bũsiyijarã ïna:

—Ma manire ï bũsi wadija queno Ƴsi quedi sãjamũ manire. Ito yicõri Dios oca tuti gaye manire ï goti rētobuyija queno Ƴsi quedi sãjamũ manire, yĩ gãmeri bũsiyijarã ïna.

<sup>33</sup>Ito bajija bero yumenati riojoti Jerusalénjũ tũdicoayijarã ïna ïja. Jerusalénjũ ïna ejaroca coga gũbojeno Jesús rãca riasotigoana, ito yicõri ïna rãca gãna cuni minijua ñayijarã ïna. <sup>34</sup>Ïna jũarã tũdi ejaja ticõri, ado bajiro goti bocayijarã ïna.

—Riti mũcana mani Ƴjũ caticoañi. Simón ïmasiti ïre tiñi, yĩ goti bocayijarã ïna.

<sup>35</sup>Ito yija ïnajũ cuni ïna ma waroca ïnare bajire gayere gotiyijarã ïnajũ cuni mũcana: “Ma gua waroca sīgũ suaquĩ guare. Wijũ ejacõri najũ ï bato ïsija ticõri, ‘Jesuti ñami ãni’, yĩ ti masicũ gua cuni”, yĩ gotiyijarã ïna, ito minijua ñanare.



(San Lucas 24.30)

Ī rāca riasotigoanare Jesús ĩ goaĩore gaye  
(Mt 28.16-20; Mr 16.14-18; Jn 20.19-23)

<sup>36</sup>Ito bajiro ĩna busi ĩnarocati ĩna wato goaĩoyijũ Jesús mũcana.

—Ñati mũa. Ñe mano queno ĩñaña mũa, yi ejayijũ Jesús ĩnare.

<sup>37</sup>Ito bajija ti ũcaciĩri gũiyijarã ĩna, “Wũjo ĩnaroja”, yirona. <sup>38</sup>ĩna gũijare ado bajiro yiyijũ Jesús:

—¿No yija ti ũcati mũa? ¿No yija, “Jesuti ĩnami. Jesuti ĩnagũiji gajea”, yi tũoĩati mũa? <sup>39</sup>Yũ ya ãmo tiya mũa. Ito yicĩri yũ ya gũbori cũni tiya mũa. Yũti ĩa yũ. Yũre queno ticĩri moaĩaña mũa. Wũjo ĩnajama yũ robo bajiro gĩa cuti, ri cuti yibetoja, mũa tija, yiyijũ Jesús ĩnare.

<sup>40</sup>Ito yicĩri ĩ ya ãmori ĩ ya gũbori cũni ĩnare ĩoyijũ ĩ. <sup>41</sup>Wanũbojarãti, “Ī meje ĩnagũiji”, yirona ũcayijarã ĩna. Ito bajija ticĩri, ado bajiro yiyijũ Jesús ĩnare:

—¿Bareoni jabeto ĩnacũti mũare? yiyijũ Jesús ĩnare.

<sup>42</sup>Ito yija wai jũora cuji co cuji ĩre ĩsiyijarã ĩna. <sup>43</sup>Itire boca ãmicĩri ĩna tiro riojo bayijũ ĩ. <sup>44</sup>Iti bacĩri ado bajiro yiyijũ Jesús ĩnare:

—Canũti yũre rĩtacati gayere mũa rāca ĩnagũjũ, “Ado bajiro rĩtaro yiroja yũre”, yi goticācũ yũ mũare. Ado bajiro mũare yicũ yũ: Moisés ĩ

ucare, Diore goti ïsiri masa ñna ucare, David ñayoru ï ucarena cuni, “Ado bajiro rëtaru yiroja Dios ï cõarure”, yi ucañi ñna. “Ñna ucado bajiroti yure rëtaru yiroja”, yi muare goticãcu yu, yiyijũ Jesús ñnare.

<sup>45</sup>Ito ï yija bero Dios oca tuti gaye ñna tuo masitoni ñnare goti rëtbodyijũ ï. <sup>46</sup>Ado bajiro yiyijũ ï ñnare:

—Cristo Dios ï cõaru quenabeto tõbujacõri godagu yiguñji. Ito yicõri mucana godana wato ñabojacõri tãdi catigu yiguñji mucana. <sup>47</sup>Iti oca masa jeyarore goti ucure ñaro wado yiroja. “Mua ñeñaro yirisere jidicãña. Ito yicõri Jesucristore tuorũnũña ñeñaro mua yirise Dios ï acabojotoni”, yi goti ucure ñaro wado yiroja. Jerusalén gãnare goti tiocõri masa jeyarore goti ucure ñaro wado yiroja, yi gotia Dios oca. <sup>48</sup>Ito bajiro iti rëtaja tigoana ña mua. <sup>49</sup>Yu Jacũ ï rotiado bajiroti muare Espiritu Santo queo sãgũ yigujã yu. Espiritu Santona suoriti Dios ï masirise muare ï queo sãroto riojua ado Jerusalénjuti ñacõaña maji, yiyijũ Jesús ñnare.

### **Macãrucũroju Jesús ï muja ware gaye**

*(Mr 16.19-20)*

<sup>50</sup>Ito bajiro ï yija bero Betaniajũ ñnare ãmi wayijũ. Ñ ya ãmori ñu mucõri, “Muare queno yijaro Dios”, yiyijũ ï. <sup>51</sup>Ito bajiro ñnare ï yija bero ñmacũjũ ãmi wayijũ Dios ñre. <sup>52</sup>Buto ñre rucubno wanũ quenacõri Jerusalénjũ tãdi wayijarã ñna. <sup>53</sup>Ito yicõri co rũmũ ruyabeto rucubnogã Dios ya wijũ minijuasotiyijarã ñna. Itocõ ña.